



ЛУКА УЛЭН МЭДЭНИ

Библиява туңсэрэй институт
Москва
2002

Bible Downloads:



DIGITAL BIBLE SOCIETY
www.dbs.org

Лука улэн мэдэни

Лука улэн мэдэни
Нанай хэсэдиэни туңсэрэн

ISBN 5-93943-034-1
ISBN 91-89122-78-X

© Библиява туңсэрэй институт,
2002

Миавасиори холамдисал!

Суэ дюлиэлэсу Сикун Пуегдун эм даҥсани «Лука улэн мэдэни» би. Сикун Пуегдун Балапчи Пуегдунди гэсэ Библиява, даҥсасал даҥсавачи очини. Эй боа ялодоани тэлипчи эринду, гучи эйнипчи эринду чу холаори даҥса.

«Улэн мэдэ» – туй Иисус Христос Мэнэ алосиива гэрбиэсихэни – грек хэсэсэлдиэни Евангелиеди гэрбиэсичи. Сикун Пуегдунду дуин Евангелиесэл бичи. Хэмтучи Иисус Христос балдихамбани, гучи дэнсихэмбэни, Нёани алосихамбани, Нёани тахани эрдэнгэ дякасалбани, Нёани буйкимбэни, тэй хамиалани уюнди хорагохамбани гисурэйчи.

Евангелиеду гисурэувури дякасал боҥго таҥго айҥанидо Палестинаду бичичи. Тэй эринду Палестинаду Рим императорсални далачихачи. Эйду балди иудейсэл мэнэ бодойвари агдова этэхихэчи. Тэй агдочи тэхэни – Гиамбани – Моисей гисурэндухэндиэни Эндур нёанчиани бухэни. Моисей хамиалани эгди Эндурдиэ ундэй найсал туй уҥкичи: Эндур Сондёмдини – Мессия дидэрэ, Нёани найсалчи сорондиади, бурбуридиэди хориорива олбиндяра. Гэ, дюэр миҥган айҥани чиалани Палестинаду, Вифлеемди гэрбуку нучи хотонду гойдами халачиори Мессия – Иисус Христос – балдихани. Эндур Хусэ Пиктэдиэни хориорива улэн мэдэ – тэй мэдэ боа ялодоани би, гой хэсэди гисурэй хэмту найсалчи суглэхэн.

«Лука улэн мэдэни» Евангелиесэл хэмтудиэди чу тиас би, чу улэн хэсэди нирувухэн би. Лука наондёандои тэҥ эгдивэ тачиочихани, окчичи най очини. Боҥгоду нёани Эндур гиамбани сараси най бичин, тотара нёани апостол Павелди

гэсэ эгдивэ пулсихэни бичин. Мэнэ Евангелиедуи Лука тэй биухэн дякасалба дюлиэлэни нирувухэмбэ, найсал бэе ичэхэмбэчи такорахани (Лк. 1:2). Нёани Евангелиева грек хэсэдиэни нирухэни. Таваҗкиди тэй Евангелиева эгди таҗго хэсэди туҗсэрэгүхэн бичин. Эси нанай хэсэдиэни нирувухэн «Лука улэн мэдэни» агбиҗкини.

Библиява туҗсэрэй институт туҗсэрэмдивэ, ярсимдива, хэм тэй Евангелиева нанай хэсэдиэни баргиохан найсалба банялайни. Буэ нанай гурунсэл тэй Библия даҗсавани мэнэ хэсэдии холамари мутэуриwэ агданасийпу.



Лука улэн мэдэни

1 паси

- 1 Си сариси: эгди най буэ алдандопова улэн саори биухэн дякасалба нирумэри дэрулухэчи.
- 2 Тэң дадоани хэм ичэхэн, Эндур хэсэвэни сугдэ дэрихэн найсал тэй биухэн дякасалба бумбивэ саваңкичи.
- 3 Туй ми-дэ чава, чу боңгодиади улэнди тачиочира, синду, гэбуку Феофил, идулэми нирувуривэ мурчихэмби.
- 4 Гучи ми, сариси тачиочиори тэрэк бивэни тэде сагоаси, чихаламби.
- 5 Гэ, Иудея эдени Ирод далачихани эриндуэни Эндур дёңни дяңгиани Захарияди гэрбуку, Авийди халако най бичини. Асини гэрбуни-тэни Елизавета, Ааронди халако эктэ най бичини.
- 6 Нёанчи дюэту Эндур дюлиэлэчи маңга тоңдо бичичи, хэм Эден Эндур колисалбани, гиансалбани тэрэк балдихачи, хайва-да эчиэ вадёлиачи.
- 7 Нёанчи пиктэ ана бичичи, Елизавета пиктэ бараси эктэ бичин, нёанчи сагдила бичичи.
- 8 Эм модан Захария мэнэ идудуи Эндур дюлиэлэни дэңсихэни.
- 9 Нёани Эндур дёңни дяңгиасални колидоани, Эндур чу даи дёкчиани ими, улэнди пуңку дякасалба поңкигилахани.
- 10 Тэң эгди гурун хэмтудиэри тэй эринду боала кэсивэ гэлэхэчи.

- 11 Чадод нёани дюлиэлэни Эндур Мэдуңкуни агбиңкини, сугдиури бэун аңгиа калтадоани илисими.
- 12 Нёамбани ичэпи, Захария дэңгэр миами иламосихани.
- 13 Мэдуңку-тэни нёанчиани уңкини: «Эди нэлэчирэ, Захария. Си кэсивэ гэлэхэси долдикпин. Си асиси Елизавета хусэ пиктэгуй бадяра. Нёамбани Иоаннди гэрбиэдечи.
- 14 Синду-тэни агдапси, енуэ осидяра, эгди най нёани балдиочиани тэң агдадярал.
- 15 Тотами тэй пиктэ Эндур дюлиэлэни тэң даи най осидяра, аракива-да эм омиа тадяра. Энимби хэмдэдүэни бими Эндур Эридиэни дялоптадяра.
- 16 Израиль калтадоани би эгди найсалба Эндурчиэчи нёани кэчэригуэндэрэ.
- 17 Даи Эндурдиэ ундэй най Илия кусундиэни кусуңку, эридиэни эрику Нёани дюлиэлэни дидэрэ, аминачи миавамбачи пурилдуэчи бугугуи, дикэсу гурунду тоңдо найсал мурумбэчи осиваңгои, баргиохан гэрэн найсалба Эндур дюлиэлэни иливаңгой».
- 18 Захария-тани Мэдуңкучи уңкини: «Хони ми эйвэ агдами мутэмби? Ми-дэ сэи даи, ми асии-да сэни даи».
- 19 Мэдуңку таодагоми уңкини: «Ми, Гавриил, Эндур дюлиэлэни илисими, синди гисэрэндугуи, эй улэн мэдэвэ саваңгои, гиаактамди очимби.
- 20 Эвэңки си хэмэ бидечи, хисаңгоми мутэси осидячи, ми хэсэивэ агдачиндолаи. Мэнэ эримби исидоани, ми уңкимби тэде осидяра, чадод-мат хисаңгологодячи».
- 21 Тэй эринду гэрэн гурун, Захариява халачимари, нёани Эндур даи дёгдоани гойдами бивэни эрдэңгэсихэни.
- 22 Нёани-тани ниэгурэ, нёандиачи хисаңгоми мутэси осихани; нёанчи нёани Эндур даи дёгдоани гарбиахамбани отолихачи. Тотами, эмуту эбэ-мэт, найсалди, нэладии ичэучими, хисаңгохани.
- 23 Гэ, мэнэ дэңсии эрин ходиочиани, нёани дёкчи ди-дүохэни.

- 24 Бэктэн бипиэ, нёани асини Елизавета бээду осихани. Тотами-да, тойнуга биадоа чава даячами, дёгдиадии ниэвэчиэси бичини. Нёани туй уңкини:
- 25 «Эй инисэлду Эндур, мимбивэ гудиэсими, туй бивэңкини, най аңмадоани осиаси осигоива».
- 26 Нюңгучиэ биадоа Назаретади гэрбуку Галилея хотончиани Эндур Мэдуңку Гавриилба гиактадихани.
- 27 Нёани Марияди гэрбуку наондён паталанчи дичини. Мария-тани Давид халадиадии би Иосиф асигоани мэдэсиухэн эктэ.
- 28 Мэдуңку нёанчиани ими, уңкини: «Агданасими кэсику биси, Эндур Синди би, Эндур асисал алдандоани симбивэ сондөхани».
- 29 Нёани-тани, Мэдуңкувэ ичэпи, нёани хэсэдиэни иламосими, мурчихэни: Хамачако туй би хэсэсэлду?
- 30 Мэдуңку-тэни Нёанчиани уңкини: «Эди нэлэрэ, Си Эндур улэсини паталан.
- 31 Гэ, Си бээду осидячи, Хусэ Пиктэгуй бадячи, Иисусэди гэрбиэдечи.
- 32 Нёани тэң даи най осидяра. Даи Эндур Хусэ Пиктэдиэни гэрбуку осидяра. Эден Эндур Нёандоани Израильба далачиори гиамба будерэ.
- 33 Нёани Иаков халасалдоани эден осидяра, тотара Нёани далачини хали-да ходиаси».
- 34 Мария-тани уңкини: «Хони туй оси, ми эдии сарасилаива?»
- 35 Мэдуңку таодагоми уңкини: «Эндур Эрини Синчи тудерэ, Даи Эндур кусуни симбивэ киридыра, туй таме Си Гандямба бадячи, Эндур Хусэ Пиктэдиэни гэрбуку осидяра.
- 36 Гэ, Си балдихоталси-да Елизавета, пиктэвэ бараси сагди эктэ, хусэ пиктэди бээду очини, нюңгун биадо бини.

- 37 Туй тами саори: Эндур хэсэни таони хали-да кусун ана очогоаси».
- 38 Чаду Мария уңкини: «Гэ, Ми Эндур кэкэни. Си хэсэ-си минду тэдеку осигини». Мэдуңку Нёандиадиани энүхэни.
- 39 Мария-тани, тэй иниду илигора, хурэн боачиани, Иуда Хотончиани будурими энэхэни.
- 40 Нёани-тани, Захария дёкчиани ими, Елизаветади бачигохани.
- 41 Елизавета Мария бачини хэсэвэ долдидоани, нёани хэмдэдуэни би омиа туйңкупсиңкини. Чадо-тол Елизавета Эндур Эридиэни дялокпини.
- 42 Нёани-тани, даи дилгандии морапсими уңкини: «Си экэсэл алдандоани чу кэсику, хэмдэдуэси би омиа-да чу кэсику!
- 43 Хайми ми туй кэсику осихамби, хайми минчи Эден Энини кирихани?
- 44 Туй тами Си бачиаси дилганси ми сианчиива исидоани, хэмдэдуивэ би омиа агдами туйңкупсиңкини.
- 45 Эндур уңкини хэсэвэ тэдехэн аси най – кэсику: тэй хэсэ нэ тэрэк осигой».
- 46 Мария-тани уңкини: «Ми миавандои Эндурбэ мактаи,
- 47 Ми додии, мурундии Эндурчи, Мэнэ Хоримдичии агданасии.
- 48 Нёани Ми улэн бивэ тургундулэни мимбивэ, кэкэңгуи, сагохани, эвэңки хэм халасал Мимбивэ гэбулэдерэл.
- 49 Масику Эндур Минду даи гэбувэ бухэни, Нёани гэрбуни гандян би.
- 50 Хони-да хэм би халасалду-да, Нёандиани нэлэчи гурунду-дэ Эндур гудиэсими кэсивэ бурини.
- 51 Нёани мэнэ масии ичэвэңкини, оркин мурунсэлбэ эуси-таоси сар-сар найсал миавансалдиadiaчи пуңнэхэни.

- 52 Нёани маси найсалба эден боадиadiaчи энүэңкини, тэй боачи тоңдо найсалба тэвэңкини.
- 53 Тэң маңгади хайва-да байчахан гурунду хэм бүхэни, баян найсалду хайва-да эчиэ бурэни.
- 54 Израиль гэрэн гурундуэни, мэнэ пиктэдуи, Нёани мэнэ улэмби тул-тул буктэхэни.
- 55 Балана Нёани туй буэ аминачипова уңкини, туй Аврамду, гучи пиктэсэлдуэни уңкимби хэсэи тэдеку осиваңкини».
- 56 Мария-тани Елизаветади илан биадоа-ка бичини, тотара дёкчий мочогохани.
- 57 Елизавета-тани пиктэгуй барини эрини исихани, хусэ пиктэвэ бахани.
- 58 Нимэкэнсэл, балдихоталсал Эндур гудиэсимбэ нёанчиани тугбүхэмбэни долдихачи, нёанчи нёандиани гэсэ агданашихачи.
- 59 Гэ, дякпун инидуэни-кэ оңака дюлиэни пойкаптаңгивани чалигой дичичи, тотара нёамбани амини гэрбудиэни, Захарияди гэрбийчэхэчи.
- 60 Чадотани энини чава осисихани, тотара нёани пиктэй Иоанн гэрбуди гэрбийчэхэкини.
- 61 Дичин гурун Елизаветачи уңкичи: «Си халадоаси уй-дэ аба, тэмэчэ гэрбуди гэрбуку най».
- 62 Ңаладиари ичэучимэри аминчиани мэдэсихэчи, хони нёани пиктэй гэрбулэйчэйниэм?
- 63 Нёани ундэхэкэмбэ гэлэхэни, тотара нирухэни: «Нёани гэрбуни Иоанн». Хэмту най-тани эрдэңгэсихэчи.
- 64 Тэй эринду тэрэк оңака аңмаи нихэлихэни, тотара Эндурбэ мактами хисаңгосилохани.
- 65 Кэндэли бичин гурун хэм нэлэхэчи; тотара эйвэ хурэсэл-маня, Иудеяди гэрбуку, боаду балди гурунчи гисурэхэчи.

- 66 Хэм досодяхан гурунсэл чава миавандоари нэхэчи, то-
тара уңкичи: «Уй тэй оңака осидяра?» Эндур ңалани
нёандиани бичини.
- 67 Захария-тани Эндур Эридиэни дялокпини, Эндур хэ-
сэдиэни хисаңгоми уңкини:
- 68 «Эден, Израиль Эндурни, Нёани гэрэн гурумбэ кири-
хани, нёандоачи хэңгэлиуриwэ бухэни. Нёандоани
мактагита осигини.
- 69 Нёани мэнэ хусэ пиктэи Давид гэрбуку дёгдоани Ма-
си Хоримдива бунду бухэни.
- 70 Хали-да хэм балдихан гандян Эндурдиэ ундэй найсал-
диадииани балана Эндур хэмту найчи саваңкини:
- 71 Нёани буэ байгоансалдипова, бумбивэ чиуриси гурун-
дипувэ хэмту найва хоридяра.
- 72 Буэ аминсалдопова гудиэсимбэ будерэ, мэнэ гандян
пуегдумби дёңгодяра,
- 73 Эндур буэ аминдопова, Авраамду, маңга хэсэи бухэни,
тэй умбухэн дякасалба бунду бугудерэ.
- 74 Ңэлэчиэми, буэ байгоансалпо ңаладиадииачи мэпэри
хэңгэлигурэ,
- 75 Мэнэ балдии инини таондоани Эндур дюлиэлэни
гандянди, тоңдоди Нёандоани дэңсиуриди.
- 76 Си-дэ, Оңака, Эндур дюлиэлэни энэдечи, Нёани пок-
тогоани баргигой. Туй тами си Чу Увуйдимэ Эндурдиэ
ундэй найди гэрбуку осидячи.
- 77 Си найва отолиwандячи: сорондиади хэңгэлигуэчи,
туй тами нёанчи мэпэри хоридярал.
- 78 Буэ Эндурпу додии гудиэсидиэни бунчи пэрхидиэди
ңэгден дичини,
- 79 Буни калтадоани бими, хайва-да сараси гурумбэ ото-
ливаңгой».
- 80 Оңака-тани урэхэни, Эндур Эридиэни масилохани,
Израильду агбиңгой дюлиэлэни най ана боаду би-
чини.

2 паси

- 1 Тэй эркивэ эден Август боа ялодоани би найсалба хэм таоми нирувэнжини.
- 2 Квириний Сириява далачайдоани тэй чу боңго нирун бичин.
- 3 Най таони мэнэ хотончии мэпи нирундэми энэхэни.
- 4 Иосиф Давид халалани бичини, туй тами нёани-да Назарет хотондиади Галилея боадии Иудея боачиани Вифлеем, гойдима гэрбуни Давид, хотончиани энэхэни.
- 5 Нёани бээду би асидии Марияди гэсэ ниругуи энэхэни.
- 6 Нёанчи чаду бидуэчи, Нёани хорайни эрин исихани.
- 7 Нёани Акпалова, Хусэ Пиктэгуй бахани, туй тара Нёамбани хукухэни, исиачиори дёгду бэун-дэ аба бими, Нёамбани удин сиарини отонду нэхэни.
- 8 Тэй калтадиала аодандо удин этумдисэлчи долбо мэнэ ёнаи этухэчи.
- 9 Олокиана нёанчи дюлиэлэчи Эндур Мэдуңкуни агбиңкини, нёамбачи Эндур нэгденди миас гарпахани, туй тамари нёанчи тэң маңгади нэлэхэчи.
- 10 Мэдуңку-тэни нёанчиачи уңкини: «Эди нэлэсу! Ми сунчи даи агдапси мэдэвэ олбиңкимби. Хэмту найсал тэй мэдэди агдаярал.
- 11 Эйнивэ Давид хотондоани суэ Хоримдису балдихани, тэй Эден Христос.
- 12 Гэ, суэ тэдегуэсу: удин сиарини отонду хукучэку аори Оңакава бадясу».
- 13 Олокиана Мэдуңку хамиалани Боа чаохани тэң эгди-ди агбиңкини, тэй чаоха Эндурбэ гэбулэхэни:
- 14 «Боаду Гэбу Эндурду бигини, наду улэмбэ чихалай найсалду Эндур номохон додоачи бигини».

- 15 Мэдункусэл боачи дэгдэгуйдуэчи, этумдисэл диа диачиари уңкичи: «Вифлеемчи энэгуэри, Эден хайва-да бумбивэ саваңкимбани, хай-да чаду очимбани ичэндэ-гуэри».
- 16 Будуримэри исихачи, чаду Мариява, Иосифба гучи удин сиарини отонду аори Оңакава бахачи.
- 17 Нёамбани ичэпэри-тэни, Эндур Мэдункусэлни тэй Оңакава дюлэси умбухэн дякава хэм гисурэхэчи.
- 18 Хэмту най этумдисэл гисурэйвэчи эрдэңгэсимэри досидяхачи.
- 19 Мария-тани тэй хэсэсэлбэ мэнэ миавандои чуңну нэ-учэхэни.
- 20 Эмуту Мэдунку дюлуй этумдисэлчи уңкичи-мэт, туй-дэ биухэмбэ нёанчи долдихачи, ичэхэчи. Тотара Эндурбэ маңгади мактамари, гэбултумэри мочо-гохачи.
- 21 Дякпун ини сиучиэни, Оңака дюлиэни пойкаптаңгивани чалиори эрин исиочиани, Нёамбани Иисусэди гэрбиэхэчи. Энинчиэни тэй Пиктэди бэеду осини дюлиэлэни туй гэрбиэуриэм, Эндур Мэдункуни уңкини.
- 22 Гандян осiori инисэл ходиочиачи, Моисей гиандолани Нёамбани Эден Эндур дюлиэлэни иливаңгой Иерусалимчи олбиңкичи.
- 23 Оңака таомбани, хэмдэлэ агбинди хусэ пиктэвэ Эндурду дэңсигуэчи носовори – туй Эден гиандолани нирувухэн.
- 24 Дюэр даи кучивэ, дюэр нучи кучивэ сугдигуй – туй Эден гиандолани умбухэн.
- 25 Гэ, тэй эринду Иерусалимду эм най Симеонди гэрбуку бичини. Нёани тоңдо, Эндур дюлиэлэни тэде бичини, Израиль хоримбани халачихани, Эндур Эрини нёандоани бичини.

- 26 Эдемби Христосава ичэйни дюлиэлэни нёани эм будэ бидерэм – туй балана Эндур Эридиэни нёанчиани умбухэн.
- 27 Нёани-тани Эндур дёкчиани, хони уйлэ дёңговаңкичи, дичини. Тэй эринду Марияди, Иосифди Оңака Иисусэвэ, гиан коливани Нёандоани тагой, олбиңкичи.
- 28 Симеон Оңакава ңалачии дяпахани, Эндурбэ банялами уңкини:
- 29 «Эси Си, Эден, мэнэ хэсэлэи лаодиамби номохонди чиндайси.
- 30 Ми насалби ичэхэчи:
- 31 Гой-гой голо гурун дюлиэлэчи баргихаси, хорихаси хэңгэлимбэ.
- 32 Эндур гиамбани сараси найсалду ңэгдембэ олбиңкимбаси, Израиль найңгоани мактахамбаси».
- 33 Иосиф-да, Энини-дэ Нёамбани умбухэнди эрдэңгэсихэчи.
- 34 Симеон-тани, нёамбачи мактачими, Мариячи, Энинчиэни уңкини: «Гэ, Тэй аорини тургундулэни Израильду эгди най тугуй, эгди най илигой, эгди най Нёани байгоансални осигой.
- 35 Си миавандоласи-тани лохон идерэ; туй тамари эгди най мурунсэлчи нихэлиптэдерэ».
- 36 Чадо-тани Эндурдиэ ундэй эктэ бичини Аннади гэрбуку, Фануил пиктэни, Асир халадиадани би, киркэ сагди мама. Нёани эдиди надан айңанидо-рагда балдихани,
- 37 Наон эктэни дякпойңго дуин сэду би, Эндур даи дёгдиани хаоси-да эм энэми, поалдоани мэпи хадичивами, ини-долбо Эндурчи кэсивэ гэлэми, туй балдихани.
- 38 Нёани-тани дидэ Эндурбэ мактачихани, най таончиани Иерусалимду хэңгэлимбэ халачихан гурунчи Нёамбани хисаңгохани.

- 39 Нёанчи-тани Эндур гиандолани хэм тахачи, Галилея-
чи, мэнэ Назарет хотончиари мочогохачи.
- 40 Оңака-тани урэхэни, Эндур Эридиэни масилтохани,
тэң соңта муруңку оми, Нёандоани Эндур гудиэсику-
ни бичини.
- 41 Нёани Энени мападии Иерусалим хотончиани айңани
таондоани Пасха анядоани пулсихэни.
- 42 Нёани дёан дюэр сэи исигочиани, нёанчи мэнэ коли-
лари Иерусалимчи анярагоари дичичи.
- 43 Пасха аняни сиучиэни, нёанчи мочогойдоачи, наон-
дёкан Иисус Иерусалимду дэрэдигихэни. Энени-дэ,
Иосиф-да чава эчиэ пэксэчи.
- 44 Туй тамы-да, Нёани гой гурунсэлди мочогоям, мурчи-
хэни. Иниэ тиап энэпэри-мэт Нёамбани такори най-
сал, ахондосал довани гэлэгулухэчи.
- 45 Пиктэвэри эм баогоа тапары-мат, Иерусалим барони
гэлэндэгүмэри мочогохачи.
- 46 Илан иниэ бипиэ, Нёамбани Эндур дөгдоани баогохачи.
Иисус алосимдисал токондоани тэсими, нёамбачи дик-
сучими досидяхани, туй тапи нёанчиачи мэдэсихэни.
- 47 Хэмту тэй найсал, досодямари, Нёани мурундиэни,
таодагойдиани миаңкичи.
- 48 Пиктэвэри ичэрэ, Марияди Иосифди эрдэңгэвэ баха-
чи, туй тара Энени Нёанчиани уңкини: «Поя! Хайми
Си туй тахаси? Амиси, Мии, мурумбэри гасамари,
Симбивэ гэлэгүхэпу».
- 49 Нёани нёанчиачи уңкини: «Хайгой суэ Мимбивэ гэлэ-
гуйсу? Амимби дөгдоани бигилэивэ суэ сарасису-ну?»
- 50 Туй тамы-да нёанчи Нёани уңкимбэни эчиэ отолигоачи.
- 51 Нёани-тани нёандиачи энэрэ, Назаретачи дичини,
тул-тул кэкчэхэмбэчи досидяхани. Энени-тэни тэй
хэсэсэлбэни мэнэ миавандои хэм нэучэхэни.
- 52 Иисус-тэни тургэнди урэхэни, муруңкунэхэни, Эн-
дурду, найсалду миаван най очини.

3 паси

- ¹ Гэ, эден Тиверий далайни дэан тойнга айңани бичини. Тэй эринду Иудеяду Понтий Пилат даламди бичини, Галилеяду Ирод даламди бичини, нэуни Филипп Итуреяду гучи Трахонидаду далахани, Лисаний-да Авилеяду далахани.
- ² Аннади, Каифади Эндур дёңни боңго даламдисални бидуэчи, най ана боаду балдихан Иоаннчи, Захария хусэ пиктэчиэни Эндур хэсэни бичини.
- ³ Иоанн-тани Иордан боавани кэндэли пулсихэни, гэрэн гурун хайва-да оркиачихамбари ачойчагомари сэвэкилэгүэчи алосихани, соромбори дякасалба Эндур нёандиадиачи чиндагохани.
- ⁴ Эндурдиэ ундэй най Исаяди гэрбуку даңсадоани тэй хэсэсэлбэ нирувухэн: «Най ана боаду най морайни дилгани бичин: „Эндур поктогоани баргиосу, Нёани поктовани тоңдо осивандосу!»
- ⁵ Хай-да хэм чоңдо дялоптагини, хай-да хэм хурэн нэ-екпиңгини, модаңку покто тоңдо осигини, мокчо покто нэен осигини.
- ⁶ Хэмту най Эндур хоримба бурирвэни ичедерэ“».
- ⁷ Иоанн нёандиади сэвэкилэндэмэри дичин найсалчи хисаңгохани: «Суэ муйки пиктэсэлни! Уй, сэвэкилэурирвэ гэлэйэм, оси аяктади чочогои сунчи уңкини?»
- ⁸ Хэмту най ичэдейни сорондиади улэн дякава-маня аңгосу. „Буэ амимпу Авраам“, – мэнэ долари мактачимари эди мурчиэсу. Туй тами ми сунчи ундии: „Эндур хай-да хэм дёлоди Авраамду пиктэсэлбэ осивами мутэй“.
- ⁹ Элэ-дэ сурэ мо дачандоани би: Хайва-да бурэси мова чапчичи, тотара тавачи наңгалайчи».
- ¹⁰ Нёамбани найсал мэдэсихэчи: «Буэ-дэ хони таори?»

- 11 Нёани таодагоми уңкини: «Уй дюэрди тэтуэку, эм тэтуэи хай-да ана найду буру, уй сияптаңгику, эй-мэт таро».
- 12 Иоаннчи албамба дяпай гурун, сэвэкилэгуй дидэ, уңкичи: «Алосимди! Буэ хони таори?»
- 13 Нёани нёанчиачи уңгухэни: «Пулэдэлэ эди гэлэсу!»
- 14 Чаохари найсал-тани нёанчиани мэдэсихэчи: «Буэ-дэ хони таори?» Нёани-да нёанчиачи уңкини: «Уйвэ-дэ эди оркиласу, эди эхэнчуэсу, мэнэ туриндиэри элэсиусу!»
- 15 Найсал халачими бидуэчи, нёанчи хэмту Иоамба Христоса-нум миавандиари мурчидуэчи,
- 16 Иоанн-тани хэмтуничи таодагохани: «Ми сумбивэ муэди сэвэкилэи. Туй тамы-да миндуй Масини дидини. Ми гэбу анаи, Нёани отани уичэвэни ачомы. Нёани сумбивэ Эндур Эридиэни, тавади сэвэкилэдерэ.
- 17 Тэй Масини җаладоани мома чэвэ би. Нёани усэсэлби гандян осивандяра, такточии таосангодяра, паяктава-ни гуптэси тавади дегдидерэ».
- 18 Нёани гой-гой улэн мэдэвэ гэрэн гурумбэ алосими саваңкини.
- 19 Иоанн Ирод даламдивани, Иродиада, нёани нэуни асивани, гучи Иродава хай-да хэм оркин дякасал тургундулэни оркилтохани.
- 20 Чачи гучи ноңгихани Ирод Иоамба лаоду тэвэңкимбэни.
- 21 Хэм найсал сэвэкилэйдучи, Иисус-дэ сэвэкилэми кэсивэ гэлэйдучи, боа уйлэ дэгбэликпини.
- 22 Эндур Эрини-тэни Нёанчиани кучи бэени-мэт тухэни. Боадиади дилган оми уңкини: «Си Ми чу улэси Хусэ Пиктэи, Синди Ми Эндур чихаламби!»
- 23 Иисус, дэҗсиуриwэ дэруридуw, гочин сэдуэ бичин. Нёани, Иосиф хусэ пиктэниэм, мурчихэчи.

- 24 Нёани Амини, гучи тэй Аминачи — эй гурунсэлм,
мурчихэчи: «Илия, Матфат, Левий, Мелхия, Ианнай,
Иосиф,
25 Маттафий, Амос, Наум, Еслим, Наггей,
26 Мааф, Маттафий, Семей, Иосиф, Иуда,
27 Ионнанан, Рисай, Зоровавель, Салафиил, Нирий,
28 Мелхия, Аддий, Косам, Елмодам, Ир,
29 Иосия, Елиезер, Иорим, Матфат, Левий,
30 Симеон, Иуда, Иосиф, Ионан, Елиаким,
31 Мелеай, Маинан, Маттаф, Нафан, Давид,
32 Иессей, Овид, Вооз, Салмон, Наассон,
33 Аминадав, Арам, Есром, Фарес, Иуда,
34 Иаков, Исаак, Авраам, Фара, Нахор,
35 Серух. Рагав, Фалек, Евер, Сала,
36 Каинан, Арфаксад, Сим, Ной, Ламех,
37 Мафусал, Енох, Иаред, Малелеил, Каинан,
38 Енос, Сиф, Адам-тани Эндур хусэ пиктэни бичини».

4 паси

- 1 Эндур Эридиэни дялокпин Иисус Иордандиади мочо-
гохани, Эндур Эрини Нёамбани най ана боачи олбиң-
кини.
2 Чаду дэхи иниэ Нёани амбанди пэргэликпин бичини.
Иисус хэмту иниэ хайва-да эчиэ сиарани, тотара тэй
эрин ходидоани, Нёани маңга демусилухэни.
3 Амбан-тани Нёанчиани уңкини: «Си Эндур Пиктэни
осини, эй дёлова эпэн осивандо».
4 Иисус, нёанчиани таодагоми, уңкини: «„Эпэнди-рэг-
дэ най балдиаси, Эндур хэсэни таондиани-да балди-
дяра“, — туй нирувухэн».
5 Амбан Нёамбани гогда хурэнчи тобоми, чадобачи яло
боодоани хэм эденсэл калтасалбачи ичэвэңкини.
6 Амбан Нёанчиани уңкини: «Синду хэм тэй эденсэл
калтасалбачи, гиамбачи, гэбувэчи бурэмби, тэй миң-
ги, туй тамы ми уйду чихалай осини, уйду бурии.

- 7 Гэ, Си минчи михорандиси осини, тэй хэм Сиң-ги оси».
- 8 Иисус, нёанчиани таодагоми, уңкини: «Миндиэди энү, амбан. „Эден Эндурчии михоранду, туй тара Нёамбани-рагда дэңсиу“, – туй нирувухэн.
- 9 Амбан Нёамбани Иерусалимчи олбиңкини, туй тара, Нёамбани Эндур дёңни уелэни иливанда, уңкини: «Си Эндур Пиктэни осини, эедиэди пэгиси пуйку.
- 10 Туй нирувухэн: „Симбивэ этугуивэ Мэдүңкусэлчии уңкини.
- 11 Дёлова бэгдиси исиасидиани, ңаладоари Симбивэ олбиндярал“».
- 12 Иисус нёанчиани таодагоми уңкини: «Умбухэн: „Си Эден Эндурби эди пэргэчиэ!“»
- 13 Амбан, хэм пэргэлими ходира, Нёандиадиани баң энүхэни.
- 14 Туй тара Иисус масику эриди Галилеячи мочогохани, тотара Нёани мэдэни хэм лаң-лаң би боаду дерикпини.
- 15 Нёани еврей кэсивэ гэлэури дёсалдоани алосихани, тотами гэрэн гурун Нёамбани гэбулэхэчи.
- 16 Иисус урэхэмби хотончии, Назаретачи дидэ, эй дюлиэлэни бичин-мэт надиачиа иниду кэсивэ гэлэури дёкчи ирэ, даи дилгандии холагой илихани.
- 17 Нёандоани Эндурдиэ ундэй най Исаяди гэрбуку даңсавани бухэчи, тотара Нёани, даңсава нихэлипи, нирувухэн боавани бахани:
- 18 «Эден Эрини Минду би. Гиохатонсалчи үлэн мэдэвэ гисурэгуивэ, агдаси гурумбэ гоилтогоива, дяпахан найчи хэңгэлигуивэ, балисалба ичэгулуэмбуриэ алосигоива, сиңгэрэури найсалба хони-да чиндагорива,
- 19 Эндур гудиесини эримбэни савангоива Нёани Мимбивэ сондөхани».

- ²⁰ Иисус, даҥсава дасигора, дэҥсимдиду бугурэ, тэгүхэни. Кэсивэ гэлэури дэгду бичин най таони насални Нёанчиани ичэгү-кэ.
- ²¹ Нёани-тани нёанчиачи хисаҥголохани: «Эйнивэ суэ досодяхасу эйду нирувухэндулэ тэде осихани».
- ²² Хэмту найсал Нёандиани чихалахачи, аҥмалани ниэри тэде хэсэди эрдэҥгэсихэчи, Иосиф хусэ пиктэни биесини-нум, уҥкичи.
- ²³ Иисус нёанчиачи уҥкини: «Тэде, суэ Минчи туй ундесу: „Окчичи най, Мэпи окчиро! Си эйду, балдихан боадуи, Копернаумду бичи-мэт осивандо. Буэ чава долдихапу“».
- ²⁴ Нёани уҥкини: «Тэде сунчи ундии: „Эмун-дэ Эндурдиэ ундэй най балдихамби боадуи тэй наям бодорива бараси“».
- ²⁵ Тэделэ сунчи ундии: „Эндур даи найни Илия ини-сэлдуэни Израильду эгди наон экэсэл бичичи. Тэй эринду илан айҥани нюҥгун бианиа калтадо тугдэ ана бичин, туй тами наду маҥга хади очини.
- ²⁶ Эмун наон эктэчи-дэ Илия эчиэ гиактадикпини, тэм Сидон боадиани Сарепта ихончиани наон эктэчи-рэгдэ гиактадикпини.
- ²⁷ Эндурдиэ ундэй най Елисейди гэрбуку эриндуэни-дэ Израильду эгди оркин укуди энуси най бичини, эмун-дэ тамача най эчиэ гандян осигора, тэм Нееман Сирияҥкан-рагда“».
- ²⁸ Кэсивэ гэлэури дэгду би найсал, чава долдипари, маҥга аякталахачи.
- ²⁹ Илира, хотондиади Иисусэвэ пуҥнэхэчи, хурэнду аҥговохан хотон порончиани, уедиэди пэйси Нёамбани наҥгалагой, олбиҥкичи.
- ³⁰ Нёани-тани найсал алдандолани тап энэми энухэни.
- ³¹ Галилеячи, Копернаум хотончи эурэ, надиачиа ини-сэлду нёамбачи алосихани.

- 32 Нёани аლოსиндиани эрдэңгэсихэчи, туй тами Нёани хэсэни гиаңко.
- 33 Кэсивэ гэлэури дёгду эм най, чукин бусиэку бими, даи дилгандии морасиңкини:
- 34 «Бумбивэ эди тоңгалара, Иисус Назаретаңкан, бумбивэ эди чиуриңгирэ! Си бумбивэ вандами дичиси; ми сарамби Си уй, Си Эндур Сондёмдини тачи».
- 35 Иисус, нёамбани паполами, уңкини: «Хэмэ бису, нёандиадиани ниэгу!» Амбан, хай-да оркимбани эм тами, кэсивэ гэлэури дё токондоани наңгалара, нёандиадиани ниэхэни.
- 36 Хэмту найсал маңгади нэлэрэ, диа диадиари хисаңго-хачи: «Тэй хай дяка? Нёани гиаңко, масику, чукин эрисэлбэ паполайни, туй тами нёанчи ниэричи».
- 37 Хэмту лаң-лаң би боасалчи Иисус мэдэни дерикпини.
- 38 Кэсивэ гэлэури дёгдиади ниэрэ, Нёани Симон дёкчиани ихэни. Симон эңпэни полони маңга бичин. Иисусэчи гудиэмбэ гэлэхэчи.
- 39 Тэй эктэчи лаң энэрэ, полOMBани паполахани, полони абанахани. Чадо-баки тэй эктэ, илигора, нёамбачи дэңсихэни.
- 40 Сиун тугуйдуэни хайди-да хэм энуси гурумбэ Иисусэчи олбиңкичи, Нёани, ңалаи бэедуэчи нэми, энусихэн гурумбэ аянагоаңкини.
- 41 Чукин эрисэл эгди найдиади даи дилгандии морамари ниэхэчи гучи уңкичи: «Си Христос, Эндур Пиктэни!» Нёани-тани амбасал тэй Христосам ундивэчи паполахани.
- 42 Инучиэни, Иисус дёгдиади ниэрэ, най ана боачи энэхэни. Найсал нёамбани гэлэгүхэчи, Нёанчиани дидэ, Нёани хаоси-да энэйвэни осисихани.
- 43 Иисус-тэни нёанчиачи уңкини: «Гой-гой хотонду балди гурунчи-дэ Ми Эндур далайни улэн мэдэвэ гисурэ-гилэи. Чава тагои Ми эуси гиактадиохан».
- 44 Тотара Галилеяду кэсивэ гэлэури дёсалду аლოსиктахани.

5 паси

- 1 Эм модан Иисус Генисарет хэвэни тоидоани илисидоани, эгди най симиани Эндур хэсэвэни долдигоари Нёани дякпадоани илисихачи.
- 2 Иисус хэвэндү дюэр огдава ичэхэни; ботамдисал, огдадиари хулүндэ, адоливари силкохачи.
- 3 Симон огдачиани ора, Нёани Симомба няңга тайси чисайвани гэлэхэни, туй тара, тэрэ, огдадиади найва алосихани.
- 4 Алосими ходира, Симончи уңкини: «Соңтачи чисару, туй тара вагоари адоливари тулэусу».
- 5 Симон Нёанчиани таодагоми уңкини: «Алосимди! Буэ долбо тиап дёбомари хайва-да эчиэ варапу; туй там-да Си хэсэлэси адолива тулэдемби».
- 6 Туй тара нёанчи эгди согдатава вахачи, адоличиди гудэликпини.
- 7 Дюэе огдаду би диасилбари саваңкичи, бэлэчиндэмэри дигуэчи; гэ, дичичи, дюэту огда тиас очини, нёанчи дириэлүхэчи.
- 8 Чава ичэрэ, Симон-Пётр, Иисус пэйңэнчиэни мукчүрэндэ, уңкини: «Миндиэди энүру, Эден! Ми сороңку най тамби».
- 9 Симон-Пётр, нёандиани гэсэ бичин хэмту найсал тэй ваохан согдата эгдилэдиэни ичи ана һэлэхэчи.
- 10 Гучи Симонди гэсэ бичин диасилни, Заведей пурилни Иаков, Иоанн-да тэң һэлэхэчи. Туй тара Иисус Симончи уңкини: «Эди һэлэчирэ, эвэңки найсалба дяпикачидячи».
- 11 Дюэту огдавари начи тоанда, хэм наңгалара, Иисус хамяалани энэхэчи.
- 12 Иисус эм хотонду бидуэни, эм оркин укуди энуси най дичини, Иисусэвэ ичэрэ, начи турэ, намичами, уңкини: «Эдемби! Си чихалай осини, мимбивэ гандян осивандо».

- 13 Иисус, җалаи эурирэ, нёамбани тоңгалара, уңкини: «Ми чихалаи, гандян осигору!» Чадобакки оркин укусэл тэй найду абанахачи.
- 14 Иисус-тэни, тэй найчи уйчи-дэ эди гисурэрэм, уңкини, тотара кэсивэ гэлэури дё даламдичиани энунэкини, гандян осигохандолаи сугдигугуэни, хони Моисей, найва тэдюэми, тавандини-мат.
- 15 Туй тахани-да, хайс Иисус мэдэни сугдэ дерикпини Тэу эгди най хаядиа-да хэм дилухэчи, Нёамбани досодягой, энувэчи Нёани окчичигоани.
- 16 Нёани-тани, най ана боачи энэрэ, кэсивэ гэлэхэни.
- 17 Эм иниду Нёани алосоидоани, чаду Иерусалимдиадидичин даҗсава сари найсал, гиамба сари найсал тэсидуэчи, Эндур кусумбэни энуси гурун аянагойдоачи ичэури бичин.
- 18 Гэ, найсал тэми мутэси маңгади энуси найва сэктэпунду олбиңкичи; тэй найва дёкчи ивуйчэхэчи, Иисус дюлиэчиэни нэйчэхэчи.
- 19 Эгди найсал бини тургундулэни энэгуй поктогой барамми, дё учиеэни тохачи, гуйчэ тап дё токончиани Иисус дюлиэлэни энуси найва сэктэпундиэни гэсэ тугбухэчи.
- 20 Иисус-тэни, нёанчи агдайвачи ичэрэ, тэй найчи уңкини: «Си соросалбаси синдиэди ачовори».
- 21 Даҗсава сари гурунсэл, фарисейсал мэнэ долари мурчимэри, уңкичи: «Си, уй бими, Эндурбэ ачапчи ундиси? Уй соромба ачоме мутэй? Тэм эм Эндур-рэгдэ».
- 22 Иисус, мурумбэчи отолира, нёанчиачи таодагоми уңкини: «Хайва суэ миавандоари мурчису?»
- 23 Хайва дядима умбури: „Си соромбаси ачориам, умбури; илира, пулсируэм, умбури?“
- 24 Суэ саросу: „Най Хусэ Пиктэни наду соромба ачори гиаңкони“». Нёани тэй тэми мутэми энуси найчи уңкини: «Синчи унди: „Илигора, сэктэпумби дяпагора, дёкчиэ энур“».

- 25 Тэй най, чадо-тул нёанчи дюлиэлэни илигора, сэктэ-пумби дяпагора, Эндурбэ мактачими, дёкчии энүхэни.
- 26 Хэмту найсал маңгади нүлэхэчи, туй тара эндурбэ мактачихачи; нёанчи нүлэй бимэри уңкичи: «Эйниэ бую эрдэңгэ дякасалба ичэхэпу».
- 27 Тэй хамиалани Иисус албамба дяпай найва ичэхэни. Тэй най, Левийди гэрбуку, мэнэ дэңси бэундуи тэсихэни. Иисус нёанчиани уңкини: «Ми хамиалаива энэру!»
- 28 Тэй най-тани, дякаи хэм наңгалара, илихани, туй тара Нёани хамиалани энэхэни.
- 29 Левий дёгдои Иисусэду даи саолимба аңгохани; чаду эгди албамба дяпай гурунсэл гучи нёандиачи гэсэ аоликачи гой найсал бичичи.
- 30 Даңсава сари гурунсэл, фарисейсал пайңканасимари Нёани дахамдисалчиани уңкичи: «Хайгой суэ албамба дяпай гурунсэлди, сороңку гурунсэлди сиарису, омису?»
- 31 Иисус-тэни таодагоми уңкини: «Ая найсал-да окчичи найва гэлэси, энуси найсал-тани гэлэй.
- 32 Ми тоңдо найсалба-да эм хэрсиеми тагои, сороңку найсалба-тани хэрсигуй дичимби».
- 33 Гисурэндуйни гурун-тэни Нёанчиани уңкичи: «Хайми Иоанн дахамдисални чаңкай уликсэвэ сиарасичи, кэсивэ гэлэйчи, гучи даңсава сари найсал-мат кэсивэ гэлэйчи, Си дахамдисалси-тани сиаричи, омичи?»
- 34 Иисус нёанчиачи уңкичи: «Гиамата эриндуэни, асигой багилай наондён бидуэни, мэпи ходиамари тавангой мутэдесу?»
- 35 Аоян анани инисэл исюочиани-мат, нёанчи тэй ини-сэлду мэпи ходиамари тавандярал».
- 36 Туй тара нёанчиачи мода хэсэвэ гисурэхэни: «Уй-дэ писачава сикун тэтуэдиэди хэделигуми горопчи тэтуэчи эчиэ улпигурэ; сикун тэтуэ гудэри, чали-киала сикун тэтуэ писачани горопчи тэтуэчи ачаси.

- ³⁷ Уй-дэ горопчи нантама далиансалчи сикун аракива эчиэ евэрирэ; сикун араки нантама далиансалба гудэлирэ, хэм хээдерэ, нантама далиансал-тани оркинадярал.
- ³⁸ Сикун аракива сикун нантама далиансалчи евэриури. Туй тамы-рагда аракива-да бивэмбури, далиансалба-да гудэ ана нэучиури.
- ³⁹ Уй-дэ, горопчи аракива омира, чадобакисикун аракива гэлэси, туй уми: „Горопчи сикундуй улэн“».

6 паси

- ¹ Эм модан Пасха аня хаамиалани боңго надиачиа иниду Иисус даи тариохан усиндулэ энэлухэни; дахамдисални-тани, балдихан усэсэлбэ ачомари, ңаладоари нилчалымари, сияхачи.
- ² Поани фарисейсал нёанчиачи уңкичи: «Хайгой суэ надиачиа иниду ачаси дякава тайсу?»
- ³ Иисус, нёанчиачи таодагоми, уңкини: «Суэ эчиэ хола-су, хай, хайва Давид тахани, мэнэ гучи нёандиани гэсэ бичин найсал демусидуэри?»
- ⁴ Нёани, Эндур дёкчиани ирэ, чадобакисиами ачасини, тэм Эндур дёңни сондёхан дёңсимдисэлчи-рэгдэ сиягилахачи сугдин эпэнсэлбэ дяпара, сияхани, гучи нёандиани бичин найсалду бухэни».
- ⁵ Нёанчиачи уңкини: «Най Хусэ Пиктэни гучи надиачиа ини-дэ эдени».
- ⁶ Эм модан-тани гой надиачиа иниду Иисус, кэсивэ гэлэури дёкчи ирэ, алосихани. Чаду холгокто аңгиа ңалаку най бичини.
- ⁷ Даңсава сари гурунсэл, фарисейсал Нёанчиани диксучимэри ичэдехэчи. Нёанчи Иисус надиачиа иниду окчичини осини, тэй тургундулэни оркилтойчахачи.
- ⁸ Иисус-тэни, мурумбэчи сами, холгокто аңгиа ңалаку найчи уңкини: «Илиро, токочни ниэру». Нёани, илира, ниэхэни.

- ⁹ Чаду Иисус нёанчиачи уңкини: «Ми сумбивэ мэдэ-сиэмби: „Хайва надиачиа иниду таори – улэмбэ-ну, оркимба-ну? Эргэмбэ хориори-ну, вайчаори-ну?“» Нёанчи хэмэ бичичи.
- ¹⁰ Хэмту найсалчи ичэрэ, тэй найчи уңкини: «Нјалаи зуриру!» Нёани туй тахани, чадо-тол нјалани деуң-гиэ-мэт ая очохани.
- ¹¹ Нёанчи эмуту гориалохачи, туй тара, Иисусэвэ хони таориам, диа диадари хисаңгохачи.
- ¹² Тэй инисэлду Иисус кэсивэ гэлэгуй хурэнчи тохани, чадо долбоа тиап Эндурчи кэсивэ гэлэхэни.
- ¹³ Инучиэни, дахамдисалби хэрсихэни, нёандолачи дёан дюэрбэ сондёра, апостолсалди гэрбиэхэни.
- ¹⁴ Симомба гой гэрбудиэни Пётради гэрбиэхэни, Андрейва нэувэни, Иаковба гучи Иоамба, Филиппава гучи Варфоломейва,
- ¹⁵ Матфейва гучи Фомава, Иаковба, Алфей пиктэвэни гучи Симомба, гой гэрбуни Зилот,
- ¹⁶ Иудава, Иаков пиктэвэни гучи Иуда Кариотаңкамба – тэй чу хаморойдима Иисусэвэ аргалами байгоансалчиани бугудерэ.
- ¹⁷ Нёандиачи эугурэ, Иисус нэен боаду каодярахани. Чаду хэмту дахамдисални гучи Иудеядиади, Иерусалимдиади, Тир гучи Сидон намо кирани боасалдиадии гэрэн гурун бичичи.
- ¹⁸ Нёанчи Иисусэвэ досодягоари, мэнэ энусэлбэри окчичигоани дичичи. Амбаңко эрисэлди эрумбэ бахан найсал-да бичичи. Хэмту найсал аянагохачи.
- ¹⁹ Нёандиадииани кусун ниэми, хэмту найсалба аянагоаңкини, туй тамари гэрэн гурун Иисусэвэ тоңгалайчачачи.
- ²⁰ Нёани, дахамдисалчи ичэгурэ, хисаңгохани: «Эндур далайни эрини кусуни суэңги, туй тамари Эриди синэди гурун кэсику.

- 21 Эси демусини кэсику, тотапиа элэйдирэ; эси соңгой-ни кэсику, тотапиа инэктэлугуйдирэ;
- 22 Суэ кэсикусу, хали найсал сумбивэ чиурсилуйдучи-дэ, пуннэчилуйдучи-дэ, госолайчайдоачи-да, Най Хусэ Пиктэни тургундулэни суэ гэрбувэсу делэнкуди гэрбиэсилуйдучи-дэ.
- 23 Тэй иниду агданасиосу, енуэлэусу: Боа сумбивэ тэң даи суглэмбэ бавандяра. Гэ, Эндурдиэ ундэй найсалди тэй гэрэн гурун аминсалчи туй тай бичичи.
- 24 Суэ-дэ, баян найсал, киסיакосу, туй тами-да суэ мэнэ гудиэмбэри бактахасу.
- 25 Суэ-дэ киסיакосу, эси элэчи найсал, туй тами-да суэ демусидесу. Суэ-дэ киסיакосу, эси инэктэй найсал, туй тами-да суэ-дэ соңгодясу, гучи маңга кэйңэдесу.
- 26 Суэ-дэ киסיакосу, хэмту найсал сумбивэ улэнтумэри хисаңгойдоачи. Гэ, делэнку, Эндурдиэ ундэй найсалди-мат тэй гэрэн гурун аминсалчи туй тай бичичи.
- 27 Сунчи, досодяй найсалчи, ундии: Байгоансалбари улэсиусу, сумбивэ чиурси найсалду улэмбэ таосо.
- 28 Сумбивэ гаксой найсалду улэмбэ гэлэусу, сумбивэ оркилтой найсалду кэсивэ гэлэусу.
- 29 Эмдиэ дэрэгби пайңадахан найва тая дэрэгби пайңадавандо, овой тэтуэвэси ачой найва довой тэтуэи дяпавандо.
- 30 Синдулэ хай-да дякава гэлэй най таондоани буру, синдулэ дяпаханила хамаси эди гэлэгурэ.
- 31 Суэ хони мэнди най тайвани гэлэй осини, найду-да туй-мэт таосу.
- 32 Суэ мэпэри улэси найва улэси осини, сунду хай баниха? Сороңку найсал-да мэпэри улэси гурумбэ улэси.
- 33 Сунду улэмбэ таи найду суэ улэмбэ тайсу осини, хай сунду баниха? Сороңку найсал-да туй-мэт тайчи.
- 34 Наңдоаңкимбари суэ хамаси баогойчайсу осини, хамаси, сунду хай баниха? Сороңку найсал-да сороңку

- найсалду хониа наңдоаңкимбари осини, хониа баогойчил.
- 35 Суэ байгоансалбари улэсиусу, хайва-да эм халачиамари улэмбэ таосу, наңдачивандаосу. Сунду даи айсилан одяра, Даи Эндур хусэ пиктэсэлни одясу; Нёани баниаласи, аяктаку найсалба-да гудиэсини.
- 36 Суэ гудиэси миаванку биусу, эмуту Амимбари-мат.
- 37 Уйвэ-дэ эди дёдясу, сумбивэ-дэ уй-дэ дёдяси; уйвэ-дэ эди оркилтоасу, сумбивэ-дэ уй-дэ оркилтоаси; гудиэсиусу, сумбивэ-дэ гудиэсидерэ.
- 38 Буктэусу, сунду-дэ будерэл: тиас-тиас би, дерини уелэни би, дигдами дялоповохан даолакоди суэ тухичиэсу евэридерэл. Хони би даолакоди даолайсу осини, туй биди-тул сунду даолагодяра».
- 39 Иисус нёанчиани мода хэсэвэ гисурэхэни: «Бали найгой бали найва элгэми мутэй-ну? Дюэтудиэри чоңдочи турэси-ну?»
- 40 Тачиочини алосимдидой уйлэ одаси; улэн тачиочи осини, най таони алосимди-мат оси.
- 41 Хай си кукпукэмбэ андарби насалдоани ичэдейси, мэнэ насалдои-тани вами мова сарасилай?
- 42 Хони андарчий уми мутэйси: „Анда, насалдиадиси кукпукэмбэ агбимбогоива чихало!“ Си мэнэ насалдои би вами мова ичэсилэй. Си дялиңку най! Дюлилэ насалдиади вами мова тоандо, туй тапи-мат андарби насалдиадияни кукпукэмбэ агбимборива садячи.
- 43 Чукин дякава бури улэн мо аба; улэн дякава бури чукин мо-да аба.
- 44 Мо таомбани балди амтакалани, боктолани, чэмэлэни сами мутэури; сэпэрси модиади амтакава тамаваси, гучи поңгодиади муксултэвэ тамаваси.
- 45 Улэн най улэн миавандолаи улэмбэ бури, аяктаку най-да аякта миавандолаи аяктава бури; туй тами миавани дялокпини дякади аңмани унди.

- 46 Хайгой суэ Мимбивэ хэрсису: „Эдемби! Эдемби!“ Ми ундиивэ-тэни тасилари?
- 47 Сунчи ундии: „Минчи пулси, Ми хэсэивэ досодяй, хэсэлэивэ тай най таони эмуту тэй най-мат би:
- 48 ‘Тэй най соҕта чоҕдова хүлэрэ, дёло оялани тэхэвэ нэрэ, дёгба аҕгохани. Далан осидоани, муэ, дёлоду би дё тэхэвэни исипи, туйҕкуми мутэчини.
- 49 Досодяй-тани, хэсэлэи таси най эмуту гой най-мат би: Тэй най тэхэ ана дёгба аҕгохани; муэ дё тэхэвэни исидоани, чаду-баки тухэни, тэй дё бояни маҕга бичин’“».

7 паси

- 1 Нёани, досидяй гурунчи хэм хэсэи хисаҕгоми ходипи, Копернаум хотончи ихэни.
- 2 Эм таҕго чаоха дяҕгиаҕгоми улэсини дэҕсимди элэ бурмулэ энусихэни.
- 3 Иисусэвэ долдира, чаоха дяҕгиаҕгоми Нёанчиани Иудея сагдимдисалбани энэвэҕкини, дэҕсимдивэ окчиндагоани гэлэгуэчи.
- 4 Нёанчи Иисусэчи дидэ, Нёамбани тэдючимэри гэлэхэчи: «Нёани гэбуку най, Си нёандоани чава таро.
- 5 Нёани буэ найпова улэсини, бунду кэсивэ гэлэури дёгба аҕгохани».
- 6 Иисус нёандиачи энэхэни. Нёани дёгба элэ исидоани, чаоха дяҕгиаҕгоани диасилби Нёанчиани уҕгуэчи энэвэҕкини: «Эден! Эди дэҕсирэ! Ми гэбуку най биэсимби, ми дёкчиива эди ирэ!
- 7 Туй тами Синчи дигуи, ми мэпи гэбукуем бодоасимби. Хэсэвэ-рэгдэ унду, дэҕсимдии-дэ аянагодяра.
- 8 Ми-дэ гиандиади сирэҕку най тамби, минду-дэ миндиэди сирэҕку чаохасал бичи, эм найчи „энэру“, – ундиивэ осини, нёани энэй; гой найчи „диду“, – ундиивэ осини, нёани дидэй; дэҕсимдичии „чава таро“, – ундиивэ осини, нёани тай».

- 9 Эйвэ долдипи, Иисус эрдэңгэвэ бахани, туй тара ха-
миалаи энэй гурунчи уңкини: «Сунчи ундэмби: „Ми
Израильду-да эй-мэт агдаорива эчиэ бараи“».
- 10 Гиактамдисал дёкчи дидюпэри, энуси дэңсимди ая
осигохамбани баогохачи.
- 11 Тотапи Иисус Наинди гэрбуку хотончи энэхэни,
Нёандиани дахамдисални, гучи эгди гой найсал энэ-
хэчи.
- 12 Нёани хотон докачиани исидоани, чаду наон эктэ
эмукэн хусэ пиктэни буйкимбэни ниэвухэчи. Эктэди
гэсэ хотондиади эгди найсал энэхэчи.
- 13 Наон эктэвэ ичэрэ, Эден гудиэсими уңкини: «Эди
соңгора».
- 14 Тотапи дидянда, буйкин най диркэчэвэни тоңгалаха-
ни; ирай найсал каодярахачи; Нёани-тани уңкини:
«Наондэан! Синчи ундэмби: „Илигоро“».
- 15 Буйкин най, тэгүрэ, хисаңгоми дэрүхэни, туй тара
Иисус нёамбани эниндуэни бугүхэни.
- 16 Хэмту найсал тэң нэлэхэчи, Эндурбэ гэбултүмэри уң-
кичи: «Эй, гэ, Эндурдиэ ундэй най буэ алдандопова
илигохани, Эндур-тэни Мэнэ найчии дидюхэни».
- 17 Нёани гэбуни мэдэни Иудеява гучи гой боава хэкпэ
мэдэрикпини.
- 18 Иоанн дахамдисални нёамбани чава хэм саваңкичи.
- 19 Иоанн, дюэр дахамдисалби хэрсирэ, Иисусэчи мэдэ-
сигүэчи гиактадихани: «Си дигилэйси-ну, гой найва
халачидяпу-ну?»
- 20 Нёанчи, Иисусэчи дидэ, уңкичи: «Иоанн Сэвэкилэм-
ди бумбивэ Синчи мэдэсигупувэ гиактадихани: „Си
дигилэй найси-ну, гой найва халачидяпу-ну?“»
- 21 Тэй эринду Нёани эгди найсалба энудиэдиэчи, чукин
эрисэлдиэдиэчи окчичихани, эгди бали гурумбэ на-
салди ичэй осиговаңкини.
- 22 Иисус-тэни, нёанчиачи таодагоми уңкини: «Иоаннчи
энүрэ, хайва-да сүэ ичэхэмбэри, долдихамбари, ундусу:

- бали найсал ичэлугуй, дохоло найсал аянагой, оркин укуди энуси гурун гандян осигой, коңго гурун долдигой, буйкин гурун хорагой, гиохатонсал улэн мэдэвэ мэдэричи.
- ²³ Мимбивэ тэргэдэси най кэсику».
- ²⁴ Иоанн гиактамдисални энуйдуэчи, Нёани гэрэн гурунчи Иоанн удэвэни гисурэлухэни: «Суэ хайва ичэндэмэри най ана боачи пулсихэсу? Холгокта хэдунди хэдумбуриvéni-ну?»
- ²⁵ Суэ-дэ хайва ичэндэмэри пулсихэсу? Улэнди тэтуэку найва-ну? Тэй улэн, бобой тэтуэвэ тэчичи найсал эден дёсалдоани балдичи.
- ²⁶ Суэ-дэ хайва ичэндэмэри пулсихэсу? Эндурди ундэй найва-ну? И, сунчи ундии, нёани Эндурдиэ ундэй найдуй-да даи.
- ²⁷ Нёани удэвэни туй нирувухэн би: „Ми Си дэрэлси дюлиэлэни Мэнэ Мэдуңкуи гиактадии Си дюлиэлэси поктогоаси баргигоани“.
- ²⁸ Сунчи ундии: Экэсэл бахандолачи эмун-дэ Эндурдиэ ундэй найсал Иоанн Сэвэкилэмдидуй даи аба. Чу нучидимэ-дэ Эндур далачини эриндуэни нёандуй даи».
- ²⁹ Хэмту Нёамбани досолахан найсал гучи албамба дяпай найсал Эндурбэ мактахачи, тотара Иоанндиади сэвэкилэкпичи.
- ³⁰ Фарисейсал, гучи гиамба сари найсал мэпи Эндур чихалайвани ачаканасимари Иоанндиади эчиэ сэвэкилэчи.
- ³¹ Чаду Эден уңкини: «Тэй хала найсалбани һасори, уйди унэчиури? Нёанчи уй-мэт бичи?»
- ³² Нёанчи, боала тэси пурил-мэт, диа диавари хэрсичи, ундичи: „Буэ сунду пиокианди пиокиачихапу, суэ эчиэ тэптэрэсу; буэ соңгопси дяримба дярихапу, суэ эчиэ соңгоасу“.
- ³³ Иоанн Сэвэкилэмди дичини, эпэмбэ сиараси, аракива омиаси, суэ-тэни ундису: „Нёани долани амбан“.

- 34 Най Хусэ Пиктэни дичини, сиари, оми; суэ ундису:
„Гэ, сияорива, аракива омиорива улэси най дичини,
албамба дяпай найсал, сороңку найсал андарчи“.
- 35 Эндур соңта муруни пурилни тэй мурумбэ тэрэк биди
бодойчи».
- 36 Хавойни-ну фарисейсалдола Иисусэвэ нёандиани гэсэ
сиагой гэлэхэни. Нёани, фарисей дёкчиани ирэ, ак-
паңкини.
- 37 Гэ, тэй хотонду балди сороңку эктэ, Нёани тэй най
дөгдоани бивэни сара, улэн пуңку нутэку пэңсэкувэ
олбиңкини.
- 38 Туй тара Нёани хамиалани бэгдидуэни илира, соңго-
ми бэгдивэни нимоктадии силколохани, дилии нуктэ-
дии хаочими, туй тара бэгдивэни одёктахани, нутэди
модорихани.
- 39 Нёамбани хэрсихэн фарисей, чава ичэми, мэнэ долаи
уңкини: «Нёани Эндурдиэ ундэй най осини, сагилахани,
уй тэй эктэ, хони би эктэ Нёамбани тоңгасини.
Тэй эктэ сороңку».
- 40 Нёанчиани кэчэригурэ, Иисус уңкини: «Симон! Ми
хайва-ну синчи уңкичэмби». Нёани ундини: «Унду,
Алосимди».
- 41 Иисус уңкини: «Эм наңдаванди найду дюэр наңдаку
най бичичи: эмдимэ тойңга таңго мэңгумэ дихава
наңдахани, дюэечиэ – сосива наңдахани.
- 42 Нёанчи бугугуэри диха ана бичичи, туй тами наңдоаң-
кин най наңдавачи ачохани. Унду: хавойдима нёамба-
ни маңга улэсидерэ?»
- 43 Симон уңгухэни: «Мурчии, эгдивэ ачохани». Иисус
нёанчиани уңкини: «Си тэрэк мурчихэси».
- 44 Эктэчи кэчэригурэ, Симончи уңкини: «Си эй эктэвэ
ичэйси-ну? Ми дёкчиаси дичимби, си-тэни бэгдии сил-
когоива-да минду муэвэ эчиэ бурэси, нёани-тани ни-
моктадии бэгдивэ силкохани, нуктэдии хаочихани.

- 45 Си Мимбивэ одёачиси, нёани-тани Ми дичиндиивэ бэгдиивэ одёктами ходиаси.
- 46 Си дилиива симуксэди модориачиси, нёани-тани бэгдиивэ пуңку нутэди модорихани.
- 47 Туй тами синчи ундии: Нёани маңга улэсихэни тургундулэни нёандоани эгди соронсалба ачовори. Уйду-тэни оива ачовори, тэй най ои улэсини».
- 48 Эктэчи-тэни уңкини: «Соросалбаси синдиэди ачовори».
- 49 Нёандиани гэсэ аоликачихан найсал мэнэ долари хисаңголохачи: «Уй дяка хай соронсалба-да ачойни?»
- 50 Нёани-тани эктэчи уңкини: «Си агдаси симбивэ хорихани, номохонди энэру!»

8 паси

- 1 Тэй хамиалани Иисус, хотонсалба, ихонсалба пулси-ми, алосиктахани, гучи Эндур далачини эримбэ саваңкини.
- 2 Нёандиани гэсэ дёан дюэр дахамдисални, гучи бусиэ-сэлдиэди окчичихани экэсэл бичичи: Мария, гой гэрбунни Магдалина, нёандиади надан бусиэ ниэхэчи,
- 3 Гучи Иоанна, Ирод дёңни даламдини Хуза асини, гучи Сусанна, гучи эгди гой-гой экэсэл; нёанчи, дяка-диадиари бурэ, Христосава дэңсихэчи.
- 4 Эгди най поагойдоани, Нёанчиани хотон таондоани балди найсал пулсихэчи. Нёани мода хэсэвэ хисаңголохани:
- 5 «Таримди усэи таригой ниэхэни; таридоани, боңго усэ покто дякпадоани тухэни, туй тара чава такточихачи, гучи чава боа ниэчэнсэлни чокихачи.
- 6 Дюэечиэ усэ дёлоку начи тухэни, урэрэ, муэ ана бими, холгохани.
- 7 Илиачиа усэ сэпэрси поңго токондолани тухэни, тэй поңго урэми чава чихэни.

- 8 Дучиэ усэ улэн начи тухэни, урэрэ, эм таңго сикун усэсэлбэ бухэни». Туй ундэ, морапсиңкини: «Сианқони долдигини!»
- 9 Дахамдисални-тани Нёанчиани мэдэсихэчи: «Тэй мода хэсэ хай дяка?»
- 10 Иисус уңкини: «Суэ Эндур далачини эрин сумэчин-сэлбэни отолису, поани найсал-тани тэм мода хэсэ-сэлбэ саричи; нёанчи ичэмэри ичэси, долдимари отолиаси.
- 11 Тэй мода хэсэ туй би дяка: Усэ – Эндур хэсэни.
- 12 Покто дякпадоани тухэн усэ – досидяй найсал; тотара нёанчиачи амбан дидэ, миавандиадиачи хэсэвэ гадёйни, нёанчи эм агдами тагоачи, мэпэри эм хориамари тагоачи.
- 13 Дёлоку начи тухэн усэ – хэсэвэ долдира, агдамари чихалай найсал; дачан ана бимэри, баң агдара, нёанчи маңгасидоачи хамаси хадандичи.
- 14 Сэпэрсипоңгочи тухэн усэ – хэсэвэ досидяй найсал; нёанчи хадамари тагилаори дякадиари, баян дякадиари, улэси дякадиари чирэкпичи, улэн дякасалба эм бурэмэри, хамаси хадандичи.
- 15 Улэн начи тухэн усэ – хэсэвэ долдира, улэн гандян миавандои тэй хэсэвэ этэхи найсал, нёанчи аличамари улэн дякава буричи». Чава ундэ, морапсиңкини: «Сианқони долдигини!»
- 16 Уй-дэ, лава таора, чава алиоди дасиаси, аори бэун пэгиэлэни нэрэси, ихэн найсал нэгдембэ ичэгуэчи – бай туй нэри.
- 17 Хамача-да аба, хониа мэпи даячахан-да, най ичэгуэчини осигоачин, долаи сумэчиухэн дяка саговачин осигоачин.
- 18 Гэ, хони суэ досидяйвари ичэдеусу; уй хай дякако, тэйниду будерэ, уй дяка ана, тэйнилэ мурчини дякава-да дяпагодяра».

- 19 Иисусэчи Энени, нэусэлни дидэ, эгди най бини тур-
гундулэни дякпачиани лаң димэри мутэчичи.
- 20 Нёамбани саваңкичи: «Симбивэ ичэйчэмэри, Эниси,
нэусэлси боала илисичи».
- 21 Иисус нёанчиачи таодагоми уңкини: «Эндур хэсэвэни
досодяй, Эндур хэсэлэни тай гурунсэл Ми энимби,
Ми нэусэлби».
- 22 Эм иниду Нёани дахамдисалдии огдачи охани, туй та-
ра нёанчиачи уңкини: «Хэвэн багиачиани даогоари».
Туй тара энэлухэчи.
- 23 Даоридоачи, Нёани оңасахани. Хэвэнду пуксин тоңга-
лахани, вата-да огдачиачи ихэни, нёанчи дэңсипсивэ
бахачи.
- 24 Иисусэчи лаң дидэ, сэрумэри, уңкичи: «Алосимди!
Алосимди! Будэйпу!» Нёани-тани, илира, хэдумбэ,
ватава каодяраваңкини, чаду-баки сэлкини, тороң-
гохани.
- 25 Чаду Нёани нёанчиачи уңкини: «Хайду суэ агдасо
бини?» Нёанчи-тани тэң нэлэмэри, мианмари, диа
диадари хисаңгохачи: «Эй уй дяка? Хэдумбэ, ватава
каодяравандай, Нёани хэсэвэни долдичи».
- 26 Нёанчи Галилея бадодоани би Гадарин калтадиачиани
дичичи.
- 27 Иисус сапси кирачиани хулумбучиэни, Нёамбани тэй
хотонду би най бачиалихани. Тэй най балана бусиэ-
сэлку бичин, тэтуэвэ-дэ тэчичиэчини, дэгдо-да балди-
ачини, тэм хэурду-рэгдэ балдихани.
- 28 Нёани, Иисусэвэ ичэпи, морапсиңкини, дюлиэлэни
турэ, даи дилгандии уңкини: «Мимбивэ эди тоңгала-
ра, Иисус, Эндур Увуйдимэ Хусэ Пиктэни, намичам-
би, мимбивэ эди эрулэрэ».
- 29 Туй тами Иисус тэй найдиади бусиэсэлбэ ниэвэңки-
ни; тэй бусиэсэл нёамбани гойдами эрулэхэни; нёам-
бани, уюн бигуэни, этумэри дюлдиэнди, топтоди

- уичэхэчи; нёани, чава лопто гудэлими, бусиэ пуңнэй-
дуэни, най ана боачи энэрэ, бичини.
- 30 Иисус нёанчиани мэдэсихэни: «Си гэрбуси хай?»
Нёани уңкини: «Таңго-таңго»; тусе би бусиэсэл нёани
дочиани ихэчи.
- 31 Нёанчи, пэрэл ана пакчи боачи эди энувэндэм, Иису-
сэвэ гэлэхэчи.
- 32 Чадо-баки хурэн хапоидоани олгиансал даи ёнани оң-
кохани. Бусиэсэл, олгиансалчи игуэри, Нёани чиха-
лайвани гэлэхэчи. Нёани чихалахани.
- 33 Бусиэсэл, найдиади ниэрэ, олгиансалчи ихэчи, ёна
кас би мэгдин кирарадиани, пэйси амоанчи пуйку-
нэсирэ, муэлэңкини.
- 34 Этүмдисэл, чава ичэпэри, хотонду, ихонсалду би гу-
рунчи гисурэгуй тутулухэчи.
- 35 Чава ичэгуй, гэрэн гурун дичичи; Иисусэчи дидэ, бу-
сиэсэлдулэ гэтэгүхэн найва бахачи; нёани тэтуэку,
Иисус бэгдини дякпадоани тэрэ, гал-гал осигохани;
найсал маңга нэлэхэчи.
- 36 Хони-да гориа най ая осихамбани ичэдехэн гурунсэл
нёанчиачи гисурэхэчи.
- 37 Гадаринди лаң би боасалду балди найсал хэм маңгади
нэлэхэчи, тотамари Иисус энуйвэни гэлэхэчи. Нёани,
огдачи огора, даогохани.
- 38 Бусиэсэл ниэхэни най Иисусэди гэсэ бичэхэни.
Иисус-тэни, нёамбани чиндагоми, уңкини:
- 39 «Дёкчий мочогоро, хайва-да Эндур синду тахамбани
гисурэру». Тэй най, хони-да нёандоани Иисус тахам-
бани, тэй хотонду би найсалба аლოსиндами энэхэни.
- 40 Иисус мочогочиани, найсал Нёамбани улэн ачаңкичи,
Нёамбани хэмтудиэри халачихачи.
- 41 Гэ, эм най, Иаирди гэрбуку, дичини, нёани кэсивэ гэл-
лэури дё даламдини бичин. Иисус бэгдичиэни турэ,
Нёамбани дёкчий игуэни гэлэхэни.

- 42 Нёани эм дёан дюэр сэ энусими элэ буди асиа пиктэ-
ку бичини. Иисус-тэни энэйдүэни, эгди найсал Нёан-
чиани гэдэм энэхэчи.
- 43 Эйду, сэкседни ниэуми, дёан дюэр айңанидо энуси эк-
тэ бичини. Нёани дякаи хэм окчичи найсалду манаха-
ни. Уй-дэ нёамбани окчими мутэчини.
- 44 Иисус хаминалани дидэ, тэтуэни элэвэни тоңгалахани.
Чадобакисэ сэкседни хэйни халкини.
- 45 Иисус уңкини: «Уй Мимбивэ тоңгалахани?» Хэмту
най ачаканасидоани, Пётр, гучи Нёандиани гэсэ би гу-
рунсэл уңкини: «Алосимди! Найсал Синчи гэдэм энэхэ-
ни. Си-тэни ундиси, уй Мимбивэ тоңгалаханиам».
- 46 Иисус-тэни уңкини: «Уй-ну Мимбивэ тоңгалахани,
туй тами Ми Миндиэди ниэхэн күсүмбэ сахамби».
- 47 Тэй эктэ, дяями мутэчимби отолира, патарими Нё-
анчиани дичини, дюлиэлэни тухэни. Гэрэн гурун
долдидиачи саванкини, хай тургундулэни Нёамбани
тоңгалахамби, хони чадобакисэ аянагохамби.
- 48 Иисус нёанчиани уңкини: «Хаха бису, асиа пиктэ, си
агданси симбивэ хорихани, номохонди энүру».
- 49 Нёани чава хисангойдоани, уй-ну кэсивэ гэлэури дё
даламдини дёгдиадани дидэ, тэй даламдичи уңкини:
«Си асиа пиктэси буйкини, Алосимдива ебэ анава эди
таванда!»
- 50 Иисус-тэни, чава долдипи, нёанчиани уңкини: «Эди
нэлэрэ, тэм агдами бису, туй хорагодячи».
- 51 Дёкчи дидюпи-тэни, уйвэ-дэ эчиэ ивуэни, тэм Пётр,
Иоанн, Иаков, асиа пиктэ амини, энини ихэчи.
- 52 Хэмту най маңга соңгохачи. Нёани-тани уңкини:
«Эди соңгоасу. Нёани эчиэ будэни, аорини».
- 53 Асиа пиктэ буйкимбэни самари, Нёандиани инэктэ-
хэчи.
- 54 Нёани-тани хэмту найсалба ниэгүвэңкини, асиа пиктэ
нүладоани дяпара, морапсиңкини: «Паталан! Илигоро!»

- 55 Арчокан эргэни мочогохани, чадо-баки илигохани; нёандоани сиягоани Иисус бурусуэм уңкини.
- 56 Амини, энини тэң миаңкичи. Иисус туй осихан дякава уйчи-дэ эди гисурэсуэм, нёанчиачи уңкини.

9 паси

- 1 Дёан дюэр дахамдисалби хэрсигурэ, нёандоачи буси-эсэлбэ оялани гиамба, энусэлбэ окчичиори кусумбэ бухэни.
- 2 Тотара Эндур далачини эримбэ аლოსиктагоачи, энуси найва окчичигоачи энувэңкини.
- 3 Нёанчиачи уңкини: «Хайва-да поктодои эди дяпасу: тунепумбэ-дэ, сомаламба-да, эпэмбэ-дэ, мэңгумбэ-дэ, калаори тэтуэвэ-дэ эди дяпасу.
- 4 Хавой дёкчи ипэри, чадо биусу, таядиади поктолари энусу.
- 5 Сумбивэ ивэндэси дёгба исипари, хотондиади низгуй-дуэри, чадо бэгдидиэдиэри гумухимбэ гуюсу, тэй дёңкамба кэкчэмэри агдолагоари».
- 6 Гэ, исивари боа таондоани улэн мэдэвэ савамари, найва окчичимари, дахамдисал энэмэри гой-гой ихонсалба пулсихэчи.
- 7 Ирод Галилея боани даламдини, Иисус хайва-да хэм туй тахамбани долдипи, асо улэн эчиэ отолиани; чали-киала эмун гурун, Иоанн буйкинди хорагоханиам, мэдэрихэчи,
- 8 Гой гурун – Илия агбиңгоханиам, уңкичи. Поактани-тани Эндурдиэ ундэй гурундулэ эм най буйкинди хорагоханиам, пэргэчихэчи.
- 9 Ирод-тани уңкини: «Ми Иоанн диливани чалихамби. Нёани удэвэни досодяи, тэй уй дяка?» Нёамбани ичэйчэхэни.
- 10 Апостолсал дидюпэри, Иисусэчи хайва-да тахамбари гисурэгүхэчи; туй тара Нёани, апостолсалби

- олбими, Вифсаида хотончиани лаң би, най ана боачи энэхэни.
- 11 Тотам-да найсал, сара, Нёани хамиалани энэхэчи, Иисус, найсалди хопалапи, нёанчиачи Эндур далачини эримбэни гисурэй, окчиорива гэлэй гурумбэ окчи-чай тахани.
- 12 Ини сиксэгупсиңкини. Дёан дюэр апостолсал, Нёанчиани дидэ, уңкичи: «Найсалба чиндагоро, нёанчи дидяла би ихонсалчи, иргэнсэлчи авандагоачи, гучи сиаорива гэлэндэгуэчи; буэ эйду най ана боаду бипу».
- 13 Иисус-тэни нёанчиачи уңкини: «Суэ найсалду сиаорива бурсу». Нёанчи уңкичи: «Бунду тойңга эпэн, дюэр согдата-рагда би; буэ эй хэмту найсалду сиаорива гандамари энэурини-ну?»
- 14 Чаду тойңга миңгандао найсал бичичи. Нёани-тани дахамдисалчии уңкини: «Нёамбачи эм дергиду соси-соси тэвэндусу».
- 15 Түй тахачи, хэм тэвэңкичи.
- 16 Иисус-тэни тойңга эпэмбэ, дюэр согдатава дяпара, боава уйси ичэрэ, кэсигуэчи гэлэхэни, сияптаңгива оболახани, гэрэн гурунду дахамдисалби буктэгуэчи.
- 17 Түй тара сиамари-да хэм элэхэчи; пулэвэни-тэни дёан дюэр сияңсачи тэучигухэчи.
- 18 Эм эринду Нёани най ичэсини боаду кэсивэ гэлэйдүэни, дахамдисални Нёандиани гэсэ бидуэчи, нёанчиачи мэдэсихэни: «Мимбивэ уем найсал мурчичи?»
- 19 Нёанчи таодагомари уңкичи: «Боңгони Иоанн Сэвэкилэмдиэм, гойдимани Илиям, поани эм балана Эндурдиэ ундэй най буйкиндии хорагоханиам».
- 20 Иисус-тэни нёанчиачи мэдэсихэни: «Суэ Мимбивэ уем мурчису?» Пётр таодагохани: «Эндур Христосаниам».
- 21 Нёани-тани нёамбачи масиди паполахани уйчи-дэ чава гисурэсидечи.

- 22 Нёани уңкини: «Най Хусэ Пиктэни маңга бадяра, сагди гурунсэл, Боңго Эндур дёңни дяңгиансални, даңсава сари найсал Нёамбани дёдыярал, вадярал, илиачиа иниду Нёани хорагодяра».
- 23 Хэмтуничи-тэни уңкини: «Уй Ми хамиалаива энэйчэй осини, мэпэри оңбосу, крестаи дяпаосу, Ми хамиалаива энусу.
- 24 Эргэмби этэхичэй гурун, чава хуэдэй; эргэмби Ми тургундулэивэ хуэдэйни, чава этэхи.
- 25 Боа яловани мэңги осивампи, мэпи-тэни ваори, мэпи оркилаори найду хай ебэ?
- 26 Уй-дэ Минди, Ми хэсэдиивэ иламосилой осини, Най Хусэ Пиктэни, мэнэ гэбудии, Амимби, Эндур Мэдуң-кусэлчи гэбудиечи дидюпи, иламосилой.
- 27 Ми сунчи тэрэк ундии: Эйду илисини долани поани би, бурбуриивэ сарами-баки, Эндур далачини эримбэ ичэдерэл».
- 28 Тэй хэсэсэл хамиалани дякпун иниэ бипиэ, Пётрава, Иоамба, Иаковба гадёми, кэсивэ гэлэгуй хурэнчи тохани.
- 29 Кэсивэ гэлэйдүэни, дэрэлни бойкой калахани, тэтуэни чагдян, килтолиан очини.
- 30 Гэ, дюэр хусэ най Моисей гучи Илия Нёандиани гисурэндүхэчи.
- 31 Эндур гэбукуни дипэри, нёанчи Иисус Иерусалимчи энэйгилэйвэни хисаңгохачи.
- 32 Пётр-тани гучи нёандиани гэсэ би найсал аохачи; сэңэгупэри Иисус Эндур гэбукувэ, Нёандиани гэсэ илиси дюэр хусэ найва ичэхэчи.
- 33 Тэй гурун Нёандиадиани энэйдуэчи, Пётр Иисусэчи уңкини: «Алосимди! Эйду бунду улэн; илан дёкамба аңгойпу: эмун – Синду, эмун – Моисейду, эмун – Илияду», – хайва-да сарами хисаңгохани.

- 34 Чава ундидуэни, чагдьян тэвэксэ агбиңкини, нёамбачи паняндии дасихани; тэвэксэчи ипэри, ңэлэхэчи.
- 35 Тэвэксэдиэди дилган бичини: «Тэй Ми Улэсии Хусэ Пиктэй; Нёамбани досодяосу!»
- 36 Тэй дилган биучиэни, Иисус эмучэн дэрэдигүхэни. Нёанчи-да хэмэ бичичи, хайва-да ичэхэмбэри тэй инисэлду уйчи-дэ гисурэчичи.
- 37 Дияя иниду нёанчи хурэндиэди зуридуэчи, эгди найсал Нёамбани бачиалихачи.
- 38 Олокиана уй-ну найсалдола морапсиңкини: «Алосимди! Симбивэ намбочамби: ми эмукэн хусэ пиктэчиивэ ичэру.
- 39 Нёамбани бусиэ дяпакачини, пиктэ-тэни олокиана морапсиңкини. Бусиэ нёамбани эрулэйдуэни, пиктэ аңмалани хоикса агбилойни. Тотапи-мат бусиэ нёамбани силан чиндагойни.
- 40 Ми нёамбани пүннэчигуэчи дахамдисалбаси гэлэхэмби, нёанчи-тани мутэчичи».
- 41 Иисус-тэни, таодагоми, уңкини: «Тэде ана, оркиңку хала! Хай эринчиэни сунди, сумбивэ аличами, бидемби? Хусэ пиктэй эуси олбиндо!»
- 42 Наондэкан дидидуэни-тани, бусиэ нёамбани начи наңгалара, татоами дэрувэңкини; Иисус-тэни бусиэвэ паполахани, наондэкамба хорира, аминдоани бугүхэни.
- 43 Хэмту найсал Эндур даидиани мианкичи. Иисус хайва-да хэм тайдиани хэмту найсал миандидоачи, Нёани дахамдисалчии уңкини:
- 44 «Эй хэсэсэлбэ сиамбари долани нэрусу: Най Хусэ Пиктэвэни най ңалачиани бугудерэл».
- 45 Нёанчи эй хэсэвэ эчиэ отолиачи, тэй хэсэ нёандиadiaчи дасикто бичин, туй тамари нёанчи чава сарачичи; Нёанчиачи тэй хэсэвэ мэдэсиуриwэ ңэлэхэхэчи.
- 46 Нёанчиачи-тани мурун дичини: «Уй нёандолачи даи?»

- 47 Иисус-тэни, миаванчи мурумбэни сами, пиктэвэ дя-
пара, мэнэ дюлиэлэи иливаңкини.
- 48 Нёанчиачи уңкини: «Ми гэрбугуивэ эй пиктэвэ уй
гудиэси осини, Мимбивэ-дэ гудиэси. Уй Мимбивэ
гудиэси осини, тэй Мимбивэ Гиактадиханива гуди-
эси; туй тами уй сундулэ чу нучи, тэй чу даи осидяра».
- 49 Чаду Иоанн уңкини: «Алосимди! Гэрбудиэси бусиэ-
сэлбэ пуңнэчи найва буэ ичэхэпу, бунди пулсиэсини
тургундулэни нёани туй тайвани камалихапу».
- 50 Иисус нёанчиани уңкини: «Эди камалиасу; уй сумби-
вэ оркиласи осини, тэй сунди гэсэ би».
- 51 Иисусэвэ Боачи дяпаори инисэлни исидоачи, Нёани
Иерусалимчи энэйчэлүхэни.
- 52 Мэдэвэ гисурэй найсалба дюлиэлэи гиактадихани; нё-
анчи энэхэчи, Самария ихончиани ихэчи, Нёани дю-
лиэлэни хэм баргигой.
- 53 Иисус Иерусалимчи хэрэлини-мэт бичини тургунду-
лэни, чаду Нёамбани бачиалиорива чихалачичи.
- 54 Чава ичэпэри, дахамдисални Иаков гучи Иоанн уңки-
чи: «Эден! Тава боа уедиэдиэни эугуэни, нёамбачи ва-
гоани, Илия тахани-мат, буэ ундипувэ чихалайси?»
- 55 Нёани-тани, нёанчиачи кэчэригурэ, камалими уңки-
ни: «Суэ хайди-да эрикувэри сарасису.
- 56 Най Хусэ Пиктэни най эргэмбэни эм варами тагои,
хоригои дичини». Нёанчи гой ихончи энэхэчи.
- 57 Нёанчи поктоду бидуэни, уй-ну Нёанчиани уңкини:
«Эден! Ми хамиаласи энэдемби хаоси Си энэй-
си-дэ».
- 58 Иисус нёанчиани уңкини: «Соли еруку, боа ниэчэн-
сэлни омоку, Най Хусэ Пиктэни-рэгдэ дилии хай-
ду-да нэгуи бараси, хай-да ана».
- 59 Гойдиманичи уңкини: «Ми хамиалаива энү». Тавойни
уңгүхэни: «Эден! Дюлилэ амимби хумугуивэ энүэнду».

- ⁶⁰ Иисус-тэни нёанчиани уңкини: «Буйкин гурунсэл буйкинсэлнгуэри хумугичи. Си-тэни энү, Эндур далачини эримбэни улэн мэдэвэ савандо».
- ⁶¹ Гойни-тани уңкини: «Ми, Эден, Си хамиаласи энэдемби. Дюлилэ мимбивэ дёңканчии пэдэм дэрэдигусуэм умбувэндэгуэнду».
- ⁶² Иисус-тэни нёанчиани уңкини: «Уй-дэ, аняду җалаи нэрэ, хамаси ичэктуси, Эндур далачини эриңгудуэни тэдеку биэси».

10 паси

- ¹ Тэй хамиалани Эден гучи надайңго гой дахамдисалба сондёра, нёамбачи Мэнэ дюлиэлэи дюэр-дюэр Мэнэ энэйчэхэмби хотон, бэун таончиани гиактади-хани.
- ² Нёанчиачи уңкини: «Усинду посигори найсал эгди, тай найсал ои; усимбэ посиорива далай Эдембэ нами-чиосу, тай найсалба усимби осигоачи дивэңгуэни.
- ³ Энусу! Ми сумбивэ еңгурсэл алдандоачи би хоникан-салба-мат гиактадиамби.
- ⁴ Суэ далиамба-да, сомаламба-да, отава-да эди дяпасу, уйди-дэ поктоду эди бачигоасо.
- ⁵ Хавой дёкчи ири осини, боңгоду ундусу: „Эй дёгду улэнди, эм сориамари бигичи!“
- ⁶ Чаду нэенди балдиори дяка пиктэни би осини, суэ номохонсу бэуңгуи бадяра, абани осини, сунчи мочо-годяра.
- ⁷ Тэй дёгду дэрэдигусу, чаду би дякасалба сиаросу, оми-осу; дёбойнива дёбохандолани айсилагорива гэлэй. Дёгдиади дёкчи эди пулсиэсу.
- ⁸ Суэ хавой-да хотончи диучиэсу, сумбивэ улэн бачичи осини, сунду буричи сияорива сиаросу.
- ⁹ Чаду энуси гурумбэ окчичиосу, гучи нёанчиачи ундусу: „Эндур далачини эрин сунчи лаң осихани“.

- 10 Суэ хавой-да хотончи диучиэсу, сумбивэ бачиасичи осини, боачи ниэрэ, ундусу:
- 11 „Суэ хотондоасу бунчи лактохан гумухимбэ сунчи хамаси гуигуйпу, туй тами-да саросу: Эндур далачини эрин сунчи лаң осихан, саросу“.
- 12 Сунчи ундэмби: „Тэй осигилай иниду Содом тэй хотондой улэнлэ си“.
- 13 Си-дэ кисиакоси, Хоразин! Си-дэ кисиакоси, Вифсаи-да! Тираду, Сидонду, сунду би-мэт би, кусун агбиңкини осини, нёанчи балана лобакама тэтуэку, пуниктэнду тэсимэри, соромбори дякава вадёчихамбари отолигом-чал, гучи туй эм та тагоари.
- 14 Дёдянду Тир-дэ гучи Сидон-да сундуй улэн осидяра.
- 15 Си, Копернаум, боа учиеэни тохан, амбан боачиани лукту тудечи.
- 16 Сумбивэ досодяй най Мимбивэ досодяй, сумбивэ ачаканаси най Мимбивэ ачаканаси, Мимбивэ ачаканаси най-тани Мимбивэ Гиактамдиханива ачаканаси».
- 17 Надайңго дахамдисал, агданасимари мочогора, уңкичи: «Эден! Бусиэсэл-тэни, гэрбувэси ундидуэпувэ, бумбивэ долдихачи».
- 18 Иисус-тэни нёанчиачи уңкини: «Ми боадиади пэйси агди талини-мат тухэн амбамба ичэхэмби.
- 19 Гэ, Ми сунду туй таори гиамба бурэмби: такточису муйкисэлбэ, гуку колансалба, байгоансал хэмту кусумбэчи. Сумбивэ хай-да оркинди таси.
- 20 Бусиэсэл сумбивэ долдивачи эди агданасиасу, боа уелэни суэ гэрбувэсу нирувухэмбэ агданасиосу».
- 21 Тэй эринду Иисус, эриди агданасира, уңкини: «Боа, на Эдембэни, Симбивэ, Амимби, мактамби. Си чава муруңку найсалдиади дяхаси, оңакасалчи-тани ни хэлихэси. Туй тами, Амимби, Си улэн мурунси туй бичин».

- 22 Дахамдисалчи кэчэригурэ, уңкини: «Ми Амимби Минду хэм дякава бугухэни. Уй Хусэ Пиктэни, уй-дэ сараси, тэм Амими-рагда; уй Амими, уй-дэ сараси, тэм Хусэ Пиктэни-рэгдэ; уйчи Хусэ Пиктэни нихэли-чэйвэни-дэ, уй-дэ сараси».
- 23 Дахамдисалчи кэчэригурэ, нёанчиачи-рагда уңкини: «Хайва суэ ичэйсу ичэй насал кэсику».
- 24 Сунчи ундэмби: Эгди Эндурдиэ ундэй найсал, гучи эденсэл, суэ ичэйвэсу ичэйчэмэри, ичэсичи, суэ долдивасу долдичамари, долдиасичи».
- 25 Гэ, гиамба сари эм най илихани, туй тара Иисусэвэ саичами уңкини: «Алосимди! Эм будэми балдигой, ми хайва таори?»
- 26 Иисус-тэни нёанчиани уңкини: «Моисей гиандоани хони нирувухэн? Хаям холайси?»
- 27 Нёани таодагоми уңкини: «Мэнэ Эден Эндурби миа-вандии, додии, кусундии, мурундии улэсиру, гучи лаң би найва-да мэпи-мэт улэсиру».
- 28 Иисус нёанчиани уңкини: «Си тэрэк таодагохаси; туй таро, эм будэми балдидячи».
- 29 Гиамба сари най-тани, мэпи байта анам бодойчами, Иисусэчи уңкини: «Уй минчи лаң би?»
- 30 Таодагоми, Иисус гисурэхэни: «Эм най Иерусалимди-ади Иерихончи энэйдуэни, нёанчиани човосал хукчу-хэчи. Нёанчи, тэй най тэтуэвэни ачора, нёамбани пуелбичирэ, дюкэн уюмбэни наңгалагора, энухэчи».
- 31 Чаду кэсивэ гэлэури дё эм дяңгиани тэй поктола энэхэни, тэй най, ичэрэ, сиур энэхэни».
- 32 Левий халадиадииани эм най-да тэй боаду бими, лаң дидэ, ичэрэ, сиур энэхэни».
- 33 Эм Самарияңкан-да, нямнями энэми, нёамбани бахани, тотара, ичэпи, гудисихэни».
- 34 Лаң дидэ, пуесэлбэни аракиди силкочими, симуксэди модоричими капсачихани. Нёамбани-да мэнэ эйхэдуи

- тэвэңкини, исиачиори дёкчи гадёхани, нёамбани дэңсихэни.
- 35 Дияя инивэ сусугуйдуи, дюэр мэңгумэ дихава агбимбора, исиачиори дё эдендуэни бухэни, туй тара уңкини: „Нёамбани дэңсиру; эй диха исиасини осини, ми, мочогопи, синду бутудемби“.
- 36 Си хони мурчиси: „Човосал хукчухэни найчи тэй илан гурундулэ уй лаң би?“»
- 37 Нёани уңкини: «Нёамбани бэлэчихэн най». Чаду Иисус нёанчиани уңкини: «Гэ, энү, си-дэ эй-мэт та-хари».
- 38 Дюлэси энэми, Иисус эм ихончи дичини; эйду эм эктэ, Марфади гэрбуку, Нёамбани дёкчии ивухэни.
- 39 Марфа асия нэуни, Марияди гэрбуку, Иисус бэгдини дякпадоани тэрэ, Нёани хэсэвэни досодяхани.
- 40 Марфа-тани даи саолимба баргихани, тотами дидэ, уңкини: «Эден! Ми нэуи мимбивэ эмүчэн дэңсигуивэ дэрэдивэңкини. Синду далди ана-ну? Нёани мимбивэ бэлэчигуэни унду».
- 41 Иисус-тэни нёанчиани таодагоми уңкини: «Марфа, Марфа! Си кэту-дэ дэңсиси, го анадэ эксэчиси.
- 42 Эмумбэ-рэгдэ гэлэй. Мария-тани улэн пасива сондёхани, тэй пасивани нёандиадани эм чими тадырал».

11 паси

- 1 Гэ, эм модан, эм боаду Иисус кэсивэ гэлэхэни. Ходичиани, эм дахамдини Нёанчиани уңкини: «Эден! Бумбивэ-дэ эмуту Иоанн дахамдисалби алосихани-мат, кэсивэ гэлэуриуэ алосиру».
- 2 Нёани дахамдичии уңкини: «Кэсивэ гэлэйдүэри туй ундусу: „Боаду, уйлэ би, Эндур Ама! Гэбукуди гэрбуси бигини. Си боа яловани далачайси эрин исигини! Наду-да, боаду-да Си чихалайси бигини!»
- 3 Ини таондоани сиягопова эпэмбэ бунду буру.

- 4 Буэ оркимпова гудиэсигуру, буэ-дэ оркиңку, наңдаку гурумбэ гудиэсиэпу, буэ мурумпувэ-дэ эди памаванда, хай-да дялимбани, оркимбани эди дяпаванда“».
- 5 Нёанчиачи уңкини: «Уй-дэ диачии, долбо долиндоани дидэ, ундэй осини: „Анда! Илан эпэмбэ наңдади буру.
- 6 Ми диаи горо поктодиади исихани, ми нёандоани хайва-да туигуи барасимби“.
- 7 Тэй най-тани дёгби докиадиани нёанчиани ундерэ: „Мимбивэ эди кочоңгира, уйкэ-дэ якчикто, ми пурилби аори; илими, синду хайва-да буми ми мутэ-симби“.
- 8 Ми сунчи ундэи: нёани, тэрэ, мэнэ бурэсини осини, гэлэми хойлиндаидоани, нёани тэпи, хониа-да гэлэй-вэни будерэ.
- 9 Ми-дэ сунчи ундэи: гэлэусу – сунду будерэл, гэлэмэ-чиусу – баогодясу, дуктэусу – сунду нихэлидерэл.
- 10 Гэ, туй тами гэлэй най таони бари, гэлэмэчи най – баогой, дуктэй найду нихэли.
- 11 Аминдоласу хавойни хусэ пиктэй эпэмбэ гэлэйдуэни, нёандоани дёлова бури? Согдатава гэлэйдуэни, согдата орондолани муйкивэ бури?
- 12 Омоктава гэлэйни осини, гуку коламба бурини-ну?
- 13 Суэ аяктачидоари суглэмбэ пурилдуи бумэри мутэйсу осини, Боа Аминсо-тани гэлэй найсалду Эндур Эри-вэни бури».
- 14 Эм модан Иисус эбэ бусиэвэ пуңнэгүхэни; бусиэ ниэ-гүчиэни, эбэ най хисаңголохани, найсал-тани миаң-кичи.
- 15 Нёандолачи поани ундичи: «Нёани Вельзевулди гэр-буку, бусиэсэл эдени кусундиэни бусиэсэлбэ пуңнэ-гуйни».
- 16 Гой найсал-тани, пэргэмэри, боа уедиэдиэни галоан дякава Нёани ичуэндивэни гэлэхэчи.

- 17 Иисус-тэни, мурумбэчи сами, нёанчиачи уңкини: «Мэнэ дола оболактагохан, соригохан эден хани тани гэун оси, мэнэ дола оболактагохан, соригохан дё тури.
- 18 Амбан мэнэ долаи оболактагохани, соригохани осини, нёани эден хани илиси, хай? Суэ-тэни, Ми Вельзевул кусундиэни бусиэсэлбэ пуңнэчихэмбиэм, ундису.
- 19 Ми Вельзевул кусундиэни бусиэсэлбэ пуңнэчихэмби осини, хүсэ пиктэсэлсу хамача кусундиэни нёамбачи пуңнэчичи? Туй тами нёанчи сунду дёдымдисал оси.
- 20 Ми Эндур чумчуэндиэни бусиэсэлбэ пуңнэи осини, чаду тэде Эндур далачини эрин сунчи исихани.
- 21 Маса лохоңку най дёгби этуридуэни, чаду дякасалдоани дэңсипси ана.
- 22 Чадой маси най, лохоңку найчи хукчурэ, нёамбани дабди осини, чадо-тол, эдени агдачакхани вайчаори хадёмба хэм дяпара, ободаяра.
- 23 Минди биэсини Мимбивэ ачапчи би, Минди тамасини, тэй паичи.
- 24 Бусиэ, найдиэди ниэгупи, чаду муэ ана боава пулсини, няр бичэми, эм барами, ундини: „Ниэхэмби дёкчи мочогодымби“.
- 25 Дидюрэ, чава хаполиохамба, осигохамба баогой.
- 26 Тотопи энэрэ, мэндуи маңгади аяктаку надан бусиэсэлбэ дяпайни. Хэмтудиэри, найчи ирэ, балдичи; тэй найду хаморой ихэни боңгодой оркин».
- 27 Иисус чава хисаңгойдоани, эм эктэ найсалдиэди дайди дилгактоми уңкини: «Симбивэ балдиваңкин хэмдэ кэсику, Симбивэ сиаваңкин кун диликансални кэсику!»
- 28 Нёани-тани уңкини: «Эндур хэсэвэни досодяй, хэсэлэни би найсал кэсику».
- 29 Эгди найсал поагойдоачи, Нёани уми дэрүхэни: «Эй хала дялиңку, нёани галоамба гэлэйни, нёани-тани

- тэй галоамба бараси, тэм Эндурдиэ ундэй най Ионади гэрбуку галоамбани-рагда.
- 30 Хони Иона Ниневијкансалду галоамба бичини, туй-мэт Най Хусэ Пиктэни эй халаду оси.
- 31 Дади калтадиа далачи эден эктэ тэй хала найсалдиани, дёдымба дэруми, нёамбачи оркиладяра; туй тами нёани, Соломон соҗта мурумбэни досидягой, на киррадиадани пулсихэни. Гэ, эйду Соломондуй даини бини.
- 32 Ниневијкансал, эй халади дёдымба дэрумэри нёамбани оркиладярал; нёанчи Иона алосихандиани соромбори дякасалба вадёчихамбари отолигохачи. Гэ, эйду Ионадуй даини бини.
- 33 Уй-дэ, лава таопи, дяяори боаду-да, алио пэгиэлэни нэрэси. Ири найсал нэгдембэ ичэгуэчи, туй нэри.
- 34 Бэе ихэрэни насал; насалси гандян осини, бэеси-дэ хэм нэгден; насалси чукин осини, бэеси-дэ пакчи.
- 35 Туй тами ичэу: синду би нэгден пакчи биэси-ну?
- 36 Бэеси хэм нэгден, эмун-дэ пакчи паси ана осини, хэмту туй нэгден оси, ихэрэ симбивэ килтолианди тавади нэрэкпэндини-мэт».
- 37 Иисус чава ундидуэни, эм фарисей мэнчи сиагоани Нёамбани хэрсихэни, Нёани дидэ, акпаҗкини.
- 38 Нёани сиари дюлиэлэни җалаи эчиэ силкоавани ичэпи, фарисей эрдэҗгэсилухэни.
- 39 Эден-тэни нёанчиани уҗкини: «Эси суэ, фарисейсал, котан, алио боакиа калтавани гандян осивандису, суэ досу арганди, дялинди дялоптахани.
- 40 Суэ мурун ана! Тэйни биэси-ну, боакиа калтава аҗгохани, хавой довани-да аҗгохани.
- 41 Тэй орондолани дякасалдиадари гиохатонсалду буктэусу, чаду сунду хэм гандян оси.
- 42 Суэ кисиако, фарисейсал, туй тамари, нядяхала, солгила дёаячиа пасивани бумэри, Эден дёдымбани,

- улэсивэни-дэ мурчиэчису; эйвэ тагилаори, чава эм наугалами.
- 43 Суэ кисиако, фарисейсал, туй тамари кэсивэ гэлэури дёсалду тэсиуривэ, гэрэн гурун поансалдоани улэн хэсэвэ досодяорива улэсису.
- 44 Суэ кисиако, даңсава сари найсал, фарисейсал, дялиңку гурун, туй тамари суэ даяохан хэурсэл-мэт бису, тэй уелэни-тэни най сарами пулсини-мэт».
- 45 Чаду гиамба сари найсалдола уй-ну Нёанчиани уңкини: «Алосимди! Чава хисаңгоми, Си бумбивэ-дэ аксавандиси».
- 46 Нёани-гани уңкини: «Суэ-дэ кисиако, гиамба сари найсал, суэ найсалба дяпактайсу, уичэйсу, чирэчэйсу, мэнэ-тэни эмун чумчуэндие-дэ нёамбачи тоңгала-сису.
- 47 Суэ кисиако, туй тамари аминадиасу тойңкамба бахан Эндурдиэ ундэй найсалду даи хумунсэлбэ аңгомари.
- 48 Чади суэ аминавари тахани дякасалба агдолайсу, нёандиачи чихалайсу, Аминасу-гани Эндурдиэ ундэй найсалба тойңкамба баваңкичи, суэ-тэни нёандоачи даи хумунсэлбэ аңгойсу.
- 49 Туй тамари Эндур соңта муруни туй би: „Нёанчиачи Эндурдиэ ундэй найсалба, Апостолсалба гиактади-дямби, нёандолачи поавани вадярал, поавани пуңнэгудерэл.
- 50 Боа ялони аңгоптахандианиа хэхэн хэмту Эндурдиэ ундэй найсал сэксени эй халадиади гэлэптэгудерэ.
- 51 Авель сэкседиедизениэ Эндур дёңни, сугдимбэ нэури бэун алдандоани ваохан Захария сэксэчизениэ, тэде сунчи ундэмби, эй халадиади гэлэгумбэ бадяра.
- 52 Суэ кисиако, гиамба сари найсал, мурунди саори, отолиори анакова дяпахасу: мэнэ эчиз ирэсу, ири гурумбэ-тэни кочалихасу.

- 53 Иисус чава хисаңгойдоани, даңсава сари найсал, фарисейсал Нёанчиани масиди хукчумэри, эгди мэдэсинчиэри таодаваңкичи“.
- 54 Нёамбани оркилтогоари, гой-гой хачинди мэдэсимэри, аңмадиадани ниэри хэсэвэни досодяхачи».

12 паси

- 1 Тэй эринду хадова миңган найсал, диа диачиари гэдэм илисимари, поагойдоачи, Иисус боңгоду дахамдисалчи хисаңголохани: «Фарисейсал няикодиачи дэңсиэ биусу, тэй дялиңку дяка.
- 2 Хай-да даячаори дяка, нихэлиптэми, биэси, гой най сарасини дяка-да аба, бипиэ саори.
- 3 Туй тами суэ пакчиду уңкису нэгденду долдиптай, суэ дэгби долани сианчи уңкису, гуичэсэлдиэди морапсиндил.
- 4 Сунчи ундэмби, Ми диасилчи: „Бэевэ вари, туй тара хайва-да тамари мутэси найсалди эди нэлэсу“.
- 5 Туй тами-да, уйди-дэ нэлэуриэ, сунчи ундэмби: „Вами бахамби хамиалани сумбивэ амбан боачиани наңгалами мутэй найди нэлэчиусу“.
- 6 Тойңга нучи ниэчэкэн дюэр гиома дихади ходасимба бари, хай? Эмун-дэ Эндурди оңбоптаси.
- 7 Сунду-тэни дилидоасу-да нуктэсу хэм таоңко. Туй тами эди нэлэчиэсу: суэ эгди нучи ниэчэкэнсэлдуи маңгади ходалосу.
- 8 Ми сунчи ундэмби: „Най таомбани Мимбивэ найсалдола кандёми ундэйвэ, Най Хусэ Пиктэни тэй найва Эндур Мэдуңкусэлдулэни кандёми ундэй.
- 9 Уй найсалдола Миндиэди ачаканаси, нёамбани Эндур Мэдуңкусэлдулэни ачаканасидяра.
- 10 Най Хусэ Пиктэвэни кандёми уңкин най таондоани оркин дякасал ачоптай. Эндур Эрини удэвэни оркинди хисаңгой найду сорон ачоптаси“.

- 11 Сумбивэ кэсивэ гэлэури дёсалчи дяңгиансалчи, гиансалчи олбимбочиачи; хайва-да хони-да таодагорива, хайва-да уңгуривэ эди мурчиэсу.
- 12 Эндур Эрини хайва-да умбуриэ тэй эринду сумбивэ тачиочидяра».
- 13 Найсалдола уй-ну Иисусэчи уңкини: «Алосимди! Ми акчиива унду, амана эниэнэ дякасалбачи минди оболароам-да».
- 14 Иисус-тэни тэй найчи уңкини: «Уй Мимбивэ дёдягоива, суэ доласу оболагоива носохани?»
- 15 Чаду нёанчиачи уңкини: «Ичэусу, эгдивэ гэлэуриэ дэңсисиусу: балдиори го эгдиди дякако биурилэ осиаси».
- 16 Тотара Иисус нёанчиачи мода хэсэвэ гисурэхэни: «Эм баян най усиндуэни эгди хай-да хэм тариохан дяка урэхэни.
- 17 Нёани-тани мэнэ долаи мурчихэни: „Хайва ми таори? Хаоси-да ми балдихан дякава тамагои, бэуңгуи баваси“.
- 18 Уңкини: „Гэ, туй тадымби: тактосалби боячира, даи тактосалба аңгора, хэмту усинду балдихан дякасалба гучи хэм гой дякаи таоси тамагодямби.
- 19 Ми-тэни эргэнчии ундемби: ‘Эргэмби! Эгди дяка эгди айңанидоа синду би, эм эксэчиэми сиаро, омиро, енуэ бису’“.
- 20 Эндур-тэни нёанчиани уңкини: „Мурун анаси! Эй долбо си эргэмбэси дяпадырал; си бэлихэси уйду оси?“
- 21 Бэлиэриниди туй оси, Эндурду баяндасинидо».
- 22 Дахамдисалчии уңкини: «Туй тами сунчи ундэмби, – хайва сияори эргэндуй, хайва тэтури бэедуй – эди дэңсисиэсу.
- 23 Эргэн сияоридой даи, бэе тэтуэдуй даи.
- 24 Холисалчи ичэусу: хайва-да тариасил, посиасил, такто-да анал, Эндур-тэни сиаванди; суэ-тэни ниэчэнсэлдуй маңга улэнсу.

- 25 Уй сундулэ мучхулэми мэпи хониа-да гогдарими мутэй?
- 26 Туй тами чу нучи дякава-хали тами мутэсивэри осини, хайгой гой дякава мучхулэйсу?
- 27 Ичэусу хони балдичи чачакасал: дёбоадасиал, хочиадасиал; сунчи-тэни ундэмби: Соломон-да, гэбуку гучи гучкулику бидуй, туй эчиэ тэчичэрэ, тэй-мэт гучкулиди.
- 28 Эйниэ аодандо би, чимана голдёнчи наңгалаори нядяхава Эндур туй тэтуэндини осини, хайгой суэ мучхулэйсу, оиди агдай гурун! Туй тами суэ эйдуй чу улэн.
- 29 Туй тамари хайва-да сиягой, омигой эди гэлэсу, эди дэңсисиэсу!
- 30 Эй боа ялони Эндурбэ сараси найсални чава хэм гэлэктэй; Суэ Аминсо-тани хайва-да суэ гэлэйвэсу сари.
- 31 Боңгоду Эндур далачини эримбэни гэлэмэчиусу, тэй хэм сунду ноңгиптадяра.
- 32 Нучи ёна, эди нэлэчиэ! Аминсу сунду Эден далайни эримбэни чихалами бухэн.
- 33 Дякасалбари ходасиосу, гиохатонсалду бурусу. Лэптэрэси хукуэңгуэри, боа уелэни оинаси бобой дякагоари баргиосу, таоси чо-да кириаси, пиро-да хайва-да сирааси.
- 34 Туй тами хайду си бобой дякаси, чаду си миаванси осини.
- 35 Суэ омологичасу омолоорива багини, суэ ихэрэсэлсу дегдэгичи.
- 36 Суэ эдемби гиаматадиади мочогойвани халачи найсал-мат биусу, нёани дидюрэ, дуктэйдунэни, чадо-баки нёандоани нихэлигуй.
- 37 Эденчи, дидюрэ, акпаңгоачимбачи баогойни лаодиансал кэсику. Тэде сунчи ундэмби: нёани, омологора, лаодиансалби тэвэндэ, нёанчиачи дидями дэңсилудерэ.

- 38 Нёани дюэе этури эринду дидэ, гучи илиа этури эринду дидэ, хайс аорасивачи баогой осини, тэй лаодиансал кэсику.
- 39 Суэ сарису: хай эринду чово дидивэни дё эдени сари осини, аорамча, дёгби пёгиэдиэдиэни эм хулэ тавамча.
- 40 Суэ-дэ чэк-чэк биусу: мурчиэчису эринду Най Хусэ Пиктэни дидерэ».
- 41 Чаду Пётр Иисусэчи уңкини: «Эден! Бунчи-ну тэй мо-да хэсэвэ ундиси, хэмтуничи-ну?»
- 42 Эден-тэни уңкини: «Уй тэдеку, муруңку дё даламдини? Нёамбани оси эринду эпэн пасивани кэкэсэлду буктэгуэни эдени носохани.
- 43 Эден, дидэ, тэй носовохан найва тэрэк тайвани бари осини, тэй лаодиан кэсику.
- 44 Тэде сунчи ундэмби: хэмту дякаи даламдигоани нёамбани носодяра.
- 45 Тэй лаодиан-тани миавандои уңкини осини: „Ми эдемби тургэн дидюэси“, тотара хусэ, эктэ кэкэсэлбэ тойками дэрури, сиари, оми, соктой осини,
- 46 Нёани халачиасини иниду, мурчиэсини эринду эдени, дидюрэ, нёамбани тойками дэрудерэ, эмуту агдан ана найсалди тай-мат, тадяра.
- 47 Эдемби нёандолачи таорива гэлэйвэни сами, эчиэ чава тагой баргигоа, хайва-да эден хэсэлэни эчиэ та лаодиан эгди модан тойкамба бари.
- 48 Эдемби гэлэйвэни сарами, кэсулиури дякава тахан лаодиан оила тойкамба бари. Эгдивэ бувухэн найла эгдивэ гэлэгури, эгдивэ тавамбори найла эгдивэ мэдэсигури.
- 49 Ми боадиади начи тавава олбиңгой дичимби, тэй дегдэлуйвэни хониа маңга ми гэлэмчэи.
- 50 Ми сэвэкилэуриди сэвэкилэгилэй; Ми халиа тэй дяка осивани маңга халачии.
- 51 Ми начи нэен, сорин ана балдимба бугуи дичимби-ну, суэ мурчису? Аба, сунчи ундэмби: пади-пади осиваңгои.

- 52 Туй тами эвэнки тойңгани дёгду падиладярал; илани дюэнивэ ачапчи, дюэни иланива ачапчи оди.
- 53 Амини хусэ пиктэи ачапчи, хусэ пиктэни амимби ачапчи; энини асиа пиктэи ачапчи, асиа пиктэни энимби ачапчи; эңпэ оромби ачапчи, орони эңпэи ачапчи оди.
- 54 Найсалчи уңкимби-тэни: «Пэрхидиэди дидэй тэвэксэ-вэ ичэй осини, чадобакимби ундусу: „Тугдэдерэ!“ Тотара туй оди.
- 55 Дади хэдун хэдундидуэни, ундусу: „Маңга пэку оси!“ Тотара туй оди.
- 56 Дялиңку найсал! На, боа дэрэлбэни отолимари мутэмэри, хайми эй эримбэ такоасису?
- 57 Хаймари суэ мэнэ тургундулэри хони осигилайвани отолиасису?
- 58 Си байгоандии дяңгианчи энэйдуи, поктоду нёандиандиани хэңгэл осигойчару, дёдыамдичи симбивэ эм олбиами тагоани, дёдыамди-гани симбивэ эрулэй найчи эм бурэми тагоани, эрулэй най-гани симбивэ лаочи эм наңгалами тагоани.
- 59 Синчи ундэмби: хаморой дихава бугуэсилэи, таядиади нэгуэсиси».

13 паси

- 1 Тэй эринду поани найсал дидюмэри Нёанчиани Пилат Галилеяңкансал сэксэвэчи сугдинсэлдиэчи солихамбани гисурэхэчи.
- 2 Чаду Иисус нёанчиачи уңкини: «Тэй Галилеяңкансал, хэмту гой Галилеяңкансалдуй сороңку бимэри, тамача эрумбэ бахамбачи мурчису-ну?
- 3 Аба, сунчи ундэмби; соромби ачаканасиаси осини-гани, хэмтудиэри эй-мэт будесу.
- 4 Силоам тора-мат, гогда дёлома дё турэни, дёан дякпун найсалба вахани. Тэй найсал Иерусалимду хэмту балди найсалдуй оркиңку би-нум мурчису-ну?

- 5 Аба, сунчи ундэмби; соромби ачаканасиаси осини-тани, хэмтудиэри эй-мэт будесу».
- 6 Тамача мода хэсэвэ гисурэхэни: «Уйду-ну муксултэ урэйни боаду тариохан амтакаку мо би. Амтакава тамагой дидэ, бараси.
- 7 Тэй боаду дёбомдичи уңкини: „Илиа айңанидо тэй моду амтакава тамагой дидэ, барасимби. Мова чапчиу, бай нава манайни“.
- 8 Нёани-тани, нёанчиани таодагоми, уңкини: „Эден, эй айңанидо чава солотору; ми-тэни чава кэндэли хумудемби, удин амондиани кэндэли нэдемби.
- 9 Амтака урэй-ну, саваси; аба осини, дияя айңанидо чапчиосу“».
- 10 Эм кэсивэ гэлэури дёгду надиачиа иниду Нёани ало-сиктахани.
- 11 Чаду дёан дякпун айңанива экэчин бусиэди энуси эктэ бичин; нёани мукчурэм би, кас илими мутэси.
- 12 Иисус, нёамбани ичэпи, хэрсирэ, нёанчиани уңкини: «Эктэ! Си энуси лоптоагини».
- 13 Нёандоани ңалаи нэхэни, нёани-тани, чадо-баки кас илими, Эндурбэ макталохани.
- 14 Кэсивэ гэлэури дё даламдини, Иисус надиачиа иниду окчичидиани аяктачими, гурунсэлчи уңкини: «Хайва-да тагилаори нюңгун ини би, тэй инисэлду, надиачиа иниду эм дидэ, окчичиндамари дидусу».
- 15 Эден нёанчиани таодагоми уңкини: «Дялиңку найсал! Сундулэ най таони надиачиа иниду хусэ ихамби, эйхэй омиваңгой отондиади уичэвэчи ачоаси-ну?»
- 16 Эй Авраам асиа пиктэни дёан дякпун айңанива амбанди уичэку бичин; тэй уичэвэ надиачиа иниду ачорини-ну, хай?»
- 17 Нёани-тани чава ундидуэни, Нёамбани ачапчи би гурунсэл иладихачи; хэмту найсал Нёани гэбуку дяка-салчиани агданасихачи.

- 18 Нёани-тани уңкини: «Эндур далачини эрин хай дяка-мат би, чава хай дякади ундэчимби?
- 19 Тэй усэкэн-мэт би; най чава дяпара, усиндуи тарихани; тэй урэхэн даи мо осихани; мо гарадоани боа ниэчэнсэл сиричихачи».
- 20 Гучи уңкини: «Эндур далачини эримбэ хай дякади ундэчимби?
- 21 Тэй няико-мат би; эктэ, чава дяпара, опа илан даолакодоани нэхэни, хэм няигодала».
- 22 Нёани-тани хотонсалба, ихонсалба пулсими, алосиктами Иерусалимчи поктола энэхэни.
- 23 Уй-ну Нёанчиани уңкини: «Эден! Хорай найсал ои-ну, хай?» Нёани-тани нёанчиачи уңкини:
- 24 «Чидён уйкэлэ иричэусу, туй тами сунчи ундэмби, эгди найсал игуй ичэдедерэл, туй тамари мутэсидерэл.
- 25 Дё эдени илими уйкэвэ дасидоани, чаду суэ, боала бимэри, уйкэвэ дуктэдесу, умэри: „Эден! Эден! Бунду нихэлиусу“. Нёани-тани сунчи таодагоми ундерэ: „Ми сумбивэ такоасимби, хаядиади дичимбэсу, сарасимби“.
- 26 Чаду хисаңгодолясу: „Буэ Си дюлиэлэси сияхапу, омихапу, буэ гиансалпова Си алосиктахаси“.
- 27 Нёани-тани ундерэ: „Ми сумбивэ такоасимби, хаядиади дичимбэсу, сарасимби, Миндиэди хаңгиси энусу, хэмту гэде анава тай гурун“.
- 28 Эндур далачини эринду Авраамба, Исаакба, Иаковба, хэмту Эндурдиэ ундэй найсалба, мэпи-дэ пуңнэчивэни ичэйдуэри, чаду соңгодясу, хуктэдиэри пикоридясу.
- 29 Сиун дэгдэйни калтадиади, пэрхидиэди, очидиади, дадидиади найсал дидерэл, Эндур далачини эринду акпандярал.
- 30 Гэ, чадо би хаморойни боңгони оси, чадо би боңгони хаморойни оси».

- 31 Тэй иниду фарисейсалдолани поани дидэ, Нёанчиани уңкини: «Ниэгу, эдизэди энэу, туй тами Ирод Симбивэ вайчайни».
- 32 Нёанчиани уңкини: «Энэмэри тэй соликанчи ундусу: Гэ, эйнивэ, чимана бусиэсэлбэ пуннэмби, найва окчичиамби, илиачиа иниду ходидямби.
- 33 Тэде, Ми эйнивэ, чимана, гучи дияя иниду пулсигилэй, туй тами Эндурдиэ ундэй най Иерусалим боакиалани бурии мутэси.
- 34 Иерусалим, Иерусалим, си хотоңкансалси Эндурдиэ ундэй найсалба тойңкачичи, синчи гиактадисалба дёлди наңгачичи! Ми хадэ модан пиктэнэвэси гаса-мат пиктэнэй мэнэ хасарби пэгиэчиэни поагорива мурчичэмби, суэ-тэни эчиэ чихаласу.
- 35 Гэ, дёксу сунду гэун дэрэдини. Сунчи ундэмби: Суэ Мимбивэ ичэсису эрин исидала, суэ умбучиэсу: „Эден гэрбудуэни Дидэй гэбуку“».

14 паси

- 1 Эм модан Нёани надиачиа иниду фарисей дяңгиансалдолачи эм най дёкчиани сиягой дичини, дяңгиансал Нёамбани ичэдехэчи.
- 2 Гэ, Нёани дюлиэлэни муэ энудиэни эрулэмбэ бари най илихани.
- 3 Тэй моданду Иисус гиамба сари найсалчи, фарисейсалчи мэдэсихэни: «Надиачиа иниду окчичими мутэури-ну?»
- 4 Нёанчи хэмэ бичичи. Иисус энукэ найва тоңгалара, аянаговаңкини, чиндагохани.
- 5 Чаду нёанчиачи уңкини: «Сундулэ уйду-дэ эйхэңгуни, хусэ ихаңгони хочинчи тухэн осини, тэй эринду-тул надиачиа иниду-тул нёамбачи таядиа татагоасису-ну, хай?»
- 6 Чаду Нёанчиани хайва-да уңгумэри мутэчичи.

- 7 Хони-да хэрсиухэн найсал боңго бэумбэ сондөйвачи ичэми, нёанчиачи мода хэсэвэ гисурэхэни:
- 8 «Уй-дэ хали-да симбивэ гиаматачи хэрсидуэни, боңго бэунду эди тэрэ, хэрсихэн найсалдола уй-дэ синдуй гэбуку бимчэ,
- 9 Симбивэ, нёамбани хэрсихэн най дидэ, синчи ундерэ: „Бэумби нёандоани бугу“. Чадо си иладими хаморой бэунду тэгудечи.
- 10 Симбивэ хэрсидуэчи, дидэ, хаморой бэунду тэру, симбивэ хэрсихэн най дидэ, синчи уңгуэни: „Анда! Дюлэ-си тэру“. Чадо си тэси найсалдола гэбуку осидячи.
- 11 Туй там найдой мэпи уйлэ мурчини таони гэбуни тудерэ; найдой-тани пэгилэ мурчи най гэбуни тодыра».
- 12 Нёамбани хэрсихэничи-тэни уңкини: «Си ини токондоани сиаори эркимбэ, сиксэ сиаори эркимбэ баргидоаси, андарби, аңнаи, ахондосалби, баян нимэкэнсэлби эди хэрсирэ, тэй орондолани нёанчи симбивэ хэрсихэчи-мэт, тотара си банихава бадячи.
- 13 Саолимба аңгойдоаси, гиохатонсалба, дохолосалба, балисалба корхидиңку гурунсэлбэ хэрсу.
- 14 Чаду си кэсику осидячи, туй там нёанчи синду бугуми мутэсил, синду-тэни тоңдо найсал хорагойдоари, хэм бугудерэл».
- 15 Чава долдира, дякпадоани аори уй-ну Нёанчиани уңкини: «Уй Эндур далачини эринду эпэмбэ сиари осини, тамача най кэсику бидерэ».
- 16 Таду Иисус нёанчиани уңкини: «Эмун най даи саолимба сиксэ аңгохани, туй тара эгди найва гэлэхэни.
- 17 Сиксэ, сиаори эрин исидоани, элчиңгуи гиактадихани гэлэури найсалчи уңгуэни: „Дидусу, хэм чэк баргиохан“.
- 18 Чаду хэмту най, эмуту кэвэлихэн-мэт, осисилохачи. Боңго най нёанчиани уңкини: „Ми нагои гачимби, чава ичэндэуриvé гэлэй. Си минчи эди оркисира“.

- 19 Дюэе най уңкини: „Ми тойңга будэр хүсэ ихансалба гачимби, эси нёамбачи пэргэчиндэгуэмби, минчи эди оркисира“.
- 20 Илиачиа най уңкини: „Ми асигой бахамби, туй тами энэми мутэсимби“.
- 21 Тэй элчи мочогопи, эденчии чава гисурэгүхэни. Чаду дё эдени аякталара, элчичии уңкини: „Си тургэнди даи, нучи хотон гиандолани энэру, туй тара гиохатон, бали, дохоло, корхидиңку гурумбэ эуси гадёро“.
- 22 Элчи уңкини: „Эден! Си уңкиндүлэси ми хэм тахамби, туй тами-да гучи бэунсэл би“.
- 23 Эден элчичии уңкини: „Хачин поктосалчи, гучи хотон докиачиани энэру, найсалба дигүэчи тэдевэнду, ми дёгби дялоптагоани.
- 24 Сунчи ундэмби: тэй гэлэүхэн найсалдола уй-дэ ми саолимбива пэргэсил; гэлэүхэн найсал эгди-дэ, бодори найсал ой“».
- 25 Иисусэди гэсэ эгди гурунсэл энэхэчи; Нёани кэчэригурэ, нёанчиачи уңкини:
- 26 «Уй-дэ Минчи диди осини, амимби-да, энимби-дэ, асии-да, пурилби-дэ, аңнаи-да, эйкэнэи-дэ, балди эргэмби-дэ эм чиурисиэ тагоани, Ми дахамдии одаси.
- 27 Крестаи эм олбиндами, Ми хамиалаи энэси най, тэй най Ми дахамдии одаси.
- 28 Туй тами сундүлэ уй тора-мат гогда дёлома дёгба аңгойчами, тэй дюлиэлэни тэрэси, ходавани таондаси, хай-да хэм чава аңгори дяка бини-нум,
- 29 Туй тами тэхэвэни нэрэ, ходидала аңгоми мутэси, чава хэм ичэхэн гурунсэл нёандиани инэктэси осидяра,
- 30 Умэри: „Тэй най аңгойчами дэрүхэн, аңгоми ходиачин“.

- 31 Гэ, хамача эден-ну гой эденди чаохарагой, тэй дюлиэ-
лэй боңгоду улэн гисурэндугуй тэрэси: нёани дёан
миңган найди чаохако гой эдендуй хорин миңгаңко-
нидуй маси-ну?
- 32 Чаду, тэй эден горола бидуэни, нёанчиани гиактамди-
салба сори анава гэлэми энэвэнди.
- 33 Туй тами сундулэ най таони мэнэ дякасалдии ачака-
насиаси осини, тэй най Ми дахамдии одаси.
- 34 Даосун – улэн дяка; даосун кусумби хуэдэй осини, хо-
ни тагори?
- 35 Надо-да, удин амондоани-да ачаси, чава боачи наңга-
лаори. Сиаңкони долдигини».

15 паси

- 1 Хэмту албамба дяпай найсал, сороңку найсал Иисусэ-
вэ досодягой лаң дичил.
- 2 Фарисейсал, даңсава сари найсал даңсичимари уңки-
чи: «Нёани, сороңку гурумбэ бачиалими, нёандиачи
сиарини».
- 3 Нёани-тани нёанчиачи туй мода хэсэвэ уңкини:
- 4 «Сундулэ уй эм таңгоди хоникони, эмумбэ хуэдэпи,
хуюйңгу хуюмбэ най ана боаду дэрэдивэндэси, хуэ-
дэкпин хонимба баогодала гэлэмэчигуэси?
- 5 Баогопи, агданасими чава муйрэдуи нэдерэ.
- 6 Дёкчии дидюпи, андарби, нимэкэнсэлби хэрсирэ, нё-
анчиачи ундерэ: „Хуэдэкпин хонимба баогохамбива
минди гэсэ агданасиосу“.
- 7 Сунчи ундэмби: Эндур далачини эриндуэни хуюйңгу
хуюн соромба ачаканасиорива гэлэси тоңдо найди
агдапси ои, эм соромби ачаканаси сороңку найди аг-
дапси маңга.
- 8 Хамача эктэ дёанди дихако, эмумбэ хуэдэпи, лава
таvasи, гиалакова хаполиаси, диксучими баогодала
гэлэгуэси?

- ⁹ Баогопи, андарби, ектэ нимэкэнсэлби хэрсирэ, ундерэ: „Минди гэсэ агданасиосу, ми хуэдэхэмби дихава баогохамби“.
- ¹⁰ Сунчи ундии, туй Эндур Мэдуңкусэл соромба ачаканаси эмун сороңку найди-да агданаси».
- ¹¹ Гучи уңкини: «Эм найду дюэр хусэ пиктэни бичини.
- ¹² Нэудимэ аминчии уңкини: „Ама! Дякалаи ми обоива минду буру“. Аминчи нёандоачи хадёндолои болахани.
- ¹³ Эм хадова инивэ бипиэ, нэудимэ, обои хэм дяпара, горо боачи энухэни, чаду, го анадии балдими, мэнэ дякаи паичихани.
- ¹⁴ Нёани хэм дякаи паичиочииани, тэй боаду маңга хади осихани, нёани синэдилухэни.
- ¹⁵ Туй тара тэй боаду би найчи дёбоңгои гэлэндэхэни, тэй най мэнэ усинсэлдуи гоар оңкоми пулси олгиансалби этундэвэңкини.
- ¹⁶ Нёани олгиансал сиаричи даломба сияорива-да аясихани, туй тамии-да уй-дэ нёандоани чава-да эчиэ бурэни.
- ¹⁷ Улэнди мурчигурэ, мэнчии уңкини: „Ми аминдоива хониа эгди лаодиансал эпэмбэ элэдэлэ сиаричи, ми-тэни демуди отоамби.
- ¹⁸ Илира, аминчии энэдемби, нёанчиани ундемби: ‘Ама! Ми синду гучи Эндурду оркиңкои.
- ¹⁹ Туй тамии мимбивэ хусэ пиктэем гэрбиэсиси ачаси, мимбивэ мэнчии лаодиангои дяпагоро’“.
- ²⁰ Илира, аминчии энэхэни. Нёани хайс горола бидуэни, амини ичэпи, гудиэсихэни; пагдиалара, нёани моңгондолани наманда, одёктахани.
- ²¹ Хусэ пиктэни нёанчиани уңкини: „Ама! Ми синду гучи Эндурду оркиңкои, мимбивэ хусэ пиктэем гэрбиэсиси ачаси“.

- 22 Амини лаодиансалчии уңкини: „Чу улэн тэтуэсэлбэ гадёсо, нёамбани тэтувэндусу, хоньякамба бурусу, отава бэгдидуэни оталавандосо.
- 23 Нучи буйгу ихакамба гадёра, варосо. Буэ сиари, енуэлэй тадяпу.
- 24 Тотами эй пиктэи, будэ, хорагохани, хуэдэптэрэ, агбиңгохани“. Гэ, туй тара енуэлэмэри дэрүхэчи.
- 25 Агдима-тани усинду бичини; мочогойдои, дёкчии дидямпии, дяринсалба, енуэлэури дилгансалба долдихани.
- 26 Эм элчивэ хэрсирэ, мэдэсихэни: „Эй хай дяка?“
- 27 Элчи нёанчиани уңкини: „Си нэуси дидюхэни, нёамбани аяди баогопи, амиси нучи буйгу ихакамба вахани“.
- 28 Агдима аякталахани, игуриуэ чихалачини. Амини-тани, ниэрэ, нёамбани хэрсихэни.
- 29 Нёани аминчии таодагоми уңкини: „Гэ, ми айңасими синду дэңсехэмби, хали-да хаңгиактоласи эчиэ таи, си-тэни ми диасилдии енуэлэгуивэ хали-да минду имакамба-да эчиэ бурэси.
- 30 Эси-тэни эй хусэ пиктэси, паңно экэсэлди дякаи манара, дидючиэни, си нёандоани нучи буйгу ихакамба вахаси“.
- 31 Амини-тани нёанчиани уңкини: „Ам пиктэ! Си тул-тул минди биси, ми хэмту дякаи – сиңги.
- 32 Эси тэң агданаси, енуэлэй тайваси гэлэй: си нэуси, будэ, хорагохани, хуэдэптэрэ агбиңгохани“».

16 паси

- 1 Дахамдисалчии-тани уңкини: «Эм баян найду даламди би; уй-ну тэй найчиани даламди дякавани паичивани гисурэхэни.
- 2 Даламдивани хэрсирэ, нёанчиани уңкини: „Хайва си удэвэси ми досодямби? Хони-да далаи гисурэру, туй тами эвэңки си далачими мутэсиси“.

- 3 Чаду даламдини мэнэ долаи уңкини: „Хайва таори? Эдемби миндиэди дэгба далаорива дяпагойни; хулэми мутэсимби, намбочами иламо.
- 4 Миндиэди дэгба далаорива дяпагойдоани, хайва-да таорива гой найсал дёкчиари дяпагойгоачи, сарамби“.
- 5 Эдемби наңдаку найсалбани пади-пади хэрсирэ, боңгоничи уңкини: „Эдендуивэ си наңдаси хониа би?“
- 6 Нёани уңкини: „Эм таңго даолако симуксэвэ“. Нёанчиани уңкини: „Ниручэи дяпара, тэрэ, тургэн ниру: соси“.
- 7 Тотара гойдимачи уңкини: „Си наңдаси хониа би?“ Нёани таодагохани: „Эм таңго даолако ира“. Нёанчиани уңкини: „Ниручэи дяпара, ниру: дякпойңго“.
- 8 Эден аргаңку даламдии намбохандолани мактахани; туй тамари эй эрин хусэ пиктэсэлни тэй халадола боа ялони хусэ пиктэсэлдуй намбосо.
- 9 Ми сунчи ундэмби: тоңдо ана бимэри, баяңкин гурундулэ андаргоари баросу; туй тамари сунду хади осочиани, сумбивэ тул-тул би дёсалчи дяпагогоачи.
- 10 Нучи дякаду агдай най, эгдиду-дэ тэй-мэт агдай; нучиду агдасини, даидо-да тэй-мэт агдаси.
- 11 Гэ, тоңдо анади бими баохан дякасалду агдавасиди бичису осини, уй сунду тэде дякасалба агдай.
- 12 Гой найңги дякасалду агдавасиди бичису осини, уй сунду суэңгивэ бугуй?
- 13 Хавой-да дэңсимди дюэр эденду дэңсими мутэси, туй тами эмдимэвэ чиурси оси, гойदिмава улэси оси-ну; эмдимэду улэн таи оси, гойдимаду хайва-да таси оси-ну. Эм эркивэ Эндурду, гучи бобой дякасалду дэңсими ачаси».
- 14 Чава хэм досодямари, мэңгумбэ улэси фарисейсал Нёандиани инэктэхэчи.

- 15 Иисус нёанчиачи уңкини: «Суэ тоңдо найсал-мат мэлэри гэрэн гурунду ичуэндису. Эндур-тэни суэ миавансалбасу сари, туй тами хай найсалду бобой, Эндур долани маңга чукин.
- 16 Гиан гучи Эндурдиэ ундэй найсал Иоаннча; эвэңки Эндур далачини эримбэ улэн мэдэвэ саванди, уй-дэ хэм таоси маңгачими ири.
- 17 Боңгоду боа, на ходиптадяра, туй тами-мат эм яоча гиандиади хуэдэпчини.
- 18 Най таони асидии падилагой, гой эктэди асилагой маңга хоанди; най таони падилагой эктэди асилагой маңга хоанди.
- 19 Эм баян най тэң бобой тэтуэвэ тэчичэхэни, ини таондоани даи саолимба аңгохани.
- 20 Эм гиохатон най, Лазарьди гэрбуку, тэй баян най докани дякпадоани укуди энусими аохани.
- 21 Нёани баян найсал дэрэдиэдиэчи тури пуртусэлди элэйчэхэни, индасал-тани, дидэ, укувэни илэчихэчи.
- 22 Гиохатон буйкини, тотара Мэдуңкусэл нёамбани Авраам тухичиэни олбиңкичи; баян най-да буйкин, нёамбани хумухэчи.
- 23 Амбан боаду бими, эрулэуми, нёани уйси ичэхэни, горола Авраамава, Лазарьба тухидуэни ичэгухэни.
- 24 Морами уңкини: „Амимби Авраам! Мимбивэ гудиэсиру, Лазарьба гиактадиру, нёани чумчуэмби дуэвэни муэду чакпаңгоани, чаду ми сиңмуивэ гао тагоани, ми-тэни таваду эрумбэ барии“.
- 25 Авраам-тани уңкини: „Пиктэ! Си мэнэ балдидои улэмбэ элэдэлэ бахаси, Лазарь-тани оркимба бахаси; эси-тэни нёани эйду улэн би, си-тэни эрумбэ бари.
- 26 Тэй оячиани суэ, буэ алдандопова даи пэрэл ана боа би; сунчи даогочайни мутэси, туй-дэ таядиади-да бунчи даогоаси“.

- 27 Чаду баян най уңкини: „Амимби! Синчи гэлэмби, ми амимби дёкчиани нёамбани энунду.
- 28 Минду тойнга хусэ нэу би; нёанчи эй эрулэй боачи эм димэри тагоачи нёанчиачи агдолами уңгини“.
- 29 Авраам нёанчиани уңкини: „Нёандоачи Моисей гучи Эндурдиэ ундэй найсал бичи, нёамбачи досидигичи“.
- 30 Нёани-тани уңкини: „Аба, амимби Авраам! Буйкин гурундулэ уй-дэ нёанчиачи диди осини, соромби ачаканасидярал“.
- 31 Чаду Авраам нёанчиани уңкини: „Моисейва, Эндурдиэ ундэй найсалба долдиасил осини, чаду, уй буйкин гурундулэ хорагой-да, агдасил“».

17 паси

- 1 Иисус дахамдисалчи гучи уңкини: «Пэргэли дякасал эм дидэмэ мутэсил; най тургундулэни тэй дякасал диди кисиако.
- 2 Най моңгончиани худирэку дёловани уирэ, намочи наңгалаори – улэн дяка, тэй най нучидимэ найсалдола эмумбэ арганахани осини – оркин.
- 3 Мэпэри диксучими ичэусу. Акси симбивэ ачапчи сороңку дякава тахан осини, даңсиу, соромби ачаканасини осини, нёамбани гудиэсису.
- 4 Надан модан эм иниду симбивэ ачапчи сороңку дякава тахан осини, туй тара надан эм иниду синчи соромби ачаканасимбиам уңкини осини, нёамбани гудиэсигуру».
- 5 Апостолсал-тани Эденчии уңкини: «Буэ агдачигопова эгдириу».
- 6 Эден уңкини: «Ираи усэни-мэт суэ агдайсу бичин осини, эй амтакаку мочи надиади ниэрэ, намочи мэпи таригоам уңкису осини, тэй мо сумбивэ долдимча.

- 7 Нёандолани уй андялай-ну, оңкованди-ну лаодиаңку, тэй лаодиан усиндиэди мочогохан хаминалани нёанчиани унди: „Тургэнди дэрэчи тэндэсу?“
- 8 Тэй орондолани нёанчиани ундэси-ну: „Ми сиксэ эринду сиягоива баргиру омолагора, мимбивэ дэңсису ми сиариива, омиива, туй тапи мэнэ сиаро, омиро?“
- 9 Лаодиан уңкиндолани тахани тургундулэни нёамбани баниала-ну? Ми мурчиэсимби.
- 10 Суэ-дэ туй-мэт, най уңкимбэни хэм тапари, ундусу: „Буэ таман-да ана лаодиансал, туй тамари хайва-да тагилахамбари-рагда тахапу“».
- 11 Иерусалимчи энэйдүэи, Нёани Самария, Галилея алдамбачи энэхэни.
- 12 Нёани эм ихончи иридуэни, дёан чуки укуди энуси найсал Нёамбани бачихачи; нёанчи горола илихачи.
- 13 Даи дилгандиари хисаңгохачи: «Иисус Алосимди, бумбивэ гудиэсиу!»
- 14 Нёамбачи ичэпи, Нёани нёанчиачи уңкини: «Энусу, кэсивэ гэлэури дёсал дяңгиансалчи мэпэри ичэвэндусу». Нёанчи энэйдүэри гандян осихачи.
- 15 Нёандолачи эмуни, аянагохамби ичэрэ, мочогохани, даи дилгандии Эндурбэ мактами.
- 16 Нёани Нёани бэгдичиэни дэрэлдии начи тухэни, Нёамбани баниалами; тэй най-тани Самарияңкан бичини.
- 17 Чаду Иисус уңкини: «Хэм дёандиари гандян осихан биэси, хай? Хуюн най хайду бини?»
- 18 Хайми нёанчи эчиэ мочогоачи, Эндурбэ гэбулэгуэри, тэм эй гой голо найни-рагда?»
- 19 Нёани-тани нёанчиани уңкини: «Илиго, энү, си агдайси симбивэ хоригохани».
- 20 Фарисейсал хали Эндур далачини эрин исигоям Нёамбани мэдэсидуэни, нёанчиачи таодагохани: «Эндур далачини эрин ичэвэси эрдэнди дидэй».

- 21 Ундэсил: „Гэ, туй би-ну, гэ, таду би-ну“. Туй тами, гэ, Эндур далачини эрин суэ доласу би».
- 22 Дахамдисалчи уңкини: «Инисэл исидярал, таду суэ тэм эм иниду-рэгдэ Най Хусэ Пиктэвэни ичэйчэйдүэри, ичэсису.
- 23 Сунчи ундерэл: „Гэ, эйду би-ну, гэ, таду би-ну“. Суэ эди пулсиэсу, эди дахасу.
- 24 Туй тами эмуту эм боа кирадиадани потар тами, гой боа кирачиани килтоли анди агди гирмэчини-мэт, Най Хусэ Пиктэни Мэнэ инидуи туй-мэт тай.
- 25 Тэй дюлиэлэни Нёани маңга эрумбэ багилайни, эй хала Нёамбани пуңнэгилэйни.
- 26 Хони Ной инисэлдүэни бичини, эмуту Най Хусэ Пиктэни инисэлдүэни оси-мат.
- 27 Сиари, оми, асилаи, эдилэй тэй энидэлэ Ной аданчи охандоани, чу даи далан асиачиани, хай-да хэм дякава вахан.
- 28 Туй Лот инисэлдүэни би-мэт: сиари, оми, гади, хода-си, тари, аңгой тахачи.
- 29 Лот Содомдиади ниэхэни иниду боа уедидиэни тава-ку, нутэку тугдэ тугдэлүхэни, найва хэм вахани.
- 30 Най Хусэ Пиктэни агбиндини инидүэни, туй-мэт осидяра.
- 31 Тэй иниду уй-дэ гуичэду би осини, хадён-тани дёгду, тэй чава дяпандами эди энэ; уй-дэ усинду би осини, туй-мэт хамаси эди кэчэриэ.
- 32 Лот асивани дёңгоктасу.
- 33 Уй-дэ эргэмби хоричай осини, тэй нёамбани вари; уй-дэ вари осини, тэй нёамбани хори.
- 34 Синчи ундэмби: тэй долбоду дюэр най эм аори бэунди бидерэл; эмунивэ дяпадярал, гойдимава дэрэ-дигуэдерэл.
- 35 Дюэр эктэ най гэсэ худирэй осини; эмунивэ дяпадярал, гойдимава дэрэдигуэдерэл.

- ³⁶ Дюэр най усинду би осини; эмунивэ дяпадырал, гой-
димава дэрэдигуэдерэл».
- ³⁷ Чаду Нёанчиани уңкичи: «Хайду бини, Эден?» Нёа-
ни-тани нёанчиани уңкини: «Хайду буйкин най бэени
бини, таоси гусисэл поагой».

18 паси

- ¹ Нёани нёанчиачи мода хэсэвэ гисурэхэни кэсивэ гэ-
лэми гучи мурумби муэмбуэми биуриэм,
- ² Уми: «Эм хотонду Эндурди нүлэси, найсалди иламо-
сиаси дёдыамди бичини.
- ³ Тэй хотонду-тул эм наон эктэ бичин, нёани нёанчиани
дидэ, хисаңгохани: „Байгоандиадиива мимбивэ кандё“.
- ⁴ Нёани-тани гойдами чихалачини. Тотами-да мэнэ
долаи уңкини: „Ми Эндурди нүлэси-дэ, найсалди
иламосиаси-да,
- ⁵ Туй тами тэй наон эктэ мимбивэ чиуриңгини бими,
нёамбани кандёдыамби, нёани мимбивэ эм чиуриңгими
тагоани“».
- ⁶ Эден-тэни уңкини: «Тэде ана дёдыамди ундивэни дол-
диасу?
- ⁷ Эндур мэнэ сондёхамби, ини-долбо Нёанчиани сиң-
ги гурумбэ кандёаси-ну, кандёгой эм пэниндэми та-
ми-да?
- ⁸ Сунчи ундэмби: элэ нёандоачи кандёмба будерэ.
Тотам-да Най Хусэ Пиктэни, дидэ, наду агдамба ба-
ри-ну?»
- ⁹ Мэпи тэрэк бипуэм мурчихэн, тотамари-да гой гу-
румбэ сиңгэрэхэн найсалчи туй би мода хэсэвэ уң-
кини:
- ¹⁰ «Дюэр най Эндур дёкчиани кэсивэ гэлэгуэри ихэчи:
эм фарисей, гойдима албамба дяпай най.
- ¹¹ Фарисей, илира, мэнэ долаи туй кэсивэ гэлэлүхэни:
„Эндур! Симбивэ баняламби, ми туй биэсимби, гой

- найсал бини-мэт – човосал, оксачи найсал, хоанди найсал, эй албамба дяпай най-мат-да.
- 12 Надалгаду дюэр модан симсэку дякава сиарасимби, бахандолаи дёая пасива бурэмби“.
- 13 Албамба дяпай най-тани, горола илисими, насалби боа учезиэни эурими-дэ мутэчини; туңгэмби дуктэми хисаңгохани: „Эндур! Мимбивэ, сороңку найва, гуди-эсиру!“
- 14 Сунчи ундэмби: эй мэнэ дёкчийи энухэн най тэй найдуй байта ана осихан; туй тамы най таони мэпи уйси тобоми мурчи, най пэгиэлэни осигой; мэпи най пэгиэлэни мурчи, най уелэни осигой».
- 15 Нёанчиани оңакасалба-да тоңгалагоани олбиачихачи; дахамдисални-тани, чава ичэрэ, нёамбачи камалихачи.
- 16 Иисус-тэни, нёамбачи хэрсирэ, уңкини: «Пурилбэ Минчи дигуэчи чиндаосу, эди камалиасу, туй тамы Эндур далачини эрин нёаңгичи.
- 17 Сунчи тэде ундии: уй-дэ Эндур далачини эримбэ пиктэ-мэт чихаласи осини, нёани таоси ирэси».
- 18 Дяңгиасалдолани эм най Нёамбани мэдэсихэни: «Кэсивэ бури Алосимди! Эм будэми балдигой ми хайва таори?»
- 19 Иисус нёанчиани уңкини: «Хайми си Мимбивэ кэсивэ буриэм гэрбиэсиси? Уй-дэ тые-дэ бурэси, эм Эндур-маня бури.
- 20 Пуегдунсэлбэ сариси-ну? „Эди хоанда, эди вара, эди чола, эди аргасими агдола, амимби, энимби гэбулу“».
- 21 Нёани-тол уңкини: «Чавэ хэм наондёандолаи-баки ми этэхихэмби».
- 22 Иисус, чава долдипи, нёанчиани уңкини: «Гучи эм хай-ну синду аба: дякаи хэм ходасио, гиохатонсалду букту, боа уелэни бобой дякава бадячи; дидэ, Ми хамииалаивэ энү».

- 23 Нёани-тани, чава долдипи, тэң баян бими, гасалохани.
- 24 Иисус, гасайвани ичэпи, уңкини: «Баяниду Эндур далачини эринчиэни ивури маңга.
- 25 Боңгоду хурмэ саңгарчиани тэмэн ири, баян най Эндур далачини эринчиэни ирини дюлиэлэни».
- 26 Чава досодяхан гурун уңкичи: «Уй-кэ хорами мутэй?»
- 27 Нёани-тани уңкини: «Най мутэсивэни, Эндур мутэй».
- 28 Пётр-тани уңкини: «Гэ, буэ хайва-да хэм наңгалахапу, Си хамиаласи энэхэпу».
- 29 Нёани нёанчиани уңкини: «Сунчи тэде ундэмби: дёгби, аминаи, энинэи, аўнаи, эйкэнэи, асии, пиктэсэлби Эндур далачини эриндуэни наңгалайни уй-дэ аба.
- 30 Чала чоп эгдивэ эм барами тамча эй эринду гучи дюлилэ осигилай эринду эм будэми балдигой».
- 31 Дёан дюэр дахамдисалби хаңгиси хэрсирэ, нёанчиачи уңкини: «Гэ, Буэ Иерусалимчи торипу, Най Хусэ Пиктэвэни Эндурдиэ ундэй найсалдола нирувухэн хэм осидяра:
- 32 Чаду Нёамбани Эндур гиамбани сараси найсалчи бугудерэл, сиңгэрэдерэл, Нёамбани оксачидярал, Нёамбани топичидярал,
- 33 Тотара тойңкандярал, Нёамбани вадярал; илачаи иниду хорагодяра».
- 34 Нёанчи-тани чала хайва-да отоличичи; эй хэсэсэл нёандолачи даякпин бичин, нёанчи умбухэмбэ отоличичи.
- 35 Нёани Иерихомба исидоани, эм бали най ирэмэсими поктоду тэсихэни;
- 36 Мэпи сиур найсал энэйвэчи долдипи, мэдэсихэни: «Эй хай дяка?»
- 37 Иисус Назаретаңкан энэйниэм нёанчиани уңкичи.
- 38 Чаду нёани морапсиңкини: «Давид Пиктэни, Иисус, гудиэсиру!»

- ³⁹ Дюлилэ энэй гурунсэл нёамбани хэмэ осиваукичаха-
чи, туй тами-да нёани чадой даиди морахани: «Давид
Пиктэни, мимбивэ гудиэсиру!»
- ⁴⁰ Иисус, каодяра, нёамбани Мэнчии гэлэхэни. Тэй
най Нёанчиани лау дивучиэни, мэдэсихэни:
- ⁴¹ «Хайва си Миндулэ гэлэйси?» Нёани уңкини: «Эден!
Ми ичэлугуйчэй».
- ⁴² Иисус нёанчиани уңкини: «Ичэлугуру! Си агдаси сим-
бивэ хораваукини».
- ⁴³ Чадобак нёани ичэлугухэни. Туй тара, Эндурбэ гэ-
булэми, Нёани хамаалани энэхэни. Гэрэн гурун, чава
ичэпэри, Эндурбэ гэбултухэчи.

19 паси

- ¹ Туй тара Иисус Иерихончи ихэни, тэй довани энэ-
хэни.
- ² Гэ, уй-ну Закхейди гэрбуку, албамба дяпай найсал
дяугианчи, баян най,
- ³ Нёани Иисусэвэ хони бием ичэйчэхэни, нэктэ най
бими найсал хамадиачи ичэми мутэчини.
- ⁴ Дюлэси тутурэ, Нёамбани ичэгуй, амтакаку мочи
мокчакхани, Нёани эй мо дякпалани энэбилэхэни би-
чини.
- ⁵ Иисус, тэй бэунчи исипи, нёамбани ичэрэ, уңкини:
«Закхей, тургэнди эугу, Ми эйнивэ дөгдоаси бигилэй».
- ⁶ Нёани будурими эугухэни, Нёамбани агданасими
ивухэни.
- ⁷ Хэмту най, чава ичэпэри, муңкунэсимэри хисаугоха-
чи: «Хайми Нёани сороуку найчи ихэни?»
- ⁸ Закхей-тэни илисими Эденчи уңкини: «Эден! Дёкамби
калавани гиохатонсалду будемби, уйвэ-дэ хайди-да ок-
сантоха осини, дуин модандоа эгдивэ будемби».
- ⁹ Иисус нёанчиани уңкини: «Эси эй дөгду хорагори
дичин, нёани-да Авраам пиктэни».

- 10 Туй тами Най Хусэ Пиктэни вавохамба хоригой мэдэ-
синдэми дичини».
- 11 Нёанчи чава досолайдоачи, Нёани гучи мода хэсэвэ
гисурэхэни. Нёани Иерусалимчи лаң бини бими, нё-
анчи-тани Эндур далачини эрин элэ нихэлиптэем
мурчихэчи.
- 12 Гэ, уңкини: «Эм гэбуку хала найни, мэндуй эден хам-
бани бара мочогогой, горо боачи энэпсиңкини.
- 13 Дёан лаодиансалба хэрсирэ, дёан даолако мэңгумбэни
буми уңкини: „Чав ми дидюйчиэ такорамари кэндэ-
ливэндусу“.
- 14 Хотонқансал нёамбани чиурсимэри, нёани хамиалани
найсалба гиактадихачи умэри: „Нёани бунду эделэй-
вэни чихаласипу“.
- 15 Нёани, эден хамбани бара, мочогопи, мэңгумбэ бу-
хэмби лаодиансалба мэнчи хэрсивэңкини, уй хай-
ва-да бахамбани сагои.
- 16 Боңгони дидэ, уңкини: „Си мэңгунгуси дёан модан
эгди мэңгумбэ бухэни“.
- 17 Нёанчиани уңкини: „Ая, улэн лаодиан! Туй тами си
нучи дякаду тэдеку бичиндулэй дёан хотомба далачи-
гои дяпаро“.
- 18 Дюэечиэ дидэ, уңкини: „Эден! Си мэңгунгуси тойңга
модан эгди мэңгумбэ бухэни“.
- 19 Эйдимэчи-дэ уңкини: „Си тойңга хотомба даларо“.
- 20 Илиачиани дидэ, уңкини: „Эден! Гэ, мэңгунгувэси ми
пункуду хукурэ, этэхихэмби.
- 21 Ми синди нэлэчихэмби, маңга хатан найси бими:
эчиэ нэрэи дякава дяпайси, хайва-да эчиэ тариаи,
посиси“.
- 22 Эден нёанчиани уңкини: „Си хэсэдиэси симбивэ дё-
дядямби, дялиңку лаодиан! Си ми маңга хатан найива
сахаси: нэрэчимби дякава дяпиива, хайва-да эм тариа-
чимби, посиива.

- 23 Хайми си ми мэнгуңгуивэ кэндэлиwendэчиси, ми ди-
дюрэ, чала бэнчиэмбэ багогоива?“
- 24 Дюлиэлэни илиси найсалчи уңкини: „Нёандолани
мэнгумбэ дяпагосу, дёан даолако мэнгуңкуниду бу-
гусу“.
- 25 Нёанчиани уңкичи: „Эден! Нёани элэ дёан даолако
мэнгуңгуку“.
- 26 „Сунчи ундэмби: дякако найду гучи буптэдерэ, хай-да
ананиду хаямбани-да дяпагоптадьяра.
- 27 Ми далачиива осисихан байгоансалбива эуси гадёсу,
ми дюлиэлэивэ тойкандосу“».
- 28 Чава ундэ, Нёани дюлэси энэхэни, Иерусалимчи
томи.
- 29 Виффагиячи, Вифаниячи, Елеонскай гэрбуку хурэнчи
лаң исидой, дюэр дахамдисалби гиактадихани,
- 30 Ундэ: «Буэ бадодопова би ихончи энэрэ, таоси ирэ,
уй-дэ эчиэ нямняни, уичэку наондёан эйхэвэ бадьясу,
чава ачора, гадёсу.
- 31 Сумбивэ уй-дэ мэдэси осини: „Хайгой ачойсу?“, нё-
анчиани туй уңгусу: „Эйвэ Эден гэлэй“».
- 32 Гиактадихан найсал энэхэчи, уңкиндулэни баого-
хачи.
- 33 Наондёан эйхэвэ ачойдоачи, тэй эденсэлни нёанчиачи
уңкичи: «Хайгой эйхэкэмбэ ачойсу?»
- 34 Нёанчи таодагохачи: «Нёамбани Эден гэлэйни».
- 35 Тэйвэ Иисусэчи гадёхачи; эйхэкэмбэ тэтуэсэлдиэри
дасира, Иисусэвэ тэй оялани тэвэңкичи.
- 36 Нёани энэйни поктова тэтуэсэлдиэри сэкчиуэчихэчи.
- 37 Нёани Елеонскай хурэн хапсивани исиочиани, хэмту
дахамдисални агданасимари даиди Эндурбэ мактачи-
лохачи эрдэңгэ дякасалба ичэхэмбэри тургундулэни.
- 38 Умэри: «Эндур гэрбудуэни дидюхэн Эден гэбулэги-
ни! Боа уелэни номо-номо бигини, боа уелэни гэбу-
ку бигини!»

- 39 Най алдандиадиани бичин фарисейсал Нёанчиани уңкичи: «Алосимди! Дахамдисалби паполару!»
- 40 Нёани нёанчиачи таодагоми уңкини: «Сунчи ундэмби: нёанчи хэмэ одай осини, дёлосал моралой».
- 41 Хотончи лаң исидой, чава ичэпи, соңголохани.
- 42 Уңкини: «Си эй инидуи самчаси, хайва-да номо-номо бигуэси гэлэуривэни. Тотами-да тэй си насалдиадиси даякпини.
- 43 Бимие инисэл синчи исидярал, чаду байгоансалси, эисэлбэ хулэмэри, симбивэ кэндэли осидярал, хаяди-да хэм симбивэ киап хордиңгодярал.
- 44 Симбивэ хэпучимэри айкиндярал, си доласи пурилбэси вадярал, доласи эм дёло оялани эм дёлова-да эм солотоами тадярал, си пулсиури эримбэси сарасиси тургундүлэни».
- 45 Эндур дёкчиани ирэ, ходаси, гади найва пуңнэлүхэни.
- 46 Нёанчиани хисаңгохани: «Нирувухэн: „Ми дёгби кэсивэ гэлэури дё“. Суэ-тэни чава айкимбохан боа осиваңкису!»
- 47 Ини таондоани Эндур дёгдоани алосиктахани. Боңго Эндур дёңни дяңгиансални-тани, даңсава сари найсал Нёамбани вайчахачи.
- 48 Нёамбани хони-да таорива мурчимэри мохохачи, гэрэн гурун Нёамбани тул-тул досодичи бими.

20 паси

- 1 Эм иние Нёани Эндур дёгдоани найва алосиктайдоани, улэн мэдэвэ хисаңгоми, Эндур дёңни боңго дяңгиансални, даңсава сари найсал, сагди гурунсэл Нёанчиани дичичи.
- 2 Нёанчиани уңкичи: «Бунчи унду, хамача гиандиани Си чава тайси, уй Синду эй гиамба бухэни?»

- 3 Нёани нёанчиани таодагоми уңкини: «Ми-дэ сумбивэ эм дяка удэвэни мэдэсидемби, Минчи ундусу:
- 4 Иоанн тахани сэвэкилэури Эндурдиэдиэни бичини-ну, найсалдиади-ну?»
- 5 Нёанчи мэнэ долари мурчимэри хисаңгохачи: «Эндурдиэдиэниэм ундипу осини, ундэрэ: „Хайми суэ нёамбани агдасисо?“
- 6 Найсалдиадиам ундипу осини, чаду хэмту най бумбивэ дёлоди тойңкандяра. Нёанчи тэдючимэри мурчичи, Иоанн Эндурдиэ ундэй най биэм».
- 7 Таодагохачи: «Хаядиа-да бивэни сарасипу».
- 8 Иисус нёанчиачи уңкини: «Ми-дэ сунчи ундэсимби, хамача гианди чава таи».
- 9 Нёани найсалчи тамача мода хэсэвэ гисурэлүхэни: «Эм най муксултэвэ тарира, дёбой гурунду такорагой бугүхэни, туй тара гойдами энэхэни.
- 10 Эм эркивэ тэй дёбомдисалчи муксултэвэ бугүэчи лаодиамби гиактадихани, нёанчи-тани, нёамбани тойңканда, хай-да ана энүвэңкичи.
- 11 Гучи гой лаодиамби гиактадихани; нёанчи-тани нёамбани-да тойңканда, госолара, хай-да ана энүвэңкичи.
- 12 Гучи илиачианива гиактадихани; нёанчи-тани тэйвэ-дэ пуентурэ пуңнэгүхэчи.
- 13 Чаду муксултэ урэйни боа эдени уңкини: „Хони таори? Улэси хусэ пиктэй гиактадиамби; нёамбани ичэпэри, сайна, иладидярал“.
- 14 Дёбомдисал-тани, нёамбани ичэрэ, мэнэ долари мурчимэри ундичи: „Тэй эдемпу хусэ пиктэни, нёамбани вандагоари, амини дякасални буэңги осигой“.
- 15 Нёамбани муксултэ урэйни боадиади ниэвурэ, вахачи. Муксултэ урэйни боа эдени нёандиачи хайва тадыра?
- 16 Дидэ, тэй дёбомдисалба вадяра, муксултэ урэйни боавани гой гурунду будерэ». Чава досодяй гурунсэл уңкичи: «Аба, одаси!»

- 17 Нёани нёамбачи ичэрэ, уңкини: «Хай дяка тэй Бичхэ-диэди ниручэ: „Дёгба аңгой гурунсэл наңгалахачи дё-ло тэхэ дёло очини?“
- 18 Тэй дёлочи тухэни най таони буди, уй оячиани тури осини, нёамбани чирэй».
- 19 Тэй эринду Эндур дёңни боңго дяңгиансални, даңсава сари найсал Нёамбани вайчахачи, туй тами-да найди нэлэчимэри, Нёани нёанчи удэвэни тэй мода хэсэвэ гисурэхэмбэни отолихачи.
- 20 Нёамбани дола ичэдемэри, арганди дяпайчалохачи. Дялиңку найсалба, тоңдо гурун-мэт осивамари, дивэңкичи. Нёамбани хавой-ну хэсэ тургундулэни дяпагоари, тотара дяңгиансалду гучи гиан даи даламдидоани бугуэри.
- 21 Нёанчи Нёанчиани мэдэсихэчи: «Алосимди! Си тэрэк ундиси, най дэрэгбэни эм ичэдеми, туй тами-да тэрэк Эндур поктолани алосиси, буэ чава сарипу.
- 22 Буэ эденду албамба бувури-ну, аба-ну?»
- 23 Нёани-тани нёанчи аргамосивачи отолира, нёанчиачи уңкини: «Хайгой суэ Мимбивэ пэргэлису?
- 24 Суэ Мимбивэ эм дихава ичэвэндусу: „Тэйду уй дуруни, ниручэни?“» Нёанчи таодагохачи: «Эдеңги».
- 25 Нёани нёанчиачи уңкини: «Эденду эдеңгивэ, Эндурду Эндурңгивэ бугусу».
- 26 Нёанчи гэрэн гурун дюлиэлэни Нёамбани хэсэлэни дяпамари мутэчичи, Нёани таодагохандиани миамари хэмэ осигохачи.
- 27 Чаду хорагорива ачаканаси хадое саддукейсэл дидэ, Нёанчиани мэдэсихэчи:
- 28 «Алосимди! Моисей бунду нирухэни, уй-дэ, асику аңни пиктэ анани буди осини, нэуни агби асивани дяпагойвани гэлэй, халаи сирагой.
- 29 Надан аил бичичи; боңгодима асигой дяпара, пиктэ ана буйкини.

- 30 Тэй асивани дуюедимэ дяпагохани, тэй-дэ пиктэ ана буйкини.
- 31 Илиачиани, тэй эктэвэ дяпагора, буйкини, надан аил, хами хамиалани сирагомари, хэм пиктэ ана буйкичи.
- 32 Хэмтуни хамилани асичи буйкини.
- 33 Туй тами хорагори эринду тэй гурунду нёани хавойди-ма асини оси? Нёани надани асини бичин».
- 34 Иисус нёанчиачи таодагоми уңкини: «Эй эрин пурил-ни асигоари, эдигуэри барил;
- 35 Тэй эримбэ исира, буйкиндиэдиэри хорагохан найсал асигой, эдигуй барасил.
- 36 Тэй оячиани нёанчи бурми мутэсил: Мэдуңкусэл-мэт, хорагори эрин хусэ пиктэсэлни бимэри, нёанчи Эндур хусэ пурилни.
- 37 Буйкин найсал хорагилайвачи Моисей поңго поргиндоани ичэвэңкини, Авраам Эндурдиэни, Исаак Эндурдиэни, Иаков Эндурдиэни Эдембэ гэрбиэсими.
- 38 Эндур буйкин найсал Эндурни биэси, уюн найсал Эндурни, туй тами Нёандоани хэмту най уюн».
- 39 Чаду даңсава сари хадое найсал уңкичи: «Алосимди! Си улэн уңкиси».
- 40 Нёанчиани хайва-да гучи мэдэсимэри мутэчичи. Нёани-да нёанчиачи уңкини:
- 41 «Хони ундичи, Христос Давид пиктэниэм?
- 42 Давид мэнэ дяринсалби даңсадоани ундини: „Эден ми Эденчиивэ уңкини: Ми аңгиа калтадоива тэсиу,
- 43 Ваохан байгоансалбасу бэгдичиэсу нэричиивэ“.
- 44 Туй тами-да Давид Нёамбани Эдембиэм гэрбиэсихэни; хони, Нёани хусэ пиктэни хай?»
- 45 Хэмту най досодяйдоачи, Нёани дахамдисалчии уңкини:
- 46 «Даңсава сари найсалди дэңсисиусу: нёанчи ноними тэтуэку пулсиуриэ улэсичи, найсал поансалдоачи

бачиалиори хэсэвэ, кэсивэ гэлэури дёсалду гойда-ми тэсиуривэ, баян саолинсалду аоликачиорива улэсичи,

- ⁴⁷ Наон экэсэл дёсалбачи мэнгилэйчи, дялимари гойдамари кэсивэ гэлэйчи; нёанчи чу маңгади оркилтомба бадярал».

21 паси

- ¹ Ичэк тапи, Нёани баян гурун суглэнсэлбэри Эндур даи дёнгопи бобой дякасалба этэхиури гиалакоду нэ-ривэчи ичэхэни.
- ² Таоси гучи дюэр нучи дихава синэди наон эктэ нэхэм-бэни ичэхэни.
- ³ Уңкини-тэни: «Сунчи тэрэк ундэмби: тэй синэди на-он эктэ хэмту найсалдуй чу эгдивэ нэхэни.
- ⁴ Туй-гдэ хэмту найсал Эндурду суглэмбэ мэнэ пулэди-эдиэри нэхэчи, нёани-тани мэнэ синэдиндии мэндуи бичин сияптаңгии хэм нэхэни».
- ⁵ Поани гурун Эндур дённи бобой дёлоди, хачин дяка-салди илгалаохам хисаңгойдоачи Нёани уңкини:
- ⁶ «Суэ айду ичэйсу дякасалдола эм дёло оялани хай гой дёло-да дэрэдигуэси; хай-да хэм хэпулиптэдерэ. Туй осии инисэл исидярал».
- ⁷ Нёанчиани мэдэсихэчи: «Алосимди! Хали эй осини? Тэй осивани хайла саворини?»
- ⁸ Нёани уңкини: «Мэпэри эди аргалавандасу; эгди най Ми гэрбудиивэ эйвэ, Ми таям, эй эрин дидям умэри, дидерэл. Тэй гурумбэ эди дахасу.
- ⁹ Чаохараорива, найсал тэргэдэйчи эримбэ долди-пари, эди маңгади нүлэчиэсу; тэй эрин дюлиэлэни эй дякасал осигилайни, тотам-да чаду-баки ходип-таси».
- ¹⁰ Чаду нёанчиачи уңкини: «Гой-гой найсал, гой-гой эден хадиани дииа дииадииари сорилодлярал.

- 11 Боа боадоани маңга на туйңкудерэ, хади, эгди най бурбури эринсэл, маңга нэлэпси дякасал, боа уедиэ-диэни даи голоансал осидярал.
- 12 Тэй эрин дюлиэлэни сумбивэ дяпадярал, сумбивэ пуңнэдерэл, кэсивэ гэлэури дёсалчи, лаосалчи сумбивэ наңгаладярал; Ми гэрбуи тургундулэни эденсэлчи, даламдисалчи олбиндярал.
- 13 Тэй суэнду агдоңгоасу осидяра.
- 14 Миавандоари нэрусу, хайва-да тайвари дюлиэлэни таодагогилайвари эм мурчиэ таорива.
- 15 Ми сунду хэсэвэ, соңта мурумбэ бурэмби, хэмту байгоансалсу ачаканасимари мутэсидечи.
- 16 Аминасу, энинэсу, аилсу, ахондосу, андарсу сумбивэ байгоансалдоасу будерэл, поанива вадярал.
- 17 Хэмту найсал Ми гэрбуи тургундулэни сумбивэ чиурсидерэл.
- 18 Эм нуктэ-дэ дилиласу түрэси.
- 19 Эргэмбэри аличамари хоричиосу.
- 20 Суэ, Иерусалим чаохасалди кэндэли очимбани ичэпэри, чаду саросу: тэй хотон сусу-мэт осини эрин дидяңкини.
- 21 Иудеяду би гурунсэл хурэнчи тутугичи, хотонду би гурунсэл хотондиади ниэгичи, хотомба лаң би гурунсэл хотончи эм ирэми тагичи.
- 22 Тэй таодагори инисэл исихани, нирувухэн хэм осигини.
- 23 Тэй инисэлду бэеду би, кумби кучивэнди экэсэлду осидяра; наду тэң даи валиаха, тэй гурунду маңга-маңга кэсун осидяра.
- 24 Поани сарби лохонди тудерэл, поанива гой-гой голосалчи олбиндярал; Иерусалимба Эндур гиамбани сараси найсал такточидярал, мэнэ эринсэлбэри ходидала.
- 25 Сиунду, биадо, хосиктасалдо голоан осидяра, тэй надо-тани найсалдо тэргэдэури, мурумби муэвэмбури эрин оси; намо дайчадяра, аякталадяра.

- 26 Найсал, боа яловани энэй валиахава халачимари гучи
нэлэчимэри, будерэл, тотам-да боа кусуни тэргэдэ-
лудерэ.
- 27 Чаду кусуңку, даи гэбуку Най Хусэ Пиктэни чагдян
тэвэксэ оялани дидивэни ичэдерэл.
- 28 Тэй осилойдоани илиосу, диливари эурису: сумбивэ
хэңгэли эрин дидяндени».
- 29 Нёанчиачи мода хэсэвэ гисурэхэни: «Амтакаку мочи,
хэмту гой мосалчи ичэусу.
- 30 Хабдасал агбиндивани ичэпэри, мэнэ сарису, элэ
дёа дидя.
- 31 Туй-мэт би, суэ, Ми уңкимби осивани ичэпэри, саро-
су: Эндур далачини эрин дидя.
- 32 Сунчи тэрэк ундэмби: эй хала бидуэни-тул, эй хэм
одяра.
- 33 Боа, на ходидяра, Ми хэсэи ходиаси.
- 34 Мэпэри ичэдеусу: миавамбари сиавориди, аракиди
эди хэтэвэндэсу, балдиори байтади мэпэри эди дяпа-
вандасу.
- 35 Нёани, эмуту ярако-мат, на оялани балди гурумбэ
баогодяра.
- 36 Гэ, тул-тул эди аорасу, кэсивэ гэлэусу, дюлилэ осиги-
лай кисиакоди хорадясу, Най Хусэ Пиктэни дюлиэлэ-
ни илидясу».
- 37 Ини Нёани Эндур дёгдоани аლოსиктахани, долбо-тани
ниэрэ, Елеонскай хурэнду гойдахани.
- 38 Гэрэн гурун чими эрдэ Эндур дёкчиани пулсихэчи,
Нёамбани досодяндамари.

22 паси

- 1 Няико ана эпэнсэл аяни, Пасхади гой гэрбуку, ди-
дяңкини.
- 2 Боңго Эндур дёңни дяңгиансал, даңсава сари найсал,
найди нэлэмэри Иисусэвэ вайчахаачи.

- ³ Амбан-тани дёан дюёрдулэ эмуничи, Искарютади гэрбиэухэн Иудачи, ихэни.
- ⁴ Нёани энэми Боңго Эндур дёңни дяңгиансалчиани, даламдисалчи хисаңгохани, хони Нёамбани нёандоачи дяпами бугуриwэ.
- ⁵ Нёанчи агданасимари нёандоани дихава бувуриwэ чихалахачи.
- ⁶ Нёани хэсэи бухэни, ачай эримбэ халачихани, найсал анадоани Нёамбани нёандоачи бугуй.
- ⁷ Няико ана эпэнсэл инини исихани, чаду Пасха хони-камбани ваори осигилайни.
- ⁸ Иисус Пётрава, Иоамба гиактадихани, ундэ: «Пасхава сиягоива баргиндосу».
- ⁹ Нёанчи Нёанчиани уңкичи: «Хайду бумбивэ баргивандиси?»
- ¹⁰ Нёани нёанчиачи уңкини: «Гэ, хотончи иридуэри, суэ пэңсэкудуэни муэку найва бачиалидысу; нёани хамиалани энэйни дёкчи энусу.
- ¹¹ Дё эденчиэни ундусу: „Алосимди синчи хисаңгойни: хавой гиалакоду Ми дахамдисалдии Пасхава сиамчаи?“
- ¹² Нёани сунчи даи сэгдилэухэн гиалакова ичэwэндэрэ, чаду баргиндосу».
- ¹³ Нёанчи, энэрэ, Нёани уңкини-мэт бахачи, Пасхава баргихачи.
- ¹⁴ Тэй эрин исидоани Нёани акпаңкини, дёан дюэр апостолсал Нёандиани гэсэ акпаңкичи.
- ¹⁵ Нёани нёанчиачи уңкини: «Эрумбэ бариини дюлиэлэни Ми сунди эй Пасхава сияорива маңга мурчихэмби.
- ¹⁶ Тотами-да сунчи ундэмби: Эндур далачини эриндуэни нёани осидала, чава сиарасимби».
- ¹⁷ Алиова дяпара, банялара, уңкини: «Эйwэ дяпаосу, мэнэ долари оболаосу.
- ¹⁸ Туй тами сунчи ундэмби: Эндур далачини эрини исидала, муксултэ муэwэни омиасимби».

- 19 Эпэмбэ дяпара, банялара, бокталихани, нёандоачи буми уңкини: «Эй Ми Бэеи суэ хорагоасу бугуптэй; Мимбивэ дёңгойдоари туй-мэт таосу».
- 20 Туй-мэт сиксэ сияори эрин хамиалани гучи алиова буми уңкини: «Эй алио – сикун пуегдун Ми сэкседувэ, суэ хорагоасу хулсиптэй».
- 21 Гэ, Мимбивэ байгоандоива бури най ңалани Минди гэсэ дэрэ дякпадоани.
- 22 Туй тами Най Хусэ Пиктэни мэнэ голаи энэй; Нёамбани-тани байгоандоани бури най кисиако».
- 23 Нёанчи диа диачиари мэдэсилухэчи: нёандолачи чава тайни уй?
- 24 Гучи нёанчи мэнэ долари-да мариамачихачи: нёандолачи уй уйдуи даи бодори?
- 25 Нёани-тани нёанчиачи уңкини: «Эденсэл гурун гурумбэ далачичи, нёанчи найду улэмбэ буриэм гэрбулэптэйчи».
- 26 Суэ-тэни туй биэси: тотами-да уй сундулэ даидима, нучи-мэт осигини, даламди-тани – дэңсимди-мэт».
- 27 Уй уйдуй даи: аоликачи най-ну, дэңсимди-ну? аоликачиасини-ну? Ми-тэни суэ алдандоасу эмуту дэңсимди».
- 28 Суэ-тэни Ми эрулэурии эринду Минди гэсэ бичису».
- 29 Ми сунчи пуегдундимби, эмуту Эндур далачини эримбэни Амимби Минду пуегдункини-мэт».
- 30 Суэ сияхарсу, омихарсу Ми сивандии эринду Эден далачини эриндуи; дёан дюэр Израиль халасалбани дёдягоари эден тэңкусэлдуэни тэгудерсу».
- 31 Эден-тэни уңкини: «Симон! Симон! Гэ, амбан гэлэхэни сумбивэ ирава-мат таригой».
- 32 Тотам-да Ми синду кэсивэ гэлэхэмби, си агдайси оинаси осигоани; тотара си-дэ хали-да Ми хамиалани дахагора аңнаи маси осивандо».

- 33 Пётр Нёанчиани таодагохани: «Эден! Синди ми лаочи, бурбунчи энэгуй чэк биэмби».
- 34 Иисус-тэни уңкини: «Синчи, Пётр, ундэмби, эйниэ хусэ чико-да морапсиндаласини, си илан модан Мимбивэ сарии ачаканасидяси».
- 35 Нёанчиачи уңкини: «Ми сумбивэ далиан-да ана, сомалан-да ана, ота-да ана гиактадидоива, сунду хай-да аолихан бичи-ну, хай?» Нёанчи таодагохачи: «Аба».
- 36 Чаду Нёани нёанчиачи уңкини: «Эси-тэни уй далиаңко, чава дяпу, туй-мэт сомаламба, уй хай-да анани, тэтуэ ходасиу, лохомба гадо!»
- 37 Тотами-да сунчи ундэмби: Эй ниручэ Миндулэ тугуми тэде осигилайни: „Оркин найсалчи ноңгигодяра“. Тотам-да Ми удэивэ унди дяка дуэни дидя».
- 38 Нёанчи уңкичи: «Эден, гэ, эйду дюэр лохон». Нёани нёанчиачи уңкини: «Элэ».
- 39 Ниэрэ, Нёани колилаи Елеонскай хурэнчи энэхэни; Нёани хамиалани дахамдисални дахахачи.
- 40 Бэунчи дидэ, нёанчиачи уңкини: «Аргаңко дякасалду эндэси осигоари кэсивэ гэлэусу».
- 41 Мэнэ нёандиадиачи дёлова наңгалаори алдандоа хаданкини, михоранда кэсивэ гэлэхэни,
- 42 Уми: «Амимби! Си эй эрун алиовани Мимбивэ сиур ираорива чихаламчаси! Тотами-да Ми чихалайдоива биэси, Сиңги бигини!»
- 43 Нёанчиани боа уедиэни Мэдуңку агбиңкини, Нёамбани масила осиваңкини.
- 44 Тэргэдэми, масиди кэсивэ гэлэхэни, Нёани ниэсэңгини начи тури сэксэ сабдасални-мат бичи.
- 45 Кэсивэ гэлэрэ, илигора, Нёани, дахамдисалчи дидэ, нёанчи гасамари аоривачи баогохани.
- 46 Нёани нёанчиачи уңкини: «Хайми суэ аорису? Илигосу, арганду эндэси осигоари кэсивэ гэлэусу!»

- 47 Нёанчи чава хисаңгойдоани, найсал агбиңкичи, нёанчи дюлилэ дёан дюёрдулэ эмуни, Иудади гэрбукуни, нёани Иисусэвэ одёндахани. Туй таори саичава нёандоачи бухэни: Уйвэ ми одёхамби, Нёани тэем.
- 48 Иисус нёанчиани уңкини: «Иуда! Одёми Най Хусэ Пиктэвэни байгоансалдоани бугуйси?»
- 49 Нёандиани би найсал, хай осигилайвани ичэмэри, Нёанчиани уңкичи: «Эден! Буэ лохонди пачиладяпу, ая-ну?»
- 50 Нёандолачи эмуни, Боңго Эндур дёңни дяңгиани лаодиамбани пачилахани, нёани аңгиа сиамбани мокто чапчилахани.
- 51 Чаду Иисус уңкини: «Ходиосу, элэ». Туй тара сиамбани тоңгалахани, нёамбани аянагоаңкини.
- 52 Нёамбани ачапчи поаңкини Боңго Эндур дёңни дяңгиансалчиани, Эндур дёңни даламдисалчиачи, сагди гурунсэлчи Иисус уңкини: «Эмуту оркин найчи-мат лохонсалку, мосалку суэ дичису, Мимбивэ дяпагоари!
- 53 Ини таондоани Ми сунди Эндур дёгдоани бичимби, суэ-тэни Минчи ңалавари эурэчису; эси-тэни суэ эринсу, гучи пакчи гиани».
- 54 Нёамбани дяпара, элгэхэчи, тотара Боңго Эндур дёңни дяңгиани дёкчиани ирахачи. Пётр-тани горола дахахани.
- 55 Нёанчи боала токонду тавава иванкиндоачи гэсэ тэсихэчи, Пётр-тани нёанчи долани тэсихэни.
- 56 Эм кэкэ тава дякпадоани тэсихэн нёамбани ичэпи, тотара нёамбани ичэдерэ, уңкини: «Нёани Нёандиани бичини».
- 57 Нёани-тани Нёамбани абалтоми эктэчи уңкини: «Ми Нёамбани сараси».
- 58 Гойдасилаи гойдимани, нёамбани ичэрэ, уңкини: «Си-дэ нёандолачи». Пётр-тани тэй найчи уңкини: «Аба».

- 59 Ои эрин бипиэ, гучи уй-ну мучхунди ундени: «Тэде, нёани Нёандиани бичини, туй тами Галилеяңкан».
- 60 Пётр-да тэй найчи уңкини: «Сарасимби, хайва си ундиси». Чадо-баки, уңкиндүэни, хусэ чико морасиңкини.
- 61 Чаду Эден кэчэригурэ, Пётрава ичэхэни; Пётр-тани Эден нёанчиани хэсэвэни дёңгохани: «Хусэ чико морасиндала илан модан Мимбивэ ачаканасидячи».
- 62 Ниэрэ, маңга соңголохани.
- 63 Иисусэвэ дяпачахан найсал Нёамбани сиңгэрэхэчи, тойкаңкичи.
- 64 Нёамбани дасичира, дэрэгбэни пайңадачихачи, Нёанчиачи мэдэсихэчи: «Унду, уй Симбивэ пачилахан?»
- 65 Эгди оксантохан хэсэсэлбэ Нёамбани ачапчи хисаңгохачи.
- 66 Иниэ исиочиани, сагди гэрэн гурун найсални, Боңго Эндур дёңни дяңгиансал, даңсава сари найсал поаңгохачи, Нёамбани Даи поанчиари ивухэчи.
- 67 Уңкичи-тэни: «Си Христос-нум? Бунчи унду». Нёани нёанчиачи уңкини: «Сунчи уңкимби осини, суэ агдасису».
- 68 Сунчи-тэни мэдэсии осини, Минчи таодагоасису, Мимбивэ чиндагоасису.
- 69 Эвэңки Най Хусэ Пиктэни Эндур кусуни аңгиа калтачиани тэри».
- 70 Хэмту най уңкичи: «Туй тами Си Эндур Хусэ Пиктэни?» Нёани нёанчиани уңгүхэни: «Суэ ундийсу, Ми таям!»
- 71 Нёанчи-тани уңкичи: «Гучи хамача агдолаорива бунду гэлэй? Туй тами буэ мэнэ аңмалани ниэриэвэ до-содыхапу».

23 паси

- 1 Хэмту эгди гэрэн гурун илигора, Нёамбани Пилатачи элгэхэчи.
- 2 Нёамбани оркилтолохачи, умэри: «Буэ бодосипу Нёани буэ найсалпова оркин оповандини, эденду албамба

- бугуриwэ камалини, Мэпи Эденди Христосади гэр-
бизэсини».
- 3 Пилат Нёанчиани мэдэсихэни: «Си Иудея Эдени?»
Нёани Пилатачи таодагоми уңкини: «Си ундиси».
- 4 Пилат Боңго Эндур дёңни дяңгиансалчиани, найсалчи
уңкини: «Ми Эй Най хамачади-да байтаковани ичэ-
симби».
- 5 Нёанчи мучхунди хисаңгохачи: «Нёани хэм Иудеяду
Галилеядиади эй бэунчи ек алосиктами найсалба ор-
гочини».
- 6 Пилат Галилея удэwэни долдипи, мэдэсихэни: «Нёани
Галилеяңкан, хай?»
- 7 Пилат Ирод далачини боасалдиадиани бивэни сара,
тэй инисэлду Иерусалимду-тул бичин Иродачи Нёам-
бани гиактадохани.
- 8 Ирод-тани, Иисусэwэ ичэпи, маңга агдахани; нёани
балана Иисусэwэ ичэйчэхэни, туй тамы-да Нёани
удэwэни эгдивэ долдохани, Нёани хамача-да эрдэңгэ
дякава тайвани ичэйчэхэни.
- 9 Ирод Нёанчиани эгди мэдэсихэни, Нёани-тани нёан-
чиани хайва-да эчиэ таодагохани.
- 10 Боңго Эндур дёңни дяңгиансални-тани, даңсава сари
найсал илисимари Нёамбани маңга оркилтохачи.
- 11 Ирод-тани чаоха найсалдии Нёамбани одолира, инэк-
тэрэ, чагдян бойкоку тэтуэwэ тэтуэwэндэ, Пилатачи
хамаси энүэңкини.
- 12 Тэй иниду Пилатади, Иродади мэнэ долари андар
осихачи; балана дия диадиари байгоачихачи.
- 13 Пилат-тани Боңго Эндур дёңни дяңгиансалбани, гой
дяңгиансалба, найсалба хэрсирэ,
- 14 Нёанчиачи уңкини: «Суэ минчи Эй Найва олбиңкису,
умэри: Нёани найсалпова оркин оповандиниам; гэ,
ми суэ мэнэ бэеди бидуэсу ярсихамби, Эй Най суэ ор-
килтойсу дякала байтаковани эчиэ бараи.

- 15 Ирод-да эмуту, ми нёанчиани Эй Найва пулсивэң-
кимби. Хамача-да байта тургундулэни Нёамбани ваго-
ари барачичи.
- 16 Туй тамы Нёамбани кэсучирэ, чиндагодямби».
- 17 Пилатадо-тани аня далиндоани лаоду тэси гурундулэ
эм найва чиндагорива гэлэури бичини.
- 18 Хэмту-тэни найсал моралохачи: «Нёани буйгини! Бун-
ду-тэни Вараввава чиндаго».
- 19 Вараввава оркиачими хотокамба илиоаңкини, найва
вахани тургундулэни лаочи тэвэңкичи.
- 20 Пилат Иисусэвэ чиндагойчами, гучи даиди дилгакто-
хани.
- 21 Нёанчи-тани морахачи: «Нёамбани тэлэвэнду, тэлэ-
вэнду!»
- 22 Пилат илачаи модан нёанчиачи уңкини: «Хамача ор-
кимба Нёани тахани? Ми хай-да байта тургундулэни
Нёамбани вагои барачимби; туй тамы кэсучирэ, Нёам-
бани чиндагодямби».
- 23 Нёанчи-тани Нёамбани тэлэуривэ гойдамари даиди
морамари гэлэхэчи; нёанчи гучи Боңго Эндур дёңни
дяңгиансални моранчи галигохани.
- 24 Пилат мурупсиңкини: нёанчи гэлэйдүлэчи осигини.
- 25 Нёанчи гэлэхэндүлэчи, хотоңкамба оркиначими илио-
аңкиндолаи, найва вахандолаи, лаоду тэсихэн найва
чиндагохани; Иисусэвэ-тэни нёанчи мурундуэчи бу-
гүхэни.
- 26 Нёанчи Нёамбани олбиндайдоачи, усиндиэди мо-
чогой Симон Киринаеңкамба дяпахачи, туй тара
муйрэдуэни крестава нэрэ, Иисус хамиалани чава
пинасиваңкичи.
- 27 Нёани хамиалани эгди найсал энэхэчи, экэсэл-дэ кай-
рамари маңгади соңгохачи.
- 28 Иисус-тэни, нёанчиачи кэчэригурэ, уңкини: «Иеруса-
лим эктэ пиктэсэлни! Ми удэивэ эди соңгоасо, мэпэ-
ри-дэ, мэнэ пурилбэри мурчимэри, соңгосо.

- 29 „Хораси экэсэл, пиктэвэ бараси хэмдэсэл, сивандачин кунсэл кэсику“, – дидянди инисэлду туй найсал ундэдерэл.
- 30 Чадо хурэнсэлчи хисаңголодырал: „Бунчи турусу!“ Гучи хурэкэнсэлчи: „Бумбивэ хумусу!“
- 31 Нём оси мова туй тайчи осини, холгохан моди хай оси?»
- 32 Нёандиани гэсэ дюэр байтаку найсалба вагоари олбиңкичи.
- 33 Голгофади гэрбуку бэунчи исипи, Нёамбани крестаду тэлэхэчи, байтаку гурумбэ аңгиа, деуңгиэ калталани тэлэхэчи.
- 34 Иисус-тэни хисаңгохани: «Ама! Нёамбачи гудиэсиру, нёанчи хайва-да тайвари сарасичи». Тэтуэвэни мэнэ долари оболахачи.
- 35 Гэрэн гурун илисимари ичэдехэчи. Дяңгиасал нёандиачи гэсэ инемусимэри дёдялихачи: «Нёани гой найсалба хоричихани, Христос, Эндур сондёмдини осини, эси Мэнэ Мэпи хоригини».
- 36 Чаоха гурун-дэ Нёамбани диодилимари лаң дидэ, чувэ бухэчи.
- 37 Гучи уңкичи: «Си Иудея Эдени осини, Мэнэ Мэпи хориру».
- 38 Нёани уелэни грек, гучи Римаңкан, гучи еврей хэсэсэлдиэчи ниручэ бичини: «Эй Иудея Эдени».
- 39 Эм тэлэхэн байтаку най Нёамбани одоликачими уңкини: «Си Христос осини, Мэпи, бумбивэ хориру».
- 40 Гойдима-тани хаңгиси нёамбани даңсими уңкини: «Си Эндурди нэлэсиси-ну, хай? Симбивэ эмуту-дэ дёдяхачи.
- 41 Буэ мэнэ оркиачихандолари тэрэк байтава бахапу. Нёани-тани хайва-да оркимба эчиэ тахани».
- 42 Туй тара Иисусэчи уңкини: «Эден! Мэнэ далачи ханчи энупи, мимбивэ дёңгохари».
- 43 Иисус нёанчиани уңкини: «Тэде синчи ундэмби: эйниэ-бэки Минди гэсэ Райду бидечи».

- 44 Гэ, ини токондиани илан часачиа боа ялодоани пак-
чи-пакчи осихани.
- 45 Сиун-дэ аба осихани. Эндур дёгдоани олокиана даи
дасича долиндола гудэхэни.
- 46 Иисус даи дилгандии морапсиңкини: «Ама, җаладоаси
Мэнэ эргэмби бурэмби». Туй уми Иисус буйкини.
- 47 Чаоха дяңгиаңгони туй тайвани ичедерэ, Эндурбэ гё-
булэми уңкини: «Эй тэде тоңдо Най бичини».
- 48 Хэмту гэрэн гурун туй тайвани ичедехэндуэри, эйвэ
ичедепэри, туңгэмбэри дуктэмэри мочогохачи.
- 49 Нёамбани сари гурунсэл, Галилеядиади Нёани хамиала-
ни дичин экэсэл хаңгила илисимари чава ичедехэчи.
- 50 Чаду эм гудиэсису, тэдеку най, Иосифди гэрбуку-
ни, бичини. Аримафеядиади, Иудея хотондиадиани
дичин.
- 51 Нёани гисурэндувури поандолани эмуни бичин, хай-
ва-да тайдоачи эчиэ биэ,
- 52 Нёани, Эндур далачини эримбэ халачими, Пилатачи
энэрэ, Иисус Бэевэни гэлэхэни;
- 53 Иисусэвэ тэлэкудиэ ачогора, босоди хукухэни. Тотара
хоңко дёлодоани чапчиохан хэурду нэхэни. Чаду уй-
вэ-дэ эчиэ нэрэчи бичин.
- 54 Тэй нюңгучиэ ини бичини, надиачиа ини элэ иси-
гойни.
- 55 Галилеядиади Иисусэди дичин экэсэл-дэ энэхэчи; хэ-
урду Нёани Бэевэни нэриwэчи ичедехэчи.
- 56 Мочогора, сурги нутэwэ, модориори симуксэwэ барги-
хачи; надиачиа иниду гиандола тэймэри бичичи.

24 паси

- 1 Надалта боңго инидуэни чими эрдэ экэсэл, нёандиачи
гэсэ гой найсал баргихачи улэнди пуңку нутэсэлбэ га-
дёмари оголочиани дичичи.
- 2 Нёанчи дёло оңголодиади хаңгиси анаохамба бахачи.

- 3 Ипэри, Иисус Эден Бэевэни эчиэ баогоачи.
- 4 Нёанчи хал-хал ода, илисидоачи, олокиана нёанчи дюлиэлэни дюэр хусэ най килтолианди тэтуэку агбиңкичи.
- 5 Нёанчи тэң үлэмэри диливари пэйси тугбуйдуэчи, тэй найсал нёанчиачи уңкичи: «Хаймари суэ уюмбэ буйкинсэл долани гэлэмэчиусу?»
- 6 Нёани эйду аба, Нёани хорагохани. Нёани Галилеяду бидуи сунчи хайва-да уңкимбэни дёңгосу.
- 7 Нёани хисаңгохани: „Най Хусэ Пиктэни оркиңку найсал үлалачиачи буктэвучиэни, нёанчи Нёамбани тэлэдерэл, илиачиа иниду Нёани буйкиндии хорагодяра“».
- 8 Нёанчи-да Нёани хэсэсэлбэни дёңгохачи.
- 9 Оңголодиадани мочогора, хайва-да хэм дёан эмун дахамдисалчиани, хэмту найсалчи мэдэрэдигухэчи.
- 10 Чаду Магдалина-Мария, Иоанна, Мария Иаков энини, нёандиачи гэсэ гой найсал бичичи, нёанчи чава Апостолсалчи уңкичи.
- 11 Нёанчи тэй хэсэсэлбэ хай-да абакоди бодохачи, эчиэ тэдючиэчи.
- 12 Пётр-тани илигора, оңголочиани тутулухэни, мукчурэндэ, бососалба-рагда ичэхэни, тотара хони-да мэнэ дои очимбани эрдэңгэсими хамаси энухэни.
- 13 Иерусалимдиади нюңгуйңгу пасидоа би алдандола-тани Еммаусди гэрбуку ихон бичини. Тэй иниэ-тул нёандолачи дюэрни, таоси энэмэри,
- 14 Тэй очин дякасалба мэнэ долари гисурэндухэчи.
- 15 Нёанчи гисурэндумэри хисаңгойдоачи, Иисус дидэ, нёандиачи энэхэни.
- 16 Хайва-да эм ичэмэри Нёамбани эчиэ такоачи.
- 17 Нёани нёанчиачи уңкини: «Хайва суэ энэмэри мэнэ долари мурчису, хайми суэ гасачису?»
- 18 Нёандолачи эмуни, Клеопади гэрбуку, Нёанчиани таодагоми уңкини: «Иерусалимчи дичин найсалдола

- Си-рэгдэ эй инисэлду чадо хай-да очимбани сарасиси, хай?»
- 19 Иисус нёанчиачи уңкини: «Хай удэвэни?» Нёанчи Нёанчиани уңкичи: «Эндур, гучи хэм найсал дюлиэлэчи маси дякаду, хэсэду Эндурдиэ ундэй найди, Иисусэди Назаретаңканди хай-да очин дякава;
- 20 Боңго Эндур дёңни дяңгиансални, гучи гой дяңгиансалпо Нёамбани бурбуриду оркилтогоачи бугухэчи, туй тара Нёамбани тэлэвэңкичи, сарасиси-ну?
- 21 Буэ-тани агдачахапу: Нёани таям, Израильба хэңгэлигилэни; туй там-да туй очиндиани илиачиа ини сихэни.
- 22 Буэ поани экэсэлпу бумби миавамбоаңкичи: нёанчи чими эрдэ хээр дякпадоани бичичи.
- 23 Бэевэни-дэ баогоачичи. Экэсэл дидэ, хайва-да ичэ-хэмбэри уңкичи, Нёани уюн, унди, Мэдуңкусэл агбинда уңкичи.
- 24 Буэ найсалпу болани поани хээрчи энэхэчи, экэсэл уңкичи-мэт баогохачи; Нёамбани эчиэ ичэйчи».
- 25 Чаду Нёани нёанчиачи уңкини: «Суэ мурун ана, миавандиари нядоалайсу, хайва-да Эндурдиэ ундэй найсал ундивэчи хэм тэдегуй.
- 26 Туй Христос эрулэгиламчэй, Мэнэ гэбучи игилэмчэй, хай?»
- 27 Моисейдиади дэруми, хэмту Эндурдиэ ундэй найсалдола Нёамбани хэм Бичхэду нирувухэмбэ алосихани.
- 28 Энэйвэри ихомба дидяңкичи; нёанчиачи Нёани дюлэси энэйчи ичэвэңкини.
- 29 Нёанчи Нёамбани каодяроаңкичи, умэри: «Бунди дэрэдигу, сиксэгухэни». Нёани ирэ, нёандиачи дэрэди-гухэни.
- 30 Нёани нёандиачи аоликачидои, эпэмбэ дяпара, улэн хэсэвэ ундэ, моктолира, нёандоачи бухэни.
- 31 Чаду насалчи нихэликпичи, нёанчи Нёамбани такохачи, чадо Нёани нёандоачи ичэвэси очини.

- 32 Нёанчи диа диачиари уңкичи: «Нёани поктоду бунчи ундидуэни, Бичхэвэ алосоидоани, миавампу дола эчиэ дегдэ-ну, хай?»
- 33 Чадо-баки илира, Иерусалимчи мочогохачи, дёан эмун гэсэ бичин Апостолсалба, нёандиачи би найсалба баогохачи.
- 34 Нёанчи уңкичи: «Эден тэде хорагохани, Симонду агбиңкини».
- 35 Нёанчи поктоду очин дякава, хони-да нёанчи Нёамбани эпэмбэ моктолидоани токогохамбари, гисурэхэчи.
- 36 Нёанчи чава гисурэндуйдуэчи, Иисус Мэнэ Бэедии нёанчи долачи агбинда уңкини: «Кэвэли биусу!»
- 37 Нёанчи илидипари, нэлэпэри, панямба ичэпуэм мурчихэчи.
- 38 Нёани нёанчиачи уңкини: «Хайми суэ иладису, хайми тургэдэн суэ миаванчиасу ихэни?»
- 39 Ми нэлачиива, ми бэгдичиивэ ичэусу, эй Мэнэ Бэедии биэмби, Мимбивэ тоңгасиосу, ичэдеусу. Паняндү сумул-дэ, гирмакса-да аба, Минду хай-да хэм бини».
- 40 Эйвэ ундэ, нёанчиачи нэлаи, бэгдии ичэучихэни.
- 41 Нёанчи агдамари, эм тэдемэри эрдэңгэсихэчи, Нёани нёанчиачи уңкини: «Сунду эйду хай-да сияори дяка би-ну?»
- 42 Нёанчи Нёандоани силохан согдата пасивани, гучи киаксова бухэчи.
- 43 Дяпара, нёанчи дюлиэлэчи сияхани.
- 44 Нёанчиачи уңкини: «Гэ, эйвэ Ми сунди гэсэ бидуи, сунчи хисаңгохамби: „Моисей гиандоани, гучи Эндурдиэ ундэй найсал даңсадоачи, гучи Эндурбэ гэбулэй дяринсалду, Мимбивэ нирувухэн хэсэсэл хэм тэде осигодяра“».
- 45 Чаду хэмту Бичхэсэлбэ нёамбачи отолидала алосихани.

- 46 Туй тара нёанчиачи уңкини: «Туй нирувухэн, туй Христос маңгава багини, буйкиндии илиачиа иниду хорагогини.
- 47 Нёани Гэрбудиэни хэм гэрэн гурун Иерусалимдиادي тэпчиуми оркимбари гисурэуриwэ алосигини, соромборива гудиэсигини.
- 48 Суэ тэй агдоламдисални.
- 49 Ми Амимби Пуегдумбэни сунчи энундемби; суэ-тэни Иерусалимду дэрэдигусу, уедиэди кусумбэ барасидала».
- 50 Нёамбачи хотондиادي Вифаниячи ниэвугухэни, ңалаи эурими, нёанчиачи улэн хэсэwэ уңкини.
- 51 Нёанчиачи улэн хэсэwэ ундидуи, нёандиadiaчи горонами боа учиеэни токоми дэрүхэни.
- 52 Нёанчи Нёанчиани михораңкичи, маңга агданасимари Иерусалимчи мочогохачи.
- 53 Тул-тул Эндур дёкдоани гойдамари Эндурбэ мактачи-хачи, гэбулэхэчи. Аминь.

Нанай-лоча хэсэңкүни

Агдан – вера.

Албамба дяпай найсал – мытари; чиновники из числа местного населения, собиравшие в Палестине налоги в казну Римской империи. Евреи презирали мытарей за то, что они сотрудничали с языческой римской властью (такое сотрудничество противоречило Закону). Кроме того, мытари регулярно собирали с населения больше денег, чем они должны были отдать своим начальникам, и оставляли излишки себе.

Амбан – дьявол, сатана.

Амбан боани – место обитания дьявола, ад.

Амтакаку мо – плодовое дерево.

Арган – соблазн.

Бичхэ – Писание.

Гандян – святой; чистый.

Гандян осiori ини – день очищения; в этот день весь народ каялся в грехах и просил у Бога прощения и очищения.

Гиамба сари найсал – законники, книжники; люди, хорошо знавшие Закон и объяснявшие его. Во времена Иисуса они представляли собой относительно небольшую группу людей, которая пользовалась большим уважением среди евреев.

Гиан – Закон; пять древнейших книг Библии. Эти книги повествуют о сотворении мира, о первых праведниках, слышавших голос Бога и выполнявших Его волю. Далее они рассказывают о происхождении еврейского народа, о том, как Бог освободил его из рабства в Египте и

дал ему землю Палестины. Кроме того, в этих книгах содержатся повеления, которые Бог в древности дал еврейскому народу, – 10 главных повелений, множество правил, касающихся обрядов и общественной жизни. Именно поэтому все пять книг были известны под общим названием «Закон». В еврейской религии Закон был самой почитаемой книгой, точное соблюдение всех изложенных в ней правил было строго обязательным. Поскольку основные повеления, содержащиеся в Законе, Бог передал через Моисея, который по воле Бога вывел евреев из Египта, эта книга часто называлась «Законом Моисеевым».

Голоан – знамение.

Гудиэн – прощение, милость.

Давид – самый знаменитый царь Израиля, из племени Иуды. Он был одним из авторов ветхозаветной книги Псалмов – песен, обращенных к Богу. Стремясь к миру и справедливости, Давид исполнял Божью волю. В награду за это Бог обещал ему, что его потомки вечно будут израильскими царями. Еврейские пророки предсказывали, что Мессия, Который должен праведно царствовать над всем миром, будет потомком Давида.

Давид хусэ пиктэни – Сын Давидов; так называли Мессию, поскольку, как верили евреи, он должен быть потомком царя Давида.

Даи поан – высокое собрание, синедрион; высший еврейский совет, в который входило 70 человек, в большинстве своем имевших непосредственное отношение к религии. Синедрион не только решал политические вопросы, но и выносил судебные приговоры. Во времена Иисуса решения синедриона имели силу только в том случае, если их утверждали представители римской власти. Римляне, однако, стремились не оскорблять еврейскую религию и всегда считались с синедрионом.

Даңсава сари найсал – книжники, знатоки Закона.

Зилотсал — зилоты; по-гречески «ревнители». Еврейская религиозно-политическая группа, которая отличалась особой ревностью в охранении еврейской религии от языческого влияния и пыталась военным путем освободить народ от римской власти. Возможно, что один из 12-ти апостолов Иисуса, Симон Кананит, ранее принадлежал к этой группе.

Кэсивэ гэлэури дё — дом молитвы, синагога; здание, в котором евреи собирались каждую субботу для чтения Священных Книг и молитвы. Во времена Иисуса синагоги были в каждом городе, где жили евреи. Во время собрания в синагоге любой его участник мог прочесть отрывок из Священных Книг, а затем обратиться к собравшимся с толкованием прочитанного отрывка или поучением.

Левитсэл — левиты; люди, которые хоть и не были священниками, но помогали в храме прославлять Бога музыкой, готовить животных для жертвы и т. д. Кроме того, они изучали Закон и выступали среди народа как учителя. Это разрешалось делать только потомкам Левия, родоначальника одного из 12 родов (или племен) израильского народа. От его имени и пошло название «левиты».

Мо амтакани — плод.

Мода хэсэ — притча.

Надиачиа ини — седьмой день, суббота; священный день у евреев, который следовало полностью посвящать Богу и в который поэтому запрещалось работать. Новый день недели у евреев начинался с захода солнца, поэтому работать запрещалось с захода солнца в пятницу до захода солнца в субботу. Ко временам Иисуса еврейские учителя Закона составили список тех дел, которые считались недопустимыми в субботу. По субботам евреи всегда собирались в синагоге для молитвы и чтения Священных Книг.

Най Хусэ Пиктэни – Сын Человеческий; так Иисус часто называет Себя в Евангелиях. О точном значении этого наименования нет единого мнения. С одной стороны, так в книге пророка Даниила в Ветхом Завете называется небесная личность, которой в конце света Бог даст честь, славу и власть. С другой стороны, в еврейском языке это выражение может значить просто «человек». Если Иисус употреблял его в этом значении, то тем самым Он хотел подчеркнуть, что во всем подобен людям, прежде всего Своими страданиями и смертью.

Номо-номо биури – в мире, в покое жить.

Няико ана эпэнсэл аняни – праздник опресноков; праздник, отмечаемый в течение 7 дней после Пасхи. В течение этого праздника разрешалось есть только пресный хлеб, выпекаемый в виде тонких лепешек.

Оркимби ачори – просить прощения.

Оркин укуди энэ – проказа.

Пасха аняни – Пасха; главный еврейский праздник, отмечавшийся в память об освобождении еврейского народа под предводительством Моисея из египетского рабства. Этот праздник отмечался ежегодно в апреле. Для праздничной еды в день Пасхи полагалось специально заколоть ягненка.

Пуегдун – завещание, завет.

Пэргэури – испытывать, искушать.

Рай – место вечного блаженства, отведенное Богом для праведников.

Саддукейсал – саддукеи; наиболее влиятельное религиозное течение среди евреев во времена Иисуса. Многие саддукеи входили в синедрион; среди саддукеев были и первосвященники. Они, как и фарисеи, отличались жестким следованием Закону. Однако, в отличие от фарисеев, саддукеи не почитали другие Священные Книги, в частности, книги Пророков. Они не верили в воскресение мертвых, потому что в Законе о нем ничего не сказано.

Сондёмди – Мессия; по-еврейски это слово означает «помазанный», то есть «избранный Богом» – Божий Посланник, приход Которого предсказывался в книгах Закона и Пророков. Во времена Иисуса евреи ждали прихода Мессии и верили, что Он освободит их от власти римлян и установит Царство Божие.

Соромби ачори – снимать грех, каяться.

Соромбори – грешить, грешно.

Сорон – грех.

Сороңку най – грешник.

Сугдиури – жертвовать.

Сугдиури бэун – жертвенник; место, где евреи приносили жертвы, предписанные Законом. Во времена Иисуса животных закалывали на жертвеннике во внутреннем дворе храма, а жертвенные благовония курились на жертвеннике непосредственно в храмовом здании.

Сурги нутэ – благовоние.

Сэвэкилэури – крестить, креститься.

Тоңдо най – праведник.

Тэлэури – распинать, распять.

Улэн мэдэ – Благая весть, Евангелие.

Фарисейсал – фарисеи; религиозное течение у евреев во времена Иисуса. Фарисеев отличало очень строгое следование всем, даже второстепенным требованиям Закона. Они пользовались большим уважением в народе и сами очень гордились своей религиозностью и строгостью нравов.

Хорагори – воскресение.

Хоримди – Спаситель; значение имени «Иисус».

Хориори – спасение.

Христос – Помазанник; греческий перевод еврейского слова «Мессия».

Чалиори – обрезание; отсечение крайней плоти. Согласно условиям завета, заключенного между Богом и еврейским народом на горе Синай, каждый первенец мужского пола должен был пройти через этот обряд. Над

новорожденными этот обряд совершался на восьмой день жизни; во времена Иисуса имя давалось ребенку в этот же день.

Эден – Господь; царь; хозяин.

Эден далачини калгадиани – царство.

Эден хани – владение царя, царство.

Эндурбэ гбулэй дяринсал – псалмы; по-гречески «песни».

Под этим общим названием собранно 150 еврейских религиозных песен, составляющих особую книгу Ветхого Завета. Многие из них выражают благодарение Богу за спасение от гибели, другие описывают Его величие и любовь или же содержат мольбу о помощи.

Эндур Боани – место обитания Бога.

Эндур далачини эрини – Божье царство.

Эндур дёңни – дом Бога, храм; священное здание в Иерусалиме. Только там евреи совершали жертвоприношения, а также собирались в дни праздников. Впервые храм был построен в X в. до н. э. знаменитым еврейским царем Соломоном. Храм, который существовал во времена Иисуса, был построен еврейским царем Иродом Великим. Здание храма было окружено галереями, которые разделяли окружавшее его пространство на несколько дворов (см. схему на с. 109). Галереи храма были местом, где обычно собиралось большое количество людей. Как и предсказывал Иисус, вскоре после Его Воскресения, в 70 г. н. э., храм был разрушен римлянами и с тех пор не восстанавливался.

Эндур дёңни боңго дяңгисални – первосвященники; наиболее влиятельные еврейские священники, имевшие политический вес. Многие первосвященники входили в Синедрион. Во времена Иисуса почти все они происходили из нескольких знатных семейств.

Эндур дёңни дяңгисални – священники; служители храма в Иерусалиме. Основная роль священника в еврейской религии состояла в принесении жертв Богу. Священниками, согласно Закону, могли быть только потомки

Аарона, родного брата Моисея. Священники были разделены на 12 групп, каждая из которых служила в храме два раза в году по одной неделе.

Эндурдиэ ундэй найсал (букв. «от Бога говорящие люди») – пророки; люди, слышащие слово Божие и доносящие его до людей. Пророки призывали чтить Бога и выполнять Его волю, любить ближнего, не делать зла. Многие еврейские пророки записывали то, что Бог говорил через них. Во времена Иисуса книги Пророков, в частности книга Исаии, жившего в VII в. до Рождества Христова, очень почитались у евреев. Среди пророков, не оставивших книг, наибольшим уважением пользовался Илия, живший в IX в. до н. э. Он бесстрашно обличал царя, не чтившего Бога, и прославился многочисленными чудесами. Как позднее возвестил людям другой пророк, Малахия, перед концом света Илия должен был вернуться на землю.

Эндур Мэдуңкуни – Божий Вестник, Ангел.

Эндур Эрини – Божий Дух, Святой Дух.

Эрдэңгэ дяка – чудо.

Лука улэн мэдэни

Евангелие от Луки на нанайском языке

НИУ Институт перевода Библии
Лицензия № 01271 от 22.03.2000
101000 Россия, Москва, Главпочтамт, а/я 360

Подписано в печать .
Формат 84×108 ¹/₃₂. Печать офсетная. Усл. печ. л. 5,88.
Тираж 1000 экз. Заказ №

Отпечатано с готовых диапозитивов
в типографии «Принткорп»
ЛП № 347 от 11.05.1999
220141 Беларусь, Минск, Староборисовский тракт, 40